

# **LIPE MUNDURUMU YEMA Yesusini “Nanga Kongonomo Tenjipai.” Nimbe Lipe Mundurumu Yemanga Bokumu**

*I Bokumunge Ungu Pulu Mare*

Ye kisene Yesusinge temanemo toringimenga te LLuku. Pe LLukuni Yesusinge temanemo topa pora sipelie i bokumu torumu. Boku talo pea ye nomi Tiopillasi simbendo torumu (LLuku 1:1-4, Lipe Mundurumu Yema inie 1:1-2). Inie 1:1 paa kanani. Akuna boku ou torumu bokumunge “Yesusini pulu monjipe terimu mele torundu.” nirimu (Mako 1:1 mele). Aku liemo i bokuna molemo temanema Yesusinge temanemala, Yesusinge ungumala. Nakolo Yesusi mana molopalie terimu mele molo. Yesusini yu lombili andoli yema yunge tondolomo ‘ene simbu kinie nanga ungumu ninjiku, nanga kongonomo tenjingí.’ nimbe yunge Minimu ene sirimu (1:3-9, 2:1-3). Yesusinge Minimu enenga konopuna molopa tondolo purumu kinie enene Jerusalleme sukundu Yesusinge ungumu pulu monjiku ningu sinjikulie (2:1-8:1), pe kolea aisilinge anju anju ningu sinjiliku puringi. Pe Pollo kepe “Nanga kongonomo tenjipui.” nimbe lipe mundurumula. Kanu yema Yesusini “Nanga kongonomo tenjipai.” nimbe lipe mundurumu yemane ulu mare aisili teringi. (Enenga imbimunge ungu pulu te boku ambolconomonga alsena anjukundu “1. aposel” molemo.) Pita kinie Pollotolonga temane

*aisili molemo. Pitanga temanema 1:15-5:11,29-32, 8:14-25, 9:32-11:18, 12:1-19 molopa, Pollonga temanema 7:58 pulu monjipe nimbe, 28:31 nimbe pora silimo. Nakolo kamu koloringili mele naa nimbe silimo.*

*Ou Juda yambomane mindi ungumu pilku Kirasinge yamboma moloringi. Nakolo pe Juda yambo aisilini "Ungumu naa pilimulu." niringi kinie Juda yambo naa molko yambo lupe moloringime ningu siringi kinie ene aisili "Sike." ningu tondolo munduku pilku Kirasinge yamboma moloringi. Yesusi Kirasi yunge yambo talapemo wendo wendo oringi mele i bokuna molemo (1:15, 2:41,47, 8:1,4-8,26-40, pe aisilila).*

*Temane mare LLukuni we pilipelie boku torumunje. Nakolo wale mare yu yuyu Pollo kinie andopa kanopalie torumula. (Yu pea andoringi kinie "Olio i sipu sipu terimulu." nimbe boku torumu mele 16:10-17, 20:5-21:18, 27:1-28:16 molemo. Pillimono 23-24, Kollosi 4:10-17 kananila.)*

*Ungu pulu mare boku ambolkonomonga alsena anjukundu "8. bilip", "2. arapela lain", "14. Grik" mimi siku kanani.*

*Ya ungu pulumu pora nikimu.*

<sup>1</sup> Ye Aili Tiopillasi, Yesusini pulu monjipe uluma tepa yamboma ungu mane sipe terimu mele ou boku tengah torundu kanumu.\*

<sup>2</sup> Ou uluma pulu monjipe telipe pupelie, pe yandopa 'Kelepo mulu koleana altopo nondopo pumbu.' nimbe pilipelie nirimumuni, "Nanga kongono tenjipai." nimbe mako topa lipe mundurumu yema,\* Mini Kake Telimu yu kinie molopa\*\* lipe taponjirimuna Yesusini enendo

"Ene i siku i siku teangi." nimbe ungu mane sirimu.\*\*\*

<sup>3</sup> Yesusi yu mindili nomba kolopa lomboropa ola molopalie nirimumuni, yu 'Lombili andolime na paa sike lomboropo ola molondu mele kanangi.' nimbe ene moloringine yu pupe ene kanoko molangi ulu mare terimu. Yu walse walse nimbe ene moloringine omba mona molopa, Pulu Yemo ye nomi kingimu molopa kolea nokolemo nokomba mele\* ene nimbe sirimu. Aku sipe tepa molopili wale paono talo omba purumu.

<sup>4</sup> Walse ene kinie molopalie Yesusi yuni nimbendo: "Ene ou kolea aili Jerusalleme munduku naa keleangi. Ou Tarane "Simbu." nirimu Minimu 'Ou opili pe pamili.' ningi inie we nokoko molangi. Akumu nane ene ou nimbu sirindu piliringi kanumu.\*

<sup>5</sup> Nane enendo ou nimbundu: "Jonone yamboma no linjirimu liringi nakolo wale aisili omba naa pupili ene nanga yamboma Pulu Yemone Mini Kake Telimu simbe lingí." nirindu kanumu." nirimu.\*

<sup>6</sup> Kanu kinie Yesusi lombili andolime yu kinie maku toko moltolie niringimuni, enene Yesusindu ningindu: "Ailimu,\* kinié walemonga nuni "Isirele yamboma altoko eneno molangi, Romo gapomano manie pupili, eneno gapomano liengi, na enenga ye nomi kingimu molopo ene nokambo." nininje?" ningi walsiku piliringi.

<sup>7</sup> Yuni enendo nimbendo: "Tarane ulu lupe lupe "Tembo." nimbe mako tolemo walema kinie melema inge teli walema kinie enenga

kongono molo.\* Tarane uluma temba walema Tara yuyu akuma pilipe molemo.

<sup>8</sup> Nakolo ene molongena Mini Kake Telimu ombalie ‘Ene tondolo pupili molangi.’ nimbé. Kanu kinie pe ene tondolo pupili molkolie kolea aili Jerusalleme kinie, kolea Judia disiriki lemo taonona kinie kolea kangama pali kinie, kolea Sameria\* disiriki lemo koleama pali kinie, kelko ma koleama pali kinie yambomando enene na terindu mele kepe “Tembo.” nirindu mele kepe kanoko piliringi mele ningu siliku pungí.” nirimu.

<sup>9</sup> Yuni aku sipe nimbe molopalie, ene kanoko molangi yu ma koleamo mundupe kelepa muluna olando purumu kinie kupe te ombo yu pipi sirimu, pe altoko naa kanoringi.

<sup>10</sup> Yu ola pumbe purumu kinie ene olando siku nemo nemo ningu kanoko angiliringi kinie ene angiliringine ye talo mulu wambale kake pakokolo tamburembu ongo angilkululie niringilimuni,

<sup>11</sup> eltene enendo ningilindu: “Kolea Gallilli yema, ene muluna olando siku nambemuna kanoko angilkimiliye? I Yesusi, Pulu Yemone kinié mulu koleana olando likimu yemo, yu kinié pukumu kanokomele mele pe walse aku sipe kelepa manie ombá.” niringili.

<sup>12</sup> Kanu kinie ene ma pangí Unju Ollipi Poniemo munduku kelko Jerusallemendo kelko yando oringi. Aku ma pangimu kinie kolea aili „Jerusalleme“ kinie paa nondopa mele lerimu, aulke ponjilimu, „Juda yamboma koro

moloringi, wale Sambatemonga\* Isirele yamboma andoringi aku mele.

<sup>13</sup> Yesusi mulu koleana olando purumu kinie yu lombili andolime Jerusallemendo yando ongo suku pukulie niringimuni, ulkena puku ulke olakondo peringine ola puringi. Akuna peringi yemanga imbime i sipe: Pita keme Jono keme Jemisi keme Enderu keme, Pillipu Tomasitolo kinie, Batollomiu Mateyutolo kinie, Allapiasi malo Jemisi keme “Olio Isirele yamboma oliolio gapomano molamili.” ningu karaye teringi talape ‘Sellote’ nili ye Saimono keme elte kinie, Jemisi malo Judasi yu kinie, aku ye rureponga yepoko aku ulkena peringi.\*

<sup>14</sup> Kanuna ene pali liku maku toko, konopu teluna pupili Pulu Yemo kinie ungu ningu mindi moloringi. Ambo mare kinie Yesusinge anumu Maria kinie Yesusinge angenupili kinie akuma pea pali Pulu Yemo kinie ungu ningu moloringi.

<sup>15</sup> Kanu walemanga Yesusinge lombili andoli yambo wane anderete tuwendi\* moloringi kinie Pitane ola angilipe enendo nimbendo:

<sup>16</sup> “Angokeme, Mini Kake Telimuni ,ye nomi kingi, Depisinge kere punduna pe wendo ombá mele nirimu yuni bokuna torumu mele yu paa sike aku sipe wendo ombámondo nirimu. Akumu paa sike wendo orumu. Kanu ungumu Judasini Yesusi yu opa touma lipe simbe Depisini ou nirimu kanu ungumunge pulumu talko wendo orumu.\*

<sup>17</sup> Judasi olio kinie pea molopo kongono pea tepo molorumulu kanumu. Akumunge ye te yunge kolo wangopa molopili” nirimu.

**18** (Aku ye Judasiyu tepe kenjirimumunge kou siringi kanumuni ma te topo topa lirimu kinie\* yu mana manie topa mundupe yunge olomo suku nimbe yunge oloma pali wendo omba purumu.

**19** Pe Jerusalleme moloringi yamboma pali Judasiaku terimu pilkulie enenga umbu unguna kanu koleamo imbi lelko ‘Akeltama’ niringi. ‘Akeltama’ akumunge pulumu ‘Meme Ondo Lenjili Mamo’.)

**20** “I ungu wendo ombá nirimu Depisini bokuna torumu ungumu Konana bokuna molemo mele i sipe:

‘Yunge ulkemo we angilipili,  
Akuna yambo te naa peangi.’\*  
nimbe molemo kanumu. Konana tene i sipe nikimula:

‘Yambo te yunge kongonomo kolo wangopa  
tepili.’\*\*

nimbe molemo kanumu.

**21-22** “Kapola, i ungutolonga te ou kamu talko wendo orumu, kinié te kamu wendo opili teamili. Ou olio ye engaki rurepo molorumulu i nikirumunge te manie purumumunge kolo wangopo te mako tamili. I ye mako tomolomo yu i sipe ye te molopili: Ou Jonone pulu monjipe yambo no linjirimu mele kepe, pe kelepa yandopa yandopa Yesusini uluma tepe unguma nimbe molopalie, yu olio mundupe kelepa mulu koleana olando purumu mele kepe, aku uluma pali wendo orumu mele, olio kinie tapu topa andopa kanorumu ye te mako tamili. Kanu yemo yuni Yesusi lomboropa ola molorumu mele

kanorumumunge olio pea manda andopo nimbu simulú.” nirimu.

<sup>23</sup> Pitane aku nirimu kinie pilkulie enene ye talo mako toringi. Ye tengah imbi Josepo, kanumundu ‘Basipasi’ niringila, (yunge imbi te ‘Jasitasi’ niringila;) ye te Matayasi.

<sup>24-25</sup> Aku yetolo mako tokolie Pulu Yemo walsikulie ningindu: “Ailimu, nu yambomanga pali konopuna kanoleno kene Yesusini “Nanga kongono tenjipai.” nimbe lipe mundurumu ye rureponga kongonomo Judasi mundupe kelepa yunge koleando purumu, kanu kongonomo Judasi yu kolo wangopa temba ye te nuni i yetolonga te mako tonumu olio liku ora si.” niringi.

<sup>26</sup> Kanu kinie pepá gomo talonga yetolonga imbitolo toko manie mundukulie mingimu ambolko lope lope tenjikulie wendo liringi kinie Matayasinge imbimu wendo orumu, kinie “Yesusini ou lipe mundurumu ye rureponga yepoko kinie pea kongono tapu toko teangi.” niringi. Kanu kinie kanu lipe mundurumu yema altoko engaki rurepo moloringi.

## 2

<sup>1</sup> Yesusi kolorumu koro yepoko pakara ombo purumu kinie, Juda yamboma mako toko Pulu Yemo kinie ulu te teringi wale ‘Pendikosi’ nilimu\* wendo orumu. Aku walemonga Yesusi lombili andoli yamboma kolea teluna maku toko moloringi.

<sup>2</sup> Walsikale ungu te, poporome aili ungu nilimo mele, muluna ola manie orumu, kanu melemo ulkena moloringi yambomane pali piliringi.

**3** Melema, tepe alimbelu mele, wendo orumu kanoringi, aku melema pupe yambomanga pali pengena telu telu nimbe pupe molorumu.

**4** Kanu kinie Mini Kake Telimu Yesusi lombili andoli yambomanga konopuna sukundu omba molopa kapola terimu. Kanu kinie Minimuni ene yu mele mele ambolopa ‘Umbu ungu lupe lupe kerena niengi.’ nirimu kinie ene umbu ungu ou naa niringi lupe lupema pulu monjiku ningí niringi.

**5** Juda yambo mare ou ongo kolea aili Jerusalleme maku toko moloringi kinie aku ulumu wendo orumu. Ene Pulu Yemonga ungu pilili yamboma. Ene ma koleana yambo lupe lupema pea pali molkolie kanu yamboma munduku kelko Jerusalleme sukundu oringi.

**6** Kanu poporome aili mele ungumu pilkulie kanu yamboma maku tokolie enenga umbu ungu lupe lupema Yesusi lombili andolimene niringi pilkulie ene konopu aisili liku munduringi.

**7** Ene suru ningu konopu aisili lelkolie ningindu:

“A, i yamboma umbu ungu lupe lupe nikimilime ene kolea Gallilli disiriki yamboma mindinje? „Gallilli yambomane ungu telumu mindi nilimele kanumu.„

**8** Pe kinié olianga ya yu mele mele umbu ungu lupe lupe nilimoloma nambe teko pilkulie nikimiline olio pilkimuluye?

**9-11** “Olio kolea Patia kinie, kolea Midia kinie, kolea Illame kinie, kolea Mesipotemia kinie, kolea Judia kinie, kolea Kapadosia kinie, kolea Pondasi kinie, kolea Esia kinie, kolea Pirisia

kinie, kolea Pambillia kinie, kolea Isipi kinie, kolea LLipia\* sukundu Sairini nondopa lemo koleama kinie, kolea aili Romo kinie, kolea Kiriti kinie kolea Arebia kinie, aku kolea lupe lupe-manga pali molopo ómulu yamboma molemolo. Olio Juda yamboma kinie yambo lupe molopo Juda yambomanga ulu pulu alowa tepo telemolo yamboma kinie, olio yu mele mele olionga umbu ungumane Pulu Yemone ulu tondoloma telemo ulumando nikimili pilkimulu.” niringi.

<sup>12</sup> Ene suru ningulie ‘Pilipu sundukumulunje?’ ningu pilkulie, anju yando kerepali ningulie “Imunge ulu pulumu nambolkamoye?” niringi.

<sup>13</sup> Nakolo yambo marené ungu taka tonjikulie ningindu: “I yema no tondolo nongolie kekelepa tokomele.” niringi.

<sup>14</sup> Kanu kinie Pita, ‘Yesusini lipe mundurumu ye, rureponga yepoko wema kinie pea ola angilkulie yambomando tondolo mundupe nim-bendo: “Olionga Judia yamboma kinie, ene Jerusalleme molemele yamboma kinie, i wendo okomo tekemolo ulumunge pulumu ene nimbu siembo, mimi siku komu tenjiku piliengi!” nir-imu.

<sup>15</sup> “‘Olio kekelepa tokomolo.’ ningu pilkimili akumu molo. Kinié ipulueli ou nani killoko mindi, aku kinie yamboma no naa nolemele kanumu.

<sup>16</sup> Kinié wendo okomo ulumunu Pulu Yemone ungu umbu tonjirimuma pilipe yamboma nimbe sirimu ye\* Joelene pe wendo ombá mele ou nirimu. Yuni nirimu mele i sipe:

<sup>17</sup> “Pulu Yemone\* nimbendo:

"Kolea pora nimbé walema wendo ombá kinie  
nane nanga Minimu yamboma pali simbu.

Kanu kinie enenga lemenali marenalini  
nanga ungu umbu tonjimbuma pilku  
yamboma ningu siku,

enenga ye andamane uru kumbu teko,  
enenga ye kangoma ongo angilili none temba  
kumbikere lipe pinjimbe uluma kanonge.

**18** Nanga kendemande ambo yema kepe  
nanga Minimu simbu kinie nanga ungu umbu  
tonjimbuma pilku yamboma ningu singí.

**19-20** Ailimunge wale ailimu ou wendo naa opili  
nane muluna ola kinie mana manie kinie  
'walema pora nimbé', lipe ora simbe ulu ton-  
doloma\*

'Ene kanangi.' nimbu tembo.

'Mana meme kinie tepe kinie ikilie aili kinie,  
aku ulu tondoloma tepili.' nimbú.

'Muluna enamo sumbulu topa olimu meme  
tepili.' nimbula.

**21** Kanu kinie Ailimunge wale ailimu  
kamu wendo ombá kinie yambomane isili ou  
Ailimunge imbi lelko\* walsingí yamboma  
nane lipu taponjipu  
mindili nolemelka aulkena wendo lipu  
na kinie molko konjingí aulkena  
lipu monjimbu." nimbe\*\*  
Pulu Yemone nimu."\*\*\*  
nimbe Joelene nirimu.

**22** "Ene Isirele Yamboma, ene i ungu nimbú  
tekeromo pilieyo. 'Kolea Nasarete ye Yesusi 'Yu  
sike Pulu Yemone mako topa lipe mundurumu.'  
ningu kanangi.' nimbe Pulu Yemone yu lipe

taponjirimu kinie ene moloringine yamboma  
lipe ora sirimu ulu tondoloma terimu. Akumu  
ene kanoko piliringi.

<sup>23</sup> Enene kanu yemo kinie pe tengen mele Pulu  
Yemone ou pilipe molorumu. Pulu Yemone  
'I sipe wendo opili.' nimbe pilipelie i yemo  
ene Juda Yamboma sirimu kinie 'Teko kenjiringi  
yambomane olio liku taponjiku yu tangi.' ningu  
ene siringi, enene 'Yu kolopili.' ningu unju  
perana pirimuni toko uku toko panjiringi kolo-  
rumu.\*

<sup>24</sup> 'Aku teringi,' nakolo Pulu Yemone 'Yu kamu  
mana naa pepili.' nimbe topa makinjirimu.  
Kololi ulu pulumuni yu ka sipe kamu manda  
naa ambolombamonga mindili nongo kolemele  
mindilimenga pali Pulu Yemo yuni yu lipe tapon-  
jipe wendo linjirimu.

<sup>25</sup> "Depisi yuni kepe yu i yemo pe temba mele  
ou ungu te nirimu mele i sipe:

"Ailimu nanga kumbikerena  
alieli molorumu kanorundu.  
Yu na lipe taponjimbendo  
nanga ki umbukundu molemomonga  
meltene umbuni na manda naa simbe.

<sup>26-27</sup> Akumunge na kamele akopo molopo,  
nanga kerena konopu sipu unguma nilio.

Nuni nanga minimu yambo kolko pulimele  
koleana

munduku naa kelko, nunge Ye Kake Teli onomo  
'We purupili.' naa nini akumunge pilipulie,

'Nanga kangimu kinie minimu kinie  
na mele peangamo limbu.' nimbu nokopo molio.

<sup>28</sup> Nuni na konde molopo mindi pumbu aulkemo

liku ora sirinu,  
 nu na kinie tapu toko molonimunge  
 na konopu aisili simbu.”\*  
 nimbe Depisini aku sipe nirimu.

<sup>29</sup> “Angokeme, i ungumu sike nikiru. Olionga anda kolepa Depisi koronga ou kolorumu ono teringi, yunge ono koleamo olionga koleana lerimu lemo. Aku liemo yuni ‘Nunge Ye Kake Teli onomo ‘We purupili.’ ni naa nini.’ nirimumu yu yuyundu naa nirimu lemo.

<sup>30</sup> Nakolo yu Pulu Yemone ungu umbu ton-jirimuma pilipe yamboma nimbe sirimu yemo molopalie, Pulu Yemone “Nuni kalko lini ye te nu kolo wangopa ye nomi kingimu molomba.”\* nimbelie “Paa sike aku tembo.” nimbe tondolo mundupe nirimu mele pilirimu.

<sup>31</sup> Depisi ,yu Pulu Yemone ungu umbu ton-jirimuma pilipe yamboma nimbe sirimu yemo molopa, pe wendo ombá mele ou pilipelie nim-bendo:

‘Pulu Yemone yunge minimu  
 yambo kolko pulimele koleana  
 mundupe naa kelepa,  
 yunge onomo naa purumbe.’\*  
 nirimu akumu Pulu Yemone mako topa lipe  
 mundurumu ye nomi Kirasimu\*\* kolopalie  
 kelepa lomboropa ola molombamondo nirimu.

<sup>32</sup> Pulu Yemone i ye Yesusi sike topa makinjirimu,  
 akumu olio kanorumulu mele níkimulu.

<sup>33</sup> “Topa makinjipelie yunge ki umbukundu lipe monjirimu. Akuna molopalie Lapane ou “Simbu.” nirimu Mini Kake Telimu yu sirimu,

lipelie, kinié yando sikimu. Kinié kanoko pilkimilimu yuni sikimumu kanoko pilkimili.

<sup>34-35</sup> Depisi mulu koleana olando naa purumu nakolo yuni nimbendo:

“Aili ‚Pulu Yemo Yawene,‘  
nanga Ailimundu nimbendo:

“ ‘Nunge opa touma nuni nokani.’ nimbu,  
pe ene topo manie mundunjimbu kene  
isili ou nu ‚na kinie pea tapu topolo  
ye nomitolo molopolo melema nokambili,  
nanga ki umbukundu ongo molani.” nirimu.”\*  
nimbe Depisini nirimu.

<sup>36</sup> “Akumunge Isirele yamboma ene pali i siku piliengi: I ye Yesusi enene unju perana toko uku toringimu Pulu Yemone “Yu Ye Ailimu kinie, yu ‚Yamboma nokopa konjimbe ye te lipu mundumbu.’ nimbu mako torundu ye nomi Kirasimu molopili.” nirimu yemo molemo.” nimbe Pitane nirimu.

<sup>37</sup> Pitane enene aku siku teringi mele nirimu ungumu pilkulie yamboma mini wale mundukulie enene Pita kinie Yesusini “Nanga kongonomo tenjipai.” nimbe lipe mundurumu ye\* wema kinie enendo ningindu: “Angokeme, kinié olio nambe teamiliye?” niringi.

<sup>38</sup> Pitane enendo nimbendo: “Ene ‚Pulu Yemone olionga ulu pulu kerime kanopa konde tenjipili.’ ningu teko kenjilimele mele pilku keri pilku, konopu alowa teko, ‚Na Yesusi Kirasinge yambomo molambo.’ ningu\* no liengi. Aku tengenye kinie Pulu Yemone Mini Kake Telimu ene we simbe lingila.

**39** Pulu Yemone ‘Mini Kake Telimu simbu.’ nirimu akumu ene kinie enene kalko lingí yamboma kinie yambo kolea sulumanga molemele molongema kinie enendo pali nirimu. Ailimu olionga Pulu Yemo yuni ‘‘Nanga yamboma molangi wai.’’ nimbú yamboma pali Mini Kake Telimu simbu.’ nirimu.” nimbe Pitane nirimu.

**40** Pitane ungu lupe lupe aisili tondolo mundupe ene lepi lepi topalie nimbendo: “Ya mana yambo molko kenjilimelemenga Pulu Yemone ene mongo simbe tekemo kene yuni ‘Olio mongo naa sipili.’ ningu, pilku konjiku molai.” nirimu.

**41** Kanu kinie Pitane nirimu ungumu pilku liringi yamboma no liringi. Kanu wale-monga Yesusinge ungumu ‘Sike.’ ningu tondolo munduku piliringi yambo talapemonga sukundu yambo tere tausini mele\* olandopa purumu.

**42** Kanu kinie ungumu pilku liku no liringi yamboma Yesusini “Nanga kongonomo tenjipai.” nimbe lipe mundurumu yemane ungu mane siringime pilku, angenupili kinie teluna kapola kapola molko, pea tapu toko langi nongo,\* Pulu Yemo kinie ungu ningu moloringi.

**43** Yesusini “Nanga kongonomo tenjipai.” nimbe lipe mundurumu yema Pulu Yemone lipe taponjirimuna lipe ora sirimu ulu tondoloma teringimunge\* kanokolie yamboma pali pipili koloringi.

**44** ‘Yesusi yu sike „Pulu Yemone “Lipu mundumbu.”’ nimbe mako torumu ye nomi Kirasimu.’’ ningu tondolo munduku piliringi\* yamboma pali teluna molko, enenga melema

eneno yu mele mele naa nosiku, ‘Olionga pea’ ningu nosiku moloringi.

<sup>45</sup> Enenga ma kinie mele nosiringime makete teko kou liku mele molo torumu yamboma kou moke teko siringi.\*

<sup>46</sup> Alieli ,Pulu Yemo popo toko kaloringi, ulke tembelena puku maku toko, enenga ulkemanga pali pea andoko ‘Langi pea namili.’ ningu, konopu peanga pepili konopu siku langi nongo,

<sup>47</sup> Pulu Yemo kapi ningu imbi ambolko ola linjiku, moloringi. Yambomane pali ene kanoko peanga kanoringi.\* Ulu pulu keri kanoko keri kanoko konopu alowa teko Yesusindu “Mindili nolka aulkena naa pambo kene liku taponji.”\*\* niringi yamboma Ailimuni ‘Yunge yamboma molangi.’ nimbe taki taki sukundu sukundu lirimu.\*\*\*

### 3

<sup>1</sup> Yamboma ,Pulu Yemo popo toko kaloringi, ulke tembelena ena tere killoko Pulu Yemo kinie alieli ungu niringi mele walse Pita kinie Jonotolo kanu enamonga Pulu Yemo kinie ungu ningilindu puringili.

<sup>2</sup> Kimbu keri lerimu ye te akuna molorumu. Anumuni merimu kinie kimbu keri lelimu merimu. ‘Yu yambo ongo ulke tembelena sukundu pungíme mawa tepa “Kou mone siei.” nipili.’ ningu alieli mengo ongo ulke tembele kerepulu te ‘Paa Peanga’ ningu imbi leringine monjiringi.

<sup>3</sup> Yu akuna molopili Pita Jonotolo ongo ulke tembelena sukundu pungilí puringili kinie yuni elte mawa tepa “Kou mare siele.” nirimu.

<sup>4</sup> Pita kinie Jonotolone yu nemo nemo ningu kanokololie Pitane nimbendo: "Nuni olto kanoi." nirimu.

<sup>5</sup> Kanu kinie 'Kou singilindu nikimbili.' konopu lepalie elte kanorumu.

<sup>6</sup> Kanu kinie Pitane nimbendo: "Na kou telu kepe paa naa mendu nakolo melte mekeromo nu siembo. Akumu kolea kanga Nasarete Ye\* Yesusi Kirasinge tondolomone\*\* 'Nu ola angilku andoi.' nikiru." nirimu.

<sup>7</sup> Aku nimbeline yunge ki umbukundu ambolopa lipe ola anjirimu kinie walsikale yunge kimbutolo enge nirimu.

<sup>8</sup> Yu pukue topa ola pupe ola angilipe pulu monjipe andopa molorumu. Aku tepalie yetolo kinie pea tapu toko ulke tembelena sukundu purungi. Yu kimbu kambilipe pukue tolipe Pulu Yemo kapi nilipe sukundu purumu.

<sup>9</sup> Yu kimbu kambilipe Pulu Yemo kapi nilipe orumu yambomane pali kanoringi.

<sup>10</sup> Enene kanokolie, 'Yu alieli ulke tembele kerepulu 'Paa Peangamo' niline manie molopa kou mawa telemo ye kanumu okomo lemo.' ningu kanoko pungu pungu ningu mini wale munduringi.

<sup>11</sup> Kimbu keri lerimu yemo ola angilipe Pita Jonotolo ambolorumu kinie kanokolie yamboma pali mini wale munduku lkisiku ongo ulke tembelena 'Sollomononga' ningu ulke kerepulu takoko yando liringine Pita Jonotolo kinie kimbu keri lerimu yemo kinie moloringine ene ongo maku toringi.\*

**12** Aku teringi kinie Pitane kanopalie enendo nimbendo:

“Isirele yamboma, nambemuna i ulu wendo okomomo kanoko konopu aisili liku mundukumiliye? Nambemuna enene olto nemo nemo ningu kanokomeleye? Oltone oltonga tondolo tene “I yemo ola angilipe pupili.” ningili konopu lekemeleye? Paa molo. Molo oltone Pulu Yemone kanopa peanga kanolemo ulu pulu telembolomone i yemo tekó konde língili konopu lekemeleye? Paa molola.

**13** Eporayamo keme Aisake keme Jekopo keme olionga anda kolepalimene “Olionga Pulu Yemo.” ningu popo toringi Pulu Yemo, yuni yunge kemande Yesusinge imbi ambolopa ola linjirimu. Aku yemo ene Isirele yambomane “Yu tangi.” ningu yu Romo gapomano yema liku siringi. Kanu kinie Romo ye nomi Paillatene “Yu ulu te temu nimbu naa kanokoro. Yu pupili.” nirimu nakolo enene “Yu tangi.” ningu liku bulu siringi.

**14** Ye Kake Tepa Sumbi Nilimu liku bulu siku, “Yu kolopili tangi.” ningu, yamboma topa konjili ye Barapasi ka ulkena “‘Kolo wangopa wendo pupili.’ ni.” niringi.

**15** Konde mololi ulumunge pulu yemo toko konjiringi nakolo Pulu Yemone yambo ono koleana topa makinjirimu. Oltone aku terimu mele kanorumbulu.

**16** ‘Yesusini manda lipe taponjimbe.’ nimbu tondolo mundupu pilímbulumunge i ye ene kanoko imbi silimele yemo konde pukumu. ‘Yesusi kinie tondolo pelemo.’ nimbu pilipu yu imbi lepo walsipulu, yuni i yemo manda ‘Konde

pupili.' nimbé.' nimbu tondolo mundupu pilímbulumunge i yemo konde pumu mele enene kanokomele.

<sup>17</sup> "Sike, angokeme, ene kinie enenga nokoli yema kinie pilku sundukulie Yesusi toringi.

<sup>18</sup> Nakolo talko wendo orumu mele ou Pulu Yemone 'Wendo opili.' nirimu mele wendo orumu. Yuni pe wendo ombá mele yunge ungu umbu tonjirimuma pilku yamboma ningu siringi yemando nimbendo: "Nane ene nokopa konjimbe ye te mako topo lipu mundumbu ye nomi Kirasimu\* mindili nombá." nirimu kanu mele ene nanga ungumu pilkimilimene paa sike talko teringi wendo orumu.\*\*

<sup>19</sup> "Akumunge, kinié teko kenjiringi mele pilku keri pilku konopu alowa teko, Pulu Yemo molemona wang. 'Pulu Yemone olionga ulu pulu kerime kamu mundupe kelenjipili.' ningu aku teangi. Aku tengenye kinie Ailimuni\* ene konopu pe nimbe enge nipili molonge walema sipe,

<sup>20</sup> ene molongena yuni "Ene nokopa konjimbe ye te lipu mundumbu." nimbe mako torumu ye nomi Kirasimu ene simbe. Simbe ye akumu Yesusi.

<sup>21</sup> "Pulu Yemone 'Melema pali konde pupili.' nimbé walemo wendo ombámonga kinié isili ou Yesusi yu mulu koleana nokopa molemo. Ou Pulu Yemone aku sipe nimbe panjirimu mele yunge ungu umbu tonjirimuma piliringi ye kake telimene aku siku yando ningu siringi kanumu.\*

<sup>22</sup> Akumunge Mosisini nimbendo:  
"Ailimu enenga Pulu Yemone  
ungu umbu tonjilimoma pilipu

ene nimbu silio yemo molio mele  
 pe enenga ye te na mele  
 'Pulu Yemone ungu umbu tonjimbema  
 pilipe nimbe simbe ye te molopili.' nimbe  
 mako tomba.  
 Aku ye ombámo yuni nimbé mele ene paa pilku  
 liengi.

<sup>23</sup> Aku yemonga ungumu naa pilingí yamboma  
 Pulu Yemo yunge talapena 'Naa molangi.' nimbe  
 Pulu Yemo yuni ene topa konjimbe."\*  
 nimbe Mosisini nirimu.

<sup>24</sup> "Kinié wendo okomo akumu Pulu Yemone  
 ungu umbu tonjirimuma pilku yamboma ningu  
 siringi yemane pali ungu ningu siringi mele kinié  
 wendo okomo. Ye Samuele kinie, Pulu Yemone  
 ungu umbu tonjirimuma pilipe yamboma nimbe  
 sirimu yandopa yandopa moloringi ye wemane  
 pali aku siku niringi.

<sup>25</sup> Pe kinié Pulu Yemone ungu umbu ton-  
 jirimuma pilku yamboma ningu siringi ye-  
 mane ou wendo ombá niringi unguma kinie  
 wendo okomomo 'Enenga.' nimbe wendo  
 okomo. Ou enenga anda kolepalime kinie Pulu  
 Yemone nimbe panjipe mi lerimu ungumu\* kinie  
 'Enenga.' nimbe wendo okomo. Pulu Yemo yuni  
 enenga ou pulu pulu anda kolepa Eporayamondo  
 nimbendo:

"Nuni kalko lini ye tene tembamonga  
 mana yamboma pali molko konjingí."\*\*  
 nirimu.

<sup>26</sup> Pulu Yemone yunge kendemande yemo mana  
 manie lipe mundumbendo 'Ene Juda yamboma  
 lipe taponjipili.' nimbe 'Ene Juda yamboma teko  
 kenjilimele uluma kanoko keri kanoko munduku

keleangi. Ene yu mele mele konopu alowa ten-jipili.' nimbe ene molongine yunge kendemande yemo yu ou kumbi lepa\* lipe mundumu. 'Kanu yemone ene aku sipe sewe anjipili.' nimbe Pulu Yemone aku terimu." nimbe Pitane nirimu.

## 4

<sup>1</sup> Pita Jonotolo yamboma ungu ningу sikulu molangili Pulu Yemo popo tonjiringi yema kinie, ulke tembele nokoringi ele yemanga nokoli yemo kinie, Sadusi tapu yema\* kinie, kanu Juda yambomanga ye ailime elte ungu ningу siku moloringiline oringi.

<sup>2</sup> Eltene Yesusi ono koleana lomboropa ola molorumu mele ningу sikulu yu aku terimu mele yamboma pali lomboroko ola molonge mele ningу siringili pilkulie ene mumindili koloringi.

<sup>3</sup> Enene elte ka siku, 'Kinié ipu lemu kene opali kote tenjemili.' ningу elte liku ka ulkena panjiringi.

<sup>4</sup> Nakolo ungu niringili piliringi yambomanga aisili 'Sike nikimbili. 'Yesusi yu paa sike ye nomi Kirasimu.' ningу tondolo munduku piliringi.\* Kanu kinie ou 'Sike' ningу tondolo munduku piliringi yema kinie pe tondolo munduku piliringi yema kinie lipe tere lepa pape tausini mele moloringi.

<sup>5</sup> Opalikundu ye ailime kinie tapu yema kinie Pulu Yemonga ungu manemanga puluma pilku mane siringi yema kinie\* kolea aili Jerusalleme maku toringi.

<sup>6</sup> Pulu Yemo popo tonjiringi ye aili olandopa\* ou molorumu ye Anasi kinie pe yunge kolo

wangopa aku sipe molorumu ye Kayapasitolo, elte kinie, 'Jono' nili ye te kinie, Allekesanda kinie, Anasi yunge pulu lerimu ye mare kinie, ene pea maku toringi.

<sup>7</sup> Maku tokolie niringimuni Pita Jonotolo kote tenjingindu enenga kumbikerena liku ola anjiku walsikulie ningindu: "Elte kinie nambolka engemo pelemo, molo naenga imbimunge wal-sikulie eltene kanu ulu tondolomo tengiliye?" ningu walsiringi.

<sup>8</sup> Kanu kinie Mini Kake Telimu Pitanga konopuna pupe molopa kapola terimu kinie Pitane enendo nimbendo: "Ene Juda ye ailime kinie, tapu yema kinie,

<sup>9</sup> enene olto walsikimilimu, oltone ye kimbu keri lelimu kondo kolopo lipu taponjímbulumunge walsikimili konopu lekero. Akumu nambe tepa konde pumu konopu lekolie walsikimilinje?

<sup>10</sup> Aku liemo ene kote pilkimili Isirele yema kinie enenga yamboma pali i ungumu piliei! Kolea kanga Nasarete ye Yesusi Kirasi, enene unju perana uku toko panjiringi, Pulu Yemone topa makinjirimu, kanu ye Yesusinge engemone yunge imbi lepo „Konde pui.” nímbulu kinie, i yemo konde pupe enenga kumbikerena angilkimu ene kanokomele.

<sup>11</sup> Konana te tokolie ungu iku toko niringi mele i sipe:

'Ulke takoringi yemane  
kanoko keri kanoringi toko ele teringi kou  
kanumu  
kinié kelepa ulke simu mele

ulke enge sinjili kou aili peangamo.\*  
niringi kanu koumu yu. Kanu koumu ele teringi  
yema ene Isirele yema.

<sup>12</sup> Yambo tene lupe olio manda naa lipe tapon-jimbe. Ma koleamanga pali yambo tene lupe  
'Olio lipe taponjipe mindili nolemelka aulkena  
wendo lipe, molopo konjimulú aulkena lipe  
monjipili.' nimbu imbi lepo walsimulú yambo te  
lupe molo. 'Yesusi Kirasi yuyu mindi.' nirimu.\*

<sup>13</sup> Pita Jonotolo pipili naa kolkolo unguma  
sumbi siku niringili kanoko, elte sukuli naa  
tekolo we umbu yetolo moloringili kanokolie ene  
konopu aisili liku mundukulie, 'I yetolo ou Yesusi  
pea tapu toko andoringili yetolo lepamo.' ningu  
piliringi.

<sup>14</sup> Nakolo ye konde purumu kanumu elte pea  
tapu toko angiliringi kanokolie ene ungu te  
manda pundu toko naa niringi.

<sup>15</sup> Akumunge "Elte kanjollo\* ulkena pena  
pale." niringi pena puringili kinie ene eneno  
kerepali ningulie ningindu:

<sup>16</sup> "I yetolo olio nambe teamiliye? Eltene  
'Pulu Yemo kinie tapu toko molemele mele, lipe  
ora silimo ulu tondolo\*' paa peanga te tengili  
Jerusalleme molemele yambomane pali pilku  
kanongi ulumu olione "Naa tengili." nimbu  
manda aki naa tomolo.

<sup>17</sup> Nakolo i ungu nikimbilimu koleamanga pali  
niliku pungí pilingí kinie kapola naa temba kene  
"Kelko i ye 'Yesusi, nge temanemo yamboma  
toko siku yunge ungumu koleamanga anju anju  
naa niengili!\* Níngili liemo 'Elte mongo liengili.'  
nimulú." nimbu "Molo" niemili." niringi.

**18** Aku siku ningu panjikulie, “Elte wale.” ningulie eltendo ningindu: “Paa ungu wallo kolte kepe, Yesusinge temanemo tokolo yamboma ungu mane naa siele! Molo!” niringi.\*

**19** Nakolo Pita Jonotolo eltene enendo pundu toko ningilindu: “Pulu Yemone olto “Teale.” nilimo mele mundupu kelepo, enene “Teale.” nikimili mele tembulu liemo Pulu Yemone kanopa peanga kanombanje? Ene eneno pilieme!

**20** Nakolo olto ulu kanorumbulu mele kepe pilirimbulu mele kepe oltonga keremo pipi manda naa simbulú.” niringili.

**21** Enene elte altoko tondolo munduku ningu pipili konjikulie “Elte pale.” niringi. Eltene ulu tondolo teringili mele yambomane pali kanokolie, Pulu Yemo kapi ningu imbi ambolko ola linjiringine ene kanokolie elte mongo singí aulke te koroko keleringi.

**22** „Ulu te, lipe ora sirimu ulu tondolomone teko konde liringili ye kanumu yunge ponie tu paono ombo purumu.

**23** Pita Jonotolo “Wendo pale.” niringi kinie eltenga yamboma moloringine sumbi siku pukululie, Pulu Yemo popo tonjiringi ye ailime kinie, Juda yambomanga tapu yema kinie\* kanu yemane eltendo niringi mele eltenga Yesusinge ungumu pilili yamboma temane toko siringili.

**24** Niringili mele pilkulie ene liku tere lelko molko Pulu Yemo kinie ungu ningulie ningindu: “Ye Aili Tondolo Olandopamo, nuni mulumu kepe mamo kepe nomu kusamo kepe mele lemoma pali terinu.

**25** Nuni ungu te ninindu nunge Minimuni  
olionga anda kolepa, nunge kendemande Depisi  
nimbe sirimu kinie yuni pilipe yando nimbe  
sirimu mele i sipe:

“Isirele yambo naa molko  
yambo umbu lupe molemelema  
nambemuna mumindili kolkomeleye?  
Yambomane pali uluri manda naa tengen mele  
nambemuna “Teamili.” ningu, ningu panjikim-  
iliye?

**26** Pulu Ye Ailimu kinie yuni  
‘Nanga yamboma nokopa konjimbe ye te  
lipo mundumbu.’ nimbe mako torumu  
ye nomi ‚Kirasi, mu kinie\*  
koleamanga pali ye nomi kingime  
‘Elte kinie opa teamili.’ ningu molemele.  
Yambo nokoli yemane  
‘Elte topo manie mundumulú.’ ningu molemele.  
Aku siku ulu manda naa tengen mele  
nambemuna ‘Teamili.’ ningu molemeleye?”\*\*  
nimbe Depisini nirimu.

**27** Sike i kolea ailine ye nomi kingi Erote kinie  
Romo ye Pondiasi Paillatetolo Isirele yamboma  
kinie Isirele yamboma naa molko yambo umbu  
lupe mololi yamboma\* kinie ene maku toko,  
nunge kendemande kake teli ye ou mako torunu  
ye Yesusi ‘Tamili.’ ningu wa toringi.

**28** Ou nunge tondolomone nunu konopuni pilku  
“I siku teangi.” ningu panjirinu mele aku siku  
teringi.

**29** Kanumunge Ailimu, kinié olio kinie enene  
“Temolo.” ningu olio ningu pipili konjikimili  
mele nuni pilkulie, nunge kendemandema nunge

ungumu ningindu pipili naa kolko sumbi siku niengi kene liku taponjiyo.

**30** Nunge kendemande kake teli ye Yesusinge imbi lepo yu walsimulú kinie kuru tomba yamboma ‘Konde pang.’ ningu ulu tondoloma teko, nunge kongono tekemolo mele ‘Yamboma “Sike akumu Pulu Yemonga kongono lepamo!” ningu kanangi.’ ningu lipe ora simbe ulu tondoloma tei.” niringi.

**31** Aku siku Pulu Yemo kinie ungu ningu pora siringi kinie ulke moloringimu jimi jimi mele tepe, Mini Kake Telimu ene kinie molopa kapola terimuna pipili naa kolko Pulu Yemonga ungumu tondolo munduku yamboma andoko ningu siringi.

**32** ‘Yesusi yu sike „Pulu Yemone “Lipu mundumbu.” nimbe mako torumu ye nomi Kirasimu.’, ningu tondolo munduku piliringi yamboma kapola kapola molko ene konopu teluna pupili moloringi. Yambo te yunge mele nosirimuma ‘nanga manjipe’ naa nimbe, ‘olionga pea’ ningu tere lelko nosiringi.

**33** Yesusini “Nanga kongonomo tenjipai.” nimbe lipe mundurumu yemane Aili Yesusi\* lomboropa ola molorumu kanoringi mele temane peangamo munduku naa kelko tondolo munduku toko siliku andoringi kinie Pulu Yemone ene we kondo kolopa paa sewe anjipe ‘Molko konjengi.’ nirimu.

**34** Ene moloringine yambo te langi kepe melte molo torumu yambo te naa molorumu. Walse walse nimbe yambo te ma lepa ulke aisili

angilipe terimumane ma we lepa ulke we angilirimuma kou mone liku mengo ongo,

<sup>35</sup> Yesusini lipé mundurumu yema moloringine ongo siringi, enene yambo te mele molo torumu yamboma moke teko siringi.

<sup>36</sup> Aku siku teringi mele 'Josepo' nili ye tene aku sipe terimu. Kanu yemo Yesusini lipé mundurumu yemane yunge imbi te 'Banapasi' niringi.\* Banapasinge ungu pulumu 'Yamboma nimbe toembo tonjili yemo'. Yu LLipai yemo, yunge pulu kolea Saipirasi.

<sup>37</sup> Yunge ma te lerimu kanumu kou mone lipelie memba ombo Yesusini "Nanga kongonomo tenjipai." nimbe lipé mundurumu yema sirimu.

## 5

<sup>1</sup> Kirasinge yamboma aku siku teko moloringi nakolo ulu teringi mele sumbi sipe naa terimu ye te molorumu, yunge imbimu Ananayasi. Yunge menunge imbi Sapaira. Ananayasini yunge ma te kou mone lipelie nirimumuni,

<sup>2</sup> menu kanopa molopili kou lirimumunge paki sipe, ekendo yuyu nosipe, ekendo Yesusini lipé mundurumu yema pupe sipelie nimbendo: "Nane ma te kou lipulie, aku kouma membo ombo i sikiru." nirimu.

<sup>3</sup> Kanu kinie Pitane yundu nimbendo: "Ananayasi, nambemuna nunge konopuna 'Kurumanga nomi, Setene\*' ombo molopili.' ningulie, Mini Kake Telimu kolo toko siku, mamonga kou linuma paki siku mare anju nosiku mare mengo ongo olio kolo toko sakinuye?

**4** Ou kou naa linu kinie mamo nunge kanumu. Kou linuma nunu nokonu kanumu. ‘Mamo kou mone naa liembo.’ nilinanje yambo tene unguri naa nilke. Mamo nungemo. Kou mone likulie ‘Ekendo nanu nosipu, ekendo yamboma siembo.’ nilinanje unguri molola. Mélemo nungemo. Akumunge nambolka konopu lekolie kou mone likulie ekendo mindi kolo toko sinuye? Nuni yema kolo toko naa sinu, molo. Pulu Yemo kolo toko sinu.” nirimu.

**5-6** Pitane aku sipe nirimu ungumu Ananayasi pilipelie, yu kolorumu kinie yunge onomo topa manie mundurumu. Ye kangoma ongo yunge onomo liku mulu wambalene kulupi toko mengo puku ono tepuringi. Aku sipe ulu terimu temanemo yamboma pilkulie paa mini wale munduringi.

**7** Ananayasi menu yu i ulu wendo orumumu naa pilipelie, pe ena mongo yepoko ombo purumu kinie yu orumu.

**8** Pitane yu walsipelie nimbendo: “I kou mone ombo simu ambolkoromo elte mamonga aku siku língili meleye? Na piliembo ningu si.” nirimu.

Yuni nimbendo: “Sike. Aku sipu límbulu.” nirimu.

**9** Pitane yundu nimbendo: “Nambemuna eltene Ailimunge Minimu “Kolo topo siembili.” níngiliye? Nunge emenanga onomo mengo puku ono tepúngi yema ongo kerepuluna angilimele akumane nunge onomo liku mengo pungíla.” nirimu.

<sup>10</sup> Kanu kinie walsikale ambomo Pitanga kumbikerena kolorumu kinie yunge onomo topa manie mundurumu. Kolorumu kinie ye kangoma ongo yunge onomo kanoko likulie, menu ono teringine nondoko yu mengo puku ono teringi.

<sup>11</sup> Kanu kinie Kirasinge talapena yamboma,\* i ulu wendo orumu piliringime pali kinie ene paa mini wale munduringi.

<sup>12</sup> Yamboma moloringine Yesusini “Nanga kongonomo tenjipai.” nimbe lipe mundurumu yema\* andoko ,ulu te wendo orumu, lipe ora sirimu ulu tondolo\*\* lupe lupe aisili teringi. (‘Sike.’ ningu tondolo munduku piliringi) yamboma pali ,ulke tembelena, ‘Sollomononga’ ningu ulke kerepulu takoko yando liringine ou alieli maku toringi.

<sup>13</sup> Yambo lupemane ene kanoko peanga kanoringi nakolo pipili kolkolie ‘Kirasinge yamboma kinie maku tamili.’ ningu naa oringi.

<sup>14</sup> Akumu sike nakolo yambo aisilini ‘Aili ,Yesusi, yu sike.’ ningu tondolo munduku pilkulie\* sukundu sukundu ongo yunge yamboma moloringi.

<sup>15</sup> Yesusini lipe mundurumu yemane teringi mele kanokolie yambomane yambo kuru torumuma mengo wendo ongo aulkena nosiku moloringi. ‘Pita omba pumbe kinie enana yunge minimu ene lemeleno omba aki tomba kinie konde punginje.’ ningu aku siku nosiku moloringi.

<sup>16</sup> Kolea aili Jerusalleme lerimuna nondopa lerimu koleamanga moloringi yambo aisili kuru

torumu yamboma kinie kuru keri konopuna perimu yamboma kinie mengo oringi kinie ene paliconde puringi.

<sup>17</sup> Kanu kinie Pulu Yemo popo tonjiringi ye aili olandopamo kinie Sadusi talapena sukundu ye mare\* yu pea tapu toko moloringi yema kinie ‚we yamboma ene munduku kelko Yesusini lipo mundurumu yema aku siku lombili puringi mele kanokolie, ene paa konopu keri panjiringi. ‘Aku yemane teringi mele naa teangi.’ ningulie

<sup>18</sup> Yesusini “Nanga kongonomo tenjipai.” nimbe lipo mundurumu yema ambolko liku, we yamboma panjiringi ka ulke ailinika siku panjiringi.

<sup>19</sup> Nakolo ipulueli Ailimunge angello te ombaraka ulke nambune topa ene lipo memba pena ombalie nimbendo:

<sup>20</sup> “Ene ‚Pulu Yemo popo toko kalemele, ulke tembelena puku angilku yamboma konopu alowa teko molko konjingí mele unguma pali ningusiei.” nirimu.

<sup>21</sup> Yuni nirimu mele pilku likulie kolea tangorumu kinie ulke tembelena puku yamboma ungu mane siringi.

Kanu kinie Pulu Yemo popo tonjiringi ye aili olandopamo kinie, yu pea tapu toko moloringi yema ongo, kanjolloma kinie, Isirele yambo-manga tapu yema kinie\* “Maku tamili wai.” niringi. Ongo maku tokolie ungu te ningumundukulie ningindu: “Ka ulkena panjímulupelemele yema mengo wai.” niringi.

<sup>22</sup> Nakolo enenga ele yemane puku Yesusini lipo mundurumu yema lingíndu ka ulkena

puringi kinie kanu yema naa moloringine kanokolie kelko yando ongolie ningindu:

<sup>23</sup> “Ka ulke kunema pali nambune sili pemu, nokolemele yema kerepuluna nokoko angiliengi kanomulu nakolo olio nambune topo ulke suku kanomulu kinie ye telu kepe naa molomu.” niringi.

<sup>24</sup> Ulke tembele nokoringi ele yemanga ye ailimu kinie, Pulu Yemo popo tonjiringi ye ailime\* kinie enene ongo niringi mele pilkulie, “I ulu wendo omu nambolka uluri wendo ombando tekemonje?” ningu ene pilku sunduringi.

<sup>25</sup> Kanu kinie ye te ombalie enendo nimbendo: “Pilieme! Enene ka síngi ye kanuma ulke tembelena yamboma ungu mane siku molemele.” nirimu.

<sup>26</sup> Aku nirimu pilkulie ulke tembele ele yema kinie enenga ye ailimu kinie Yesusini lipe mundurumu yema lingí puringi. Nakolo ‘Yambomane olio kouni toko konjingí.’ ningulie ene kopene naa toko taka lelko mengo oringi.

<sup>27</sup> Ye kanjolloma moloringine ele yemane Yesusini lipe mundurumu yema liku mengo oringi kinie Pulu Yemo popo tonjiringi yemanga ye aili olandopamone enendo nimbendo:

<sup>28</sup> ‘Enendo ou nirimulu mele i sipe: “Paa ungu wallo kolte kepe naa ningu, i ye ,Yesusi, nge temanemo toko\* yamboma unguma mane naa siei.’ nirimulu kanumu.\*\* Pe kinié enene Jerusalleme koleamanga pali ungu kanumu andoko ningu siku keliengi. ‘Yambomane ‘Olio Juda yambomanga tapu yemane ye kanumu toko

konjiringi.' ningu piliengi!' ningu enene i unguma mane silimelela.

<sup>29</sup> Pita kinie, Yesusini lipe mundurumu ye wema kinie, enene enendo pundu toko ningindu: "Yambomane 'Teai.' nilimele mele olio pilipu lipu manda naa temolo. Pulu Yemone 'Teai.' nilimo mele mindi pilipu lipu tengen panjipu temolo.

<sup>30</sup> Enene 'Yesusi kolopili.' ningu unjuna uku toko panjiringi\* kolorumu kanu yemo, olionga anda kolepalimenga Pulu Yemone yu kelepa topa makinjirimu.

<sup>31</sup> 'Yuni olio Isirele yamboma konopu alowa tenjipe olionga ulu pulu kerime siye kolopili.' nimbe Pulu Yemone 'Yesusi yu Ye Nomimu molopa, yamboma Lipe Taponjipe Mindili Nolemelka Aulkena Wendo Limo Yemo\* molopili.' nimbe yunge ki umbukundu lipe monjirimu molemo.

<sup>32</sup> Olio kinie Mini Kake Telimu kinie yu aku sipe terimu mele andopo nimbu silimolo. 'Mini Kake Teli' nikimulamu Pulu Yemo yunge unguma pilku liku telemele yamboma Mini Kake Telimu silimo kanumundu nikimulu." niringi.

<sup>33</sup> Niringi mele pilkulie mumindili paa aisili kolko 'Ene topo konjemili.' niringi.

<sup>34</sup> Nakolo Parisi ye\* kanjollo te, yunge imbi Gamelliele, yu Pulu Yemonga ungu manema pilipe yamboma mane sirimu ye te, yu pilipe konginjili paa perimuna yambomane kanokolie yu kali niringi ye te, yu kanjolloma maku toringine ola angilipelie ele yemando nimbendo: "Yema ou laye kolte pena mengo pai." nirimu.

**35** Kanu kinie mengo pena puringi kinie yuni kanjollo yemando nimbendo: "Ene Isirele Yema, enene i yema tenge mele ou pilku konjeyo.

**36** Ou walse ye Tudasi ombo yuni nimbendo: "Na ye aili te, na enge pelemo." nirimu kinie ye po anderete yu lombili puringi. Nakolo gapomanomone yu toko konjiku, yu lombili puringi yema toko bulu balu siringi. 'Teamili.' niringi mele kamu manie purumu.

**37** "Pe aku sipe gapomanomone yambo imbi torumu walema kinie Gallilli ye Judasi kepe "Olio-olio gapomano molamili." nirimu kinie ye mare yu lombili puringi kinie gapomanomo kinie opa teringi nakolo yu toko konjiku yu lombili puringi yema toko bulu balu siringila.

**38** Ou aku terimu kene kinié enene i yema kinie tenge mele niembo. Enene i yema kinie ulu te naa teko, we pangi keleayo. I yema ene eneno konopuni pilkulie 'Teamolo.' ningu tengi liemo uluri naa tepa we pora nimbé.

**39** Molo tekemele mele Pulu Yemone "Teai." nimuna tengi liemo ene kanjollomane akumu manda "Molo." naa ningí. Molo "Molo." níngi liemo Pulu Yemo kinie opa mele tenge kapola naa temba." nirimu.

**40** Aku nirimu kinie ene pilkulie 'Aku teamili.' ningulie "Yema altoko ulkendo wai." ningu, ene ka pulsene tokolie ningindu: "Yesusinge temanemo altoko yamboma ningu siliku naa andai." ningulie\* "Ene pai." niringi.

**41** Yesusingi lipé mundurumu yemane kanjolloma munduku kelko ulsu puringi. Pulu Yemone enendo 'Ene Yesusinge yema molongemonga

yambomane ene teko pipili konjíngi liemo manda.' nirimuna pilkulie ene paa konopu siringi.

<sup>42</sup> Walemanga pali ulke tembelena kepe yambomanga ulkemanga pali pipili naa kolko andoko temane peangamo toko siringi. Kronga ou Pulu Yemone 'Ene lipe taponjimbe ye te lipu mundumbu.' nimbe mako torumu ye Kirasimu Juda yambomane 'Opili.' ningu nokoko moloringi kanu ye Kirasimu Yesusi yu kanu yemo ombo molopa ene lipe taponjirimu lipe taponjimbe mele temanemo andoko toko siringi.\*

## 6

<sup>1</sup> Aku walemanga Yesusinge lombili andoli yambo\* kambu paa aisili olando purumu. Kanu kinie Giriki ungu niringi Juda yambomane ulu te kanoko keri kanokolie iri toko ningindu: "Ambo wayema alieli langi moke teko singíndu Ipuru ungu nilimele Juda yambomanga ambo wayema mindi siku, olionga ambo wayema naa silimele." niringi.

<sup>2</sup> Akumunge, „Yesusinge “Nanga kongonomo tenjipai.” nimbe lipe mundurumu, ye rurepone\* Yesusinge lombili andoli yamboma pali liku maku tokolie enendo ningindu: “Olio Pulu Yemonga ungu nimbu silimolo kongonomo mundupu kelepo langi kongono temolo kinie kapola naa temba.

<sup>3</sup> Angokeme, enenga ye yepoko pakara, Mini Kake Telimu kinie pilipe konginjilimu kinie pepa, yambomane kanoko peanga kanolemele yema

kanoko mako tangi. ‘Langi kongono olio temolomo enene tenjengi.’ nimbu siye kolopo,

<sup>4</sup> olio alieli Pulu Yemo kinie ungu nimbu, yamboma Pulu Yemonga ungumu ‘Piliengi!’ nimbu lipu taponjimulú.” niringi.

<sup>5</sup> Aku niringi yamboma pali pilku peanga pilkulie, Sitipene\* mako toringi. Yu Pulu Yemo ‘Sike.’ nimbe paa tondolo mundupe pilirimu yemo; yu Mini Kake Telimu konopuna pepa kapola terimu yemo. Ye pokore mako toringimenga imbime i sipe: Pillipu keme, Porokorasi keme, Naikena keme, Taimono keme, Pamensi keme, Nikollasi keme. Nikollasi kolea aili Andiyoko ye te, yu Juda ye te molo. Yu ye te lupemo molopalie, ou Juda yambomanga ulu pulu teringi mele alowa tepa terimu.\*\*

<sup>6</sup> Aku yema Yesusini lipe mundurumu yemanga kumbikerena liku ola anjiringi kinie enene yemanga pengena ambolkolie Pulu Yemo kinie ungu mare ningu mawa teringi.\*

<sup>7</sup> Aku teringi kinie yambo moloringi kolemanga pali Pulu Yemonga ungumu pupe kapola terimu. Jerusalleme yambo aisili ‘Yesusi yu sike Ye Kirasimu.’ ningu, yu lombili puku, Pulu Yemo popo tonjiringi ye aisili\* pea Yesusini lipe mundurumu yemane ungu niringi mele, ‘Sike’ ningu tondolo munduku pilku liringi.

<sup>8</sup> Sitipene, yu Pulu Yemone yamboma we kondo kololi ulu pulumu kinie Pulu Yemonga engemo kinie perimuna yambo moloringimenga andopa ,ulu te, lipe ora sirimu ulu tondolo\* aisili terimu.

<sup>9</sup> Nakolo ye marene “Teko kenjikinu. Aku siku naa tei.” ningu Sitipene kinie ungu aisili niringi. Kanu yema ene ou kendemande yamboma molkolie pe we ulsu moloringi yamboma, enenga Pulu Yemonga ungumu piliringi ulke te lupe angilirimu. Ene kolea Sairini kinie Allekesandia kinie Sillisia kinie Esia kinie moloringi yamboma molko, Juda yamboma moloringi. Aku yema Sitipene kinie kerepali niringi

<sup>10</sup> nakolo Mini Kake Telimuni Sitipene paa pilipe kongnjilimu sirimuna yuni nirimu mele pilkulie yambo tene pangá akuku ungu te manda naa niringi.

<sup>11</sup> Ungu te ningindu koroko kelkolie enene ye marendo kiyongo ningu kondi tokolie ningindu: “Enene “Mosisi kinie Pulu Yemotolonga unguma Sitipenene ungu taka tonjimu pilímulu.” niei.” niringi.

<sup>12</sup> Enene aku siku kondi toringimunge yamboma kinie Juda yambomanga tapu yema kinie Pulu Yemonga ungu manemanga puluma pilku mane siringi yema kinie\* enene mumindili kolko Sitipene ambolko liku kanjollo yema\*\* maku toko moloringine mengo puringi.

<sup>13</sup> Enene ye mare ungu umbu tonjikulie “Kotena puku Sitipene terimu mele kolo toko ‘I sipe i sipe temu.’ niei.” niringi\* kinie ene kotena pukulie ningindu: “I yemone ,Pulu Yemo popo topo kalemolo, ulke ,tembele, kakemo kinie, Pulu Yemonga ungu manema\*\* kinie, alieli ungu taka tonjilimo.

<sup>14</sup> Yuni nimu pilímulu mele i sipe: “I kolea kanga Nasarete ye Yesusini i ulke tembelemo

tekisimbe." nimbe; Mosisini nimbe panjirimu yandopa yandopa ningu siringi telemolo ulu puluma "Pe altoko naa teko akuma munduku kelko Yesusini "Teai." nirimu uluma teai." nimula." niringi.

<sup>15</sup> Kanjollo maku toko moloringimene pali Sitipene nemo nemo ningu kanoringi kinie, yunge kumbikeremo angello tengə kumbikere none terimu kanoringi.

## 7

<sup>1</sup> Kanu kinie Pulu Yemo popo tonjiringi ye aili olandopamone\* kote tenjipelie Sitipene wal-sipelie nimbendo: "I ungu nikimilime sikeye?" nirimu.

<sup>2</sup> Sitipenene pundu topa nimbendo: "Ango Tara keme, nanga ungumu pilieme. Olionga pulu pulu anda kolepa Eporayamo i kolea ou naa ombo kolea Arano ou naa pupe kolea Mesipotemia ou we molopili tondolo pupe olandopa molemo Pulu Yemo yu molorumuna ombalie nimbendo:\*

<sup>3</sup> "Nunge ma koleamo kinie pulu lemo yamboma kinie munduku kelko nane nu "Pui." nimbu lipu ora simbu koleana pani." nirimu.

<sup>4</sup> "Aku ungumu pilipelie Eporayamo yunge pulu kolea Kaltia taono mundupe kelepa kolea kanga Arano pupe molorumu. Kanu kinie yunge lapa kolorumu kinie Pulu Yemone olio i molemolo koleana yando lipe mundurumu.

<sup>5</sup> I koleana ma kanga kolte kepe 'Eporayamo yu kamu ambolopili.' nimbe naa sirimu. Nakolo Pulu Yemone ungu te yundu nimbendo: "Nu kinie nunge kalko lini yamboma kinie i koleamo

lingí.” nirimu.\* Eporayamo yu ambolango teluri kepe ou naa mepili aku sipe nirimu.

<sup>6</sup> Pulu Yemone yundu nirimu mele i sipe: “Nunge kalko lini yamboma kolea tengā lupe yambo ponenge mele molonge. Akuna molonge yambomane enendo “Olionga kendemandema.” ningulie teko kenjiku ka kongono singí, mindili nongo teko molangi ponie po anderete omba pumbe.

<sup>7</sup> Kanu kinie ene ka kongono singí yamboma mongo simbu kinie pe ene kanu koleamo munduku kelko ulsu ongo\* i koleana ongo na popo tonge.” nirimu.\*\*

<sup>8</sup> Aku nimbeline Pulu Yemone “Tembo.” nirimu unguma ‘Eporayamone ‘Na kinie kamu pepili.’ nipili.’ nimbe yu kinie yunge kalopa limbe kangoma kinie “kangi te kopisiku wendo liku ele teangi.” nirimu.\* Pulu Yemone “Aku siku teai.” nirimumunge Eporayamone kango Aisake membalie, yunge wale engaki omba purumu kinie yunge kangi te kopisipe wendo lirimu.\*\* Kanu kinie pe Aisakene Jekopo merimu.\*\*\* Pe Jekopone olio Isirele yambomanga talape rurepo molemolomanga anda kolepama merimu.\*\*\*\*

<sup>9</sup> “Kanu kinie olionga anda kolepa Jekopone merimu yema enenga angenu Josepo kinie konopu keri panjikulie kolea Isipi pungí puringi ye mare kinie yu kou mone liringi. Josepo kou mone likulie “Yu yambo tengā kendemande yemo molopili mengo pai.” niringi.\* Nakolo Pulu Yemo yu kinie molopalie nirimumuni,

<sup>10</sup> yu lipe taponjipe umbuni wendo orumumanga pali wendo lirimu. Yuni yu pilipe kong-

injilimu sipe, kolea Isipi ye nomi kingimu ‘Yu kanopa peanga kanopili.’ nirimu kinie ye nomi kingimuni ‘Josepo yu Isipi gapomano ye nomimu molopa, yunge ulkemo kinie Isipi koleamanga mele lemoma pali nokopili.’ nirimu.\*

<sup>11</sup> “Pe kolea Isipi kinie ,i kolea molemolo , kolea Kenane kinie engele aili te lerimu, yamboma umbuni perimu. Olionga anda kolepalime langi lingí aulke te naa lerimu.

<sup>12</sup> Jekopone “Kolea Isipi ga maku toko nosilimele.” niringine pilipelie yunge malopili olionga anda kolepalime pulu pulu Isipi mundurumu.\*

<sup>13</sup> Wale talo siku Isipi puringi kinie Josepone angenupilindu “Na Josepo.” nimbe yunge imbi lepa sirimu, pe kingimuni Joseponga yamboma kanopa imbi sirimu.\*

<sup>14</sup> Kanu kinie Josepone yunge lapa Jekopo kinie Jekopo yunge yamboma kinie “ ‘Yando wang.’ niei.” nimbe, enendo nimbe mundurumu. Jekopo yunge yamboma lipe tere lepa sependi pape moloringi.\*

<sup>15</sup> “Yando wai.” nirimu kinie pilipelie Jekopo kolea Isipi purumu, kanuna yu kinie yunge malopili kinie anda lelko koloringi.\*

<sup>16</sup> Enenga onoma kelko kolea Kenane mengo ongo Sekemo taono mengo ongo, ou Eporayamone kolea kanga Sekemo ye Emonga malopilinge ma te topo topa lipe ou yunge ambomo ono terimu kanuna mengo puku ene ono teringi.\*

<sup>17</sup> “Pulu Yemone ou Eporayamondo “Tembo.” nirimu kanu walemo nondopa wendo ombá

terimu kinie olionga yambo kolea Isipi moloringi mele anjupe anjupe aisili kalko liku moloringi.\*

<sup>18</sup> Aku sipe telipe pupe pupelie, ponie aisili ombla pupe Isipi ye nomi kingi te kolo wangopa molorumu kanumuni Josepo yunge temanemo mimi sipe naa pilirimu.

<sup>19</sup> Yuni olionga yamboma kolo topa sipe tepa kenjipe, anda kolepalime mindili lipe sipe, "Ambolango mengema 'Kolangi.' ningul kemanga pea naa molko pena nosei." nirimu.\*

<sup>20</sup> "Aku siku teko molangi Mosisi meringi. Yu we kango te naa meringi. Pulu Yemone kanopa peanga kanorumu kangomo meringi. Oli yepoko yunge lapanga ulkena nosiku moloringi.

<sup>21</sup> Kanu kinie pe pena nosiringi kinie ye nomi kingimunge lemenu kanopa lipe "Nanga kangomo." nimbe yunge ulkena memba pupe nokorumu.\*

<sup>22</sup> Isipi yambomanga pilipe kongnjili perimu mele pali Mosisi mane siringi kinie yu pilipe kongnjili pepa unguma sumbi sipe nimbe uluma enge nimbe tepa molorumu.

<sup>23</sup> Mosisinge ponie tu paono pora nirimu kinie yunge Isirele yamboma 'pupu kanopambo.' konopu lerimu.

<sup>24</sup> Pupe kanopurumu kinie Isipi ye tene Isirele ye te tepa kenjirimu. Kanopalie yuni Isirele yemo lipe taponjipe Isipi yemo topa konjirimu.\*

<sup>25</sup> "(Mosisini pilipelie, 'Yunge yamboma 'Pulu Yemone 'Ene liku taponjeni pui.' nirimu.' ningul pilingí.' konopu lerimu nakolo ene aku siku ningul naa piliringi.)

<sup>26</sup> “Opalikundu Isirele ye talo opa teringili kinie Mosisi pupe kanopalie, yu pupe opa teringili yetolo ambolopalie eltendo nimbendo: “Angenungulutolo, nambemuna opa tekembel-eye? Angenungulu opa tekembele kapola naa tekemo.” nirimu.

<sup>27</sup> “Kanu kinie tepa kenjirimu ye kanumuni Mosisi paka topa anju mundupelie nimbendo: “Naene nu ‘Olio nokani.’ nimbe mako tomuye?

<sup>28</sup> Bonongo nu Isipi yemo toko konjinu mele kinié na ‘Topo konjembo.’ ningu nikinuye?” nirimu.

<sup>29</sup> Aku nirimu kinie Mosisi pilipelie ‘Kingimuni na tomba.’ nimbe kowa pupelie kolea Midiane pupe molorumu. Yu akuna molopalie kango talo merimu.\*

<sup>30</sup> “Kanu kinie Mosisi kolea Midiane molopili ponie tu paono omba purumu kinie walse yu kolea ku leline andopa mulu Sainai lerimuna nondopa molorumu kinie Pulu Yemonga angello te yu molorumuna omba unju tenga tepe nomba perimuna omba molorumu.\*

<sup>31</sup> Mosisini akumu kanopalie yu konopu aisili lipe mundupe, terimu mele mimi sipe kanombando nondopa purumu kinie Ailimunge ungu te unjuna wendo orumu pilirimu mele i sipe:

<sup>32</sup> “Na nunge kolenalini popo toringi Pulu Yemo molio.\* Eporayamo keme Aisake keme Jekopo keme akumane popo toringi nokoruntu Pulu Yemo molio.” nirimu. Kanu kinie Mosisi pungu pungu nimbe pipili kolopalie lipe wekendo kanopa tepemo naa kanorumu.

<sup>33</sup> Kanu kinie Ailimuni\* yundu nimbendo: “Nu

i ma angilkinumu nanga kene nunge kimbu su  
kulku wendo li!

<sup>34</sup> Nanga yambo Isipi molemelema mindili  
nolemele mele kanopo pora sipu molio. Ene  
kola tengi pilipulie kinié ene lipu taponjimbundu  
manie ondu kene ‘Nu kolea Isipindu kelko pani.’  
nimbu lipu mundumbu tekero.” nirimu.\*

<sup>35</sup> “I ye Mosisi yu ou Isipi molorumu kinie  
Isirele yambomane ningindu: “Naene ‘Nu olio  
nokani.’ nimbe mako tomuye?” ningu yunge  
ungumu liku su siringi kanu ye Mosisi Pulu  
Yemone yu yuyu mako topa ‘Nanga yamboma  
nokoko, ene liku taponjiku mindili nolemelema  
wendo lieni.’ nimbe unjuna tepe nomba perimu-  
munge angello tenga keremone ‘Mosisi nimbe  
sipili.’ nirimu.

<sup>36</sup> Kanu ye Mosisi yuni yamboma kolea Isipi  
memba ulsu orumu. Ene kolea Isipi sukundu  
moloringi kinie kepe, Nomu Kondoline oringi  
kinie kepe, kolea ku leline ponie tu paono  
andoko moloringi kinie kepe, yuni ,yu yuyu  
molorumu mele, lipe ora sirimu ulu tondolo\*  
mare aisili terimu.\*\*

<sup>37</sup> Ye tene Isirele yambomando nimbendo:  
“Pulu Yemone ungu umbu tonjilimoma  
pilipu ene nimbu silio yemo molio mele  
pe enenga ye te na mele  
‘Pulu Yemone ungu umbu tonjimbema  
pilipe nimbe simbe ye te molopili.’ nimbe  
Pulu Yemone lipe mundumbe.”  
nirimu ye kanumu i Mosisi telumu mindi.\*  
<sup>38</sup> Isirele yamboma kolea ku leline moloringi  
kinie kanu ye Mosisi ene pea moloringi. Yu

olionga kolepalime kinie mulu Sainai molopa ungu nimbe sirimu angellomo kinie pea moloringi. Pulu Yemone we pepa mindi pupe naa pora nimbé unguma Mosisini ‘Olio nimbe sipili.’ nimbe Mosisi ungu umbu tonjirimu kanu unguma yuni pilipelie yando olio nimbe sirimu.\*

<sup>39</sup> “Aku sipe terimu nakolo olionga anda kolepalimene ‚Pulu Yemone yundu ‚Ene nokoi.’ nimbe mako torumu ye Mosinge, ungumu ‚tenge panjipu naa pilimulú.’ ningu yu bulu siku, ene ‚Kolea Isipindu kelepo pamola!’ ningu waka kolko moloringi.

<sup>40</sup> ‚Mosisi mulu Sainaíne ola pupe welea maniendo naa orumu kinie Isirele yambomane enenga ningu Pulu Yemo popo tonjiringi yemanga pulu pulu ye aili olandopa\*, Eronondo enene ningindu: ‚Olio mengo puku nokonge pulu ye popo tomolo pokore nuni unjuni molo kouni teko mimi tenjiyo. Olio kolea Isipi yando lipe memba orumu ye Mosisi welea naa okomo kene nambe temunje?’ niringi.

<sup>41</sup> Kanu walemonga enene kongi pirimu kao walo none teli te teko mimi teko, ‚Imu olionga pulu yemo.’ ningu popo toko melema kalko siku, ene eneno teko mimi teringi mele pilkulie konopu siku kongi kaloringime kinie langi nongo moloringi.\*

<sup>42</sup> Aku teringimunge Pulu Yemo ene lipe bulu sipe, oli kinie ena kinie kombukandipi kinie muluna angilimoma enene ‚Olio nokolememe pulu yamboma.’ ningu popo toko melema kalko singí teringi kinie kanopalie ‚Kapola, enenga aku siku teangi.’ nimbe siye kolorumu. Aku teringi mele

Pulu Yemone ungu umbu tonjirimuma pilku yamboma ningu siringi ye tene ungumu bokuna torumu mele kapola telemo. Akumu i sipe:

‘Pulu Yemone nimbendo: “O Isirele yamboma, ou ponie tu paono yambo naa peli kolea ku leline ene kongi pirimu kao kinie sipisipi kinie meme kinie popo toko kaloringime popo toko kalko na siringiye?

<sup>43</sup> ‘Molo..’ Ene sele ulke mengo puringimu ‘Pulu ye Mollokonga tamandu ulkemo.’ ningu mengo puku,

‘Repane olionga pulu ye te.’ ningu yunge kombukandipi none teli te teko anjiku, kanu melema ‘Olionga pulu yamboma.’ ningu kapi ningu popo toringi.

Aku teringimunge nane ene mindili lipu sim-bundu

‘Ene kolea sirinduna naa molangi.’ nimbu makoropo,

ene kolea aili Bapillono nekendo

kolea anjupe tengah lipu mundumbu.” nirimu.\* nimbe bokuna torumu. Aku sipe nimbe bokuna torumu mele ene sike aku siku teringi.

<sup>44</sup> “Kolea ku leline olionga anda kolepal-imene Pulu Yemo ene kinie molorumu sele ulke kanumu kanoko ‘Pulu Yemo olio kinie molemo.’ ningu enene yu popo toko melema kaloringi sele ulkemo takoko anjiringi. Pulu Yemone Mosisindu “I siku i siku takangi.” nimbe ulkemo angilimbe mele lipe ora sirimu aku siku enene takoko anjiringi.\*

**45** Pe yandopa Josuane olionga anda kolepalime nokorumu kinie ene kanu sele ulkemo tekisiku, Pulu Yemone sirimu koleana mengo ongo anjiringi.\* Pulu Yemone kanu koleana yambo talape lupe peringime olionga anda kolepalime "Kolo wangoko molangi, aku mamo liengi, kanuna pelemele yamboma kamu pang." nirimu kinie kanu koleana ou peringi yambo talapema enene toko munduku, sele ulkemo mengo ongo kanuna takoringi, yandopa ye nomi kingi Depisi molorumu kinie we angilirimu.

**46** "Pulu Yemone Depisi yu kanopa peanga kanopa konopu monjirimuna yuni Pulu Yemondo walsipelie nimbendo: "Na kalopa lirimu ye Jekopo popo torumu Pulu Yemo molomba ulke te, ou sele ulkemo angilirimu mele, manda lepo takonjemboye?" nirimu.\*

**47** Nakolo Pulu Yemone "Molo." nirimu kinie Depisinge malo Sollomono, yu Depisi kolo wangopa ye nomi kingimu molopalie, Pulu Yemonga ulke tembelemo takonjirimu.\*

**48** "Nakolo Imbi Paa Olandopa Mololi Pulu Yemo yambomane takolemele ulkemanga naa molemo. Pulu Yemone ungu umbu tonjirimuma yamboma nimbe sirimu ye tene aku sipe nirimu kanumu. Kanu yemone nimbendo:

**49** "Pulu Ye Ailimuni nimbendo:  
 "Mulu koleamo nanga manie molopo  
 koleama nokolio polomo,  
 ma koleamo nanga kimbu mundulio koleamo.  
 Pe enene nanga nambolka ulkemo takonjingíye?  
 Molo na tena manda koro molomboye?

50 Nanga kimuni i melema pali naa terinduye?"  
nirimu."\*  
nimbe „Aisayane, aku sipe nirimu kanumu."  
„nimbe Sitipenene nirimu.,

<sup>51</sup> "Ene karaye teli yamboma,\* enene nando  
"Pulu Yemo teko kenjiku yu ungu taka ton-  
jikinu." nikimili nakolo akumu molo. Ene  
'Pulu Yemonga yamboma molamili.' ningu  
kangi te kopisiku wendo limele\*\* nakolo yambo  
Pulu Yemonga ungu naa pilili yamboma mele  
molko enenga komuma pipi siku konopuma pipi  
siku molemele.\*\*\* Ene enenga anda kolepalime  
teringi mele teko, enene Mini Kake Telimunge  
ungumu liku bulu siku "Naa pilimulú." niringi  
mele ene aku siku nilimele.

<sup>52</sup> Pulu Yemone ungu umbu tonjirimuma pilku  
yamboma ningu siringi ye te enenga anda  
kolepalimene mindili liku naa siringi ye te molo-  
rumuye? Te naa molorumu kanumu. Kanu ye-  
mane Pulu Yemonga Ye Sumbi Nilimu ombá mele  
ningu siringime kepe enenga anda kolepalimene  
toko konjiringila. Kanu kinie Pulu Yemone ungu  
umbu tonjirimuma pilku yamboma ningu siringi  
yemane "Ombá." niringi ye kanumu kamu  
orumu kinie ene nanga ungumu pilku molemele  
yemane 'Yu toko konjengi.' ningu opa touma  
liku siringi kinie yu toko konjiringi.

<sup>53</sup> Ene Isirele yamboma, ene angellomane Pulu  
Yemonga ungu manema\* siringi yando likulie  
tenge panjiku naa teringi yamboma, enene Pulu  
Yemonga Ye Kake Teli Yesusi aku siku toko  
konjiringi." nimbe Sitipenene nirimu.

<sup>54</sup> Yuni enendo aku sipe nirimu pilkulie,

yu kinie paa mumindili kolko enenga kerema kongilku pulue toringi.

<sup>55</sup> Nakolo Mini Kake Telimu Sitipene yunge konopuna ombo molopa kapola terimuna yuni olando sipe kanopa mulu koleana sukundu kanorumu kinie Pulu Yemonga tondolo pa telimu kinie yunge tondolomo kinie akuma kanopa, Yesusi Pulu Yemonga ki umbukundu ola angilirimu kanorumu.\*

<sup>56</sup> Aku sipe kanopalie nimbendo: “Mulu koleamo kune lipe anju yando pukumu kanokoro kinie Manie Ombo Mana Ye Au Lerimu Yemo\* Pulu Yemonga ki umbukundu ola angilkimu kanokoro.” nirimu.

<sup>57</sup> Yuni aku sipe Pulu Yemo kinie Yesusi kinie kapola kapola moloringili mele nirimu pilkulie, “Pulu Yemo kinie ungu taka tonjikimu lepamo.” ningu ‘Yunge ungu nikimumu naa piliemili.’ ningu komu pipi siku ene ungu lupe mare tondolo munduku niliku yu molorumuna lkisiku ongo

<sup>58</sup> yu ambolko kunduku kanu kolea ailimunge palana ulsu munduku, yu kouni tonge toringi. Ou kotena “I sipe i sipe temu kanomulu.” ningu kondi toringi yemane yu kouni tongendo enenga wale pakolime kulkulie, ye kango te kanopa angilirimuna ‘Nokopili.’ ningu nosiringi. Kanu yemonga imbimu Sollo.\*

<sup>59</sup> Enene yu kouni toko konjingí toringi kinie Sitipenene Yesusi kinie ungu nimbendo: “Aili Yesusi, na mini pukuru. Nu molenona wambo ni.” nirimu.

<sup>60</sup> Kanu kinie yu kouni toko manie munduringi

kinie koporongo langopa ru nimbeline nimbendo: "Ailimu,\* i teko kenjikimili ulumu pundu naa toko munduku kelei." nimbeline yu kolorumu.

## 8

<sup>1</sup> Sollone Sitipene toko konjiringi kanopalie 'Papu tokomele.' nimbe yu konopu peanga lerimu.

Sitipene kouni toko konjiringi kanu walemonga Kirasinge yambo talape kolea aili Jerusalleme moloringime\* enenga opa toumane pulu monjiku teko kenjiku paa mindili aili teko siringi kinie ene pali bulu balu ningu puku, mare kolea Judia disirikindu puku molko, mare kolea Sameria disirikindu puku moloringi. Yesusingini "Nanga kongonomo tenjipai." nimbe lipe mundurumu yema mindi Jerusalleme we moloringi.

<sup>2</sup> Pulu Yemonga ungumu pilku moloringi ye marene Sitipene ono teko kola aisili teringi.

<sup>3</sup> Nakolo Sollone 'Kirasinge yambo talapemo kamu manie pang.' nimbe pulu monjipe yambomanga ulkemanga pupe, yambo moloringime ki kundupe lipe memba pupe ka sirimu.

<sup>4</sup> Kirasinge yambo bulu balu ningu puring-imene Yesusinge temanemo kolea lupe lupe-manga pali toko siliku puringi.

<sup>5</sup> Kirasinge yambomanga lipe taponjili kusikusi ye Pillipu\* Sameria disiriki lerimu taono tenga maniendo pupelie nirimumuni, Pulu Yemone "Ene nokopa konjimbe ye te lipu mundumbu." ou nimbe mako torumu ye nomi Kirasimunge\*\* temanemo topa sirimu.

**6** Pillipu yuni ungu nirimu mele pilku, „Pulu Yemo kinie tapu toko moloringili, lipe ora sirimu ulu tondoloma\* terimu kanokolie, yamboma pali komu tenjiku pilku moloringi.

**7** Yambo aisili kuru konopuna moloringime Pillipuni “Ongo ulsu pai!” nirimu kinie ru ningu wendo ongo puringi. Kimbu kolopa pora sirimu yamboma kinie, kimbu pange tepe karaye tepe perimu yamboma kinie tepe konde lirimu.

**8** Pillipuni aku sipe ulu tondoloma terimuna aku taonona moloringi yamboma konopu aili teko siringi.

**9** Kanu taonona ye te molorumu, yemonga imbimu Saimono. Pillipu ou naa opili kurumane Saimono yu liku taponjiringi kinie yuni “Na ye ailimu. Na imbi molemo.” nimbe ulu tondoloma terimu. Kolea Sameria yambomane pali ulu tondoloma terimu mele kanokolie konopu aisili liku munduringi.

**10** Yambo kamakoma kinie koropama kinie yunge ungumu komu tenjiku pilkulie ningindu: “I yemo Pulu Yemo tondolo pelemo mele yu tondolo aku sipe pelemo yemo. Yu Tondolo Pelemo Pulu Yemo molemo.” niringi.

**11** Saimono aliei ulu tondolo aisili terimuna kanoko konopu aisili liku mundukulie yunge ungumu pilku yu lombili puringi.

**12** Nakolo Pillipuni Pulu Yemo ye nomi kingimu molopa melema nokolemo nokomba\* mele temane peangamo topa sipe, Yesusi yu yamboma lipe taponjipe kolo wangopa mindili norumu yemo molopa, yu Pulu Yemone ‘Lipu mundumbu.’ nimbe mako torumu ye nomi

Kirasimu molorumu mele\*\* nimbe sirimu kinie yambo aisilini 'Sike nikimu.' ningu tondolo munduku pilkulie\*\*\* ,Saimono munduku kelko konopu alowa teko, no liringi.

<sup>13</sup> Saimono kepe Pillipuni nirimu mele 'Sike nikimu.' nimbe tondolo mundupe pilipelie no lirimu. Lipelie Pillipu molorumuna lombili pupe, Pillipuni ,Pulu Yemo kinie tapu toko moloringili, lipe ora sirimu ulu tondolo aisili terimu mele kanopalie konopu aisili lipe mundurumu.

<sup>14</sup> Kanu kinie kolea Sameria disiriki yambomane Pulu Yemonga ungumu konopu siku pilku liringi mele Yesusini "Nanga kongonomo tenjipai." nimbe lipe mundurumu ye kolea aili Jerusalleme moloringi yemane pilkulie niringimuni, enenga ye Pita kinie Jonotolondo "Sameria yamboma liku taponjengili pale." ningu elte liku munduringi.

<sup>15-16</sup> Akuna pukululie niringilimuni, Sameria yamboma moloringine Mini Kake Telimu ou naa orumuna kanu liku munduringi yetolone 'Ene Mini Kake Telimu liengi.' ningululie, 'enenga' ningu Pulu Yemo mawa tenjiringili. Ou Aili Yesusinge imbi lelko\* no mindi liringi.

<sup>17</sup> Kanu kinie pe Pita kinie Jonotolo pukulu enenga pengena amboloringili kinie ene Mini Kake Telimu liringila.

<sup>18</sup> Kanu kinie eltene yambomanga pengena amboloringili kinie ene Mini Kake Telimu liringi mele Saimonone kanopalie yu elte moloringiline kou mone memba ombalie eltendo nimbendo:

<sup>19</sup> " 'Nane yambo tengə pengena ambolombo kinie Mini Kake Telimu lipili.' ningulu eltene i

tekembele tondolomo 'na siengili.' nimbu kou mone membo okoro." nirimu.

<sup>20</sup> Nakolo Pitane pundu topa nimbendo: "Nuni 'Pulu Yemone we silimo melte kou monene manda topo toko limele.' konopu lekenomonga nunge kou monema mengo kolea kerine pani.

<sup>21</sup> Pulu Yemone kanopa peanga kanolemo mele nu aku sipe molo, akumunge i kongono telembole mele nunge kongono te paa molo.

<sup>22-23</sup> Nuni olto telembole mele kanoko kumu panjilinomonga nu molko kenjiku, ulu pulu kerimene nu ka silimo kene 'I konopu lekero mele Ailimuni 'Manie pupili.' nimbe siye kolombanje.' ningu, kinié aku teko kenjilino ulu puluma kanoko keri kanoko konopu alowa teko, yu kinie ungu ningu mawa teami." nirimu.

<sup>24</sup> Aku nirimu pilipelie Saimonone pundu topa nimbendo: "Na kinie wendo ombá nikimbili uluma wendo naa opili kene eltene na liku taponjiku Ailimu\* kinie ungu ningu mawa tengjili." nirimu.

<sup>25</sup> Pita kinie Jonotolone Yesusi kinie molkolo kanoringili mele ningu sikulu, Ailimunge ungumu ningu sikululie, elte kelko Jerusalleme puringili. Pungilí pukulie kolea Sameria\* disiriki sukundu taono lerimumanga temane peangamo toko siliku puringili.

<sup>26</sup> Pulu Ye Ailimunge angello tene Pillipundi nimbendo: "Jerusalleme munduku kelko Gasa taono pungí pulimele aulke akuna kolea ku leline pani pui." nirimu.

<sup>27</sup> Kanu kinie Pillipu akuna purumu. Pupe kanorumu kinie Itiopia ye te aulkena om̄ba

purumu kanorumu. Kanu yemo yu ambo Kandas, kolea Itiopia yambomanga Ambo Nomi Kunimunge kou mone nokonjirimu ye ailimu. Pillipuni yu aulkena ou naa kanopa lipili yu Pulu Yemo popo topa imbi ambolopa ola linjimbendo ou Jerusalleme purumu.

<sup>28</sup> Pe kelepa ulkendo pumbendo kongi otene kundurumu karona ola molopa Pulu Yemone ungu umbu tonjirimuma pilipe yamboma nimbe sirimu ye\* Aisayane torumu bokumu kanolipe ulkendo pumbe purumu.

<sup>29</sup> Kanu kinie Mini Kake Telimuni Pillipundi nimbendo: “Nu puku kongi otene karo kundupe memba ombo pukumumu lombili pui.” nirimu.

<sup>30</sup> Kanu kinie Pillipu karo ombo purumuna lkisiipe pupe pilirimu kinie ye karona molorumu kanumu yu Pulu Yemone ungu umbu tonjirimuma pilipe yamboma nimbe sirimu ye Aisayane torumu bokumu kanopa nilipe purumu pilipelie, walsipelie nimbendo: “Nu bokuna ungu kanoko ninkununge ungu pulumu pilkinu molo moye?” nirimu.

<sup>31</sup> Ye kanumuni pundu topa nimbendo: “Yambo tene na nimbe naa simbe kinie na nanu nambe tepo pilimbuye?” nirimu.

Aku nimbeline Pillipundi nimbendo: “Nu karona tapu topo molambili oi.” nirimu.

<sup>32</sup> Pulu Yemonga ungumu yemone kanorumu mele i sipe:

“Kongi sipisipi waloma mengo puku tolemele  
mele  
yu aku siku mengo puku toringi.\* Aku kinie  
kongi sipisipi indi porongendo ambolemele kinie

ungu naa nimbe we tenjipe lemo mele  
 yu tonge teringi kinie  
 aku sipe ungu naa nimbe molorumu.  
 33 Yu ulu te tepa naa kenjirimu nakolo  
 kote we tenjiku ka sikulie toko konjiringi.  
 Yu ambolango te naa mepili yu toringimunge  
 yunge kalopa lirimu yambo talape te naa  
 molemo.”\*  
 nimbe, bokuna aku sipe molorumu ungumu  
 kanorumu.

34 Itiopia yemone Pillipu walsipelie nimbendo:  
 “I bokumu torumu yemone naendo i ungumu  
 nirimuye? Yu yuyundu nirimu molo yambo te  
 lupendo nirimuye?” nimbe walsirimu.

35 Kanu kinie Pillipuni kanu yemondo unguma  
 nimbendo yemone kanorumu ungumanga pu-  
 lumu pulu monjipe nimbe sipe Yesusinge temane  
 peangamo topa sirimu.

36 Aulkena pungili pukulu no kélo tengá  
 purgingili kinie Itiopia yemone Pillipundi nimbendo:  
 “I no omba pukumumu kana. Meltene  
 na no limbu aulkemo manda pipi simbe molo no  
 manda limbuye?” nirimu.

37 (Pillipuni pundu topa nimbendo: “Yesusinge  
 ungu nimbu sikirumu ‘Akumu sike lemo.’ ningú  
 tondolo munduku pilinu liemo no manda lini.”  
 nirimu.

Itiopia yemone pundu topa nimbendo:  
 “‘Yesusi Kirasi yu sike Pulu Yemonga Malo.’  
 nimbu pilkiru.”\* nirimu.\*\*)\*\*

38 Kanu kinie karo kanumu ‘Lepili.’ nimbe  
 Pillipu kinie elte pukue tokolo nona manie puku-  
 lulie Pillipuni Itiopia ye kanumu no linjirimu.

**39** Nomo munduku kelkolo wendo oringili kinie Ailimunge Minimuni Pillipu walsikale lipé memba purumu kinie nema terimuna Itiopia yemone yu altopa naa kanopa, konopu silipe yunge ulkendo purumu.

**40** Minimuni Pillipu memba pupe Asitote taonona monjirimu kinie yu akuna molopalie koleamanga pali temane peangamo topa silipe andopa kolea aili Sisaria wendo purumu.

## 9

**1** Sollo ou pulu monjiye Ailimunge lombili andoli yamboma mindili lipé sirimu mele\* mundupe naa kelepa, 'Ene kolangi.' nimbe we mindili lipé sipe molorumu. Aku sipe tepe molombando Pulu Yemo popo tonjiringi ye aili olandopamo\*\* molorumuna pupe

**2** mawa tepe walsirimu kinie ye nomimuni pepá te topa sipelie nimbendo: "I ye Sollo kolea aili Damasikasi pupe, Juda yamboma maku toko Pulu Yemonga ungumu pilimele ulkemanga pupe, Yesusini terimu mele pilku molemele yamboma kanopa ka sipe, Jerusalleme yando memba opili." nirimu.

**3** Kanu kinie Sollo yu kolea aili Damasikasi nondopa pumbe purumu kinie walsikale mulú koleana pa teli te manie ombo yu molorumuna pa aili tepe terimu.

**4** Yu topa manie mundurumu\* lepa pilirimu kinie ungu te yundu nimbendo: "Sollo, Sollo, nambemuna nuni na mindili liku silinoye?" nirimu.

Lipe Mundurumu Yema 9:5

liv

Lipe Mundurumu Yema 9:12

**5** Sollone nimbendo: “Ailimu,\* nu naeye?” nirimu.

Yuni pundu topa nimbendo: “Na Yesusi nuni mindili liku silino yemo.”\*\*

**6** Kinié ola molko ne kolea ailine sukundu pani. Akuna puni kinie nu teni mele ye tene nimbe simbe.” nirimu.

**7** Sollo pea puringi yema poporome ungu mele pilku yambo te naa kanokolie, ene ungu naa ningu we angiliringi.

**8** Sollo mongo makilipe ola molorumu nakolo mongone melte naa kanorumu. Akumunge yu pea puringi yemane yu ki ambolko mengo kolea aili Damasikasi sukundu puringi.

**9** Wale yepoko yu mongone melte naa kanopa langi kepe no kepe naa nomba we molorumu.

**10** Kolea aili Damasikasi sukundu Yesusinge lombili andoli ye te molorumu,\* yunge imbimu Ananayasi. Ailimuni Ananayasi molorumuna ombo kumbu mele sipelie “Ananayasi.” nimbe walsirimu.

Yuni pundu topalie nimbendo: “Ailimu, na ya molio.” nirimu.

**11** Ailimuni yundu nimbendo: “Aulke imbi lelko ‘Aulke Sumbi Nilimu’ nilimele kanuna nu pukulie ninimuni, Judasinge ulkena puku walsiku, kolea aili Tasisi ye te, yemonga imbi Sollo, yu akuna na kinie ungu nimbe molemo kene puku kanani.

**12** Sollo yu kumbu mele tepa kanomu kinie ye te, yemonga imbimu Ananayasi, yu ombo yunge

kimuni mongona ambolomu kinie yunge mongotolo peanga lemu kanomu.” nimbe Ailimuni nirimu.

<sup>13</sup> Ananayasini pundu topa nimbendo: “Ailimu, ye kanumuni nunge yambo kake teli\* Jerusalleme moloringime tepa kenjipe mindili lipe sirimu mele yambo aisilini temane toko nilimele pilio.

<sup>14</sup> Pulu Yemo popo tonjiringi ye ailimene yu pepá toko siringi lipe memba ombalie, nunge imbi lelko nu kinie ungu nilimele yamboma ka simbendo orumu.” nirimu.

<sup>15</sup> Nakolo Ailimuni yundu nimbendo: “Molo. Ye nikiru akumu ‘Yu nanga kongono tenjipili.’ nimbu mako torundu yemo. Yu nanga ungumu Isirele yamboma naa molko umbu lupe mololi yamboma\* kinie enenga ye nomi kingime kinie molongemanga kepe Isirele yambo\*\* molongemanga kepe pupe nanga ungumu nimbe simbe kene nikiru mele tepani.

<sup>16</sup> Yuni nanga ungumu andopa nimbe sipelie umbuni memba mindili nombá mele nane lipu ora simbu.” nirimu.

<sup>17</sup> Kanu kinie Ananayasi pupe ulke nirimu kanuna sukundu pupe Sollo ambolopalie nimbendo: “Ano Sollo, nu aulkena oni orunu kinie Ailimu nuni kanorunu, kanu ye Yesusini ‘Nu mongone altoko kanoko Mini Kake Telimu nunge konopuna ombo molopa kapola tepili.’ nimbe na “Pui.” nimuna okoro.” nirimu.

<sup>18</sup> Kanu kinie tamburembu yunge mongotolonga melte pipi sirimu kanumu ombo wendo purumu kinie yu kelepa mongone melema

manda kanopalie nirimumuni, yu ola molopa 'Kirasinge yemo kamu molambo.' nimbe no lirimu.

<sup>19</sup> Aku tepalie, langi pokore norumu kinie yu kelepa enge perimu.

Sollo yu wale mare kolea aili Damasikasi molopa Yesusinge lombili andoli yamboma kinie molorumu.

<sup>20</sup> Yu sumbi sipe pupe Juda yamboma maku toko Pulu Yemonga ungumu piliringi ulkemanga pupe Yesusi molorumu mele nimbe sipelie nim-bendo: "I yemo Pulu Yemonga Malo."\* nirimu.

<sup>21</sup> Yunge ungu piliringi yambomane mini wale mundukulie walsiku pilkulie ningindu: "Ne aku nikimu yemo, Yesusinge imbimu lelko Pulu Yemo kinie ungu niringi yambo Jerusalleme moloringime tepa kenjipe topa bulu balu sipe mundupe mindili lipe sirimu ye kanumu moloye? Pe kinié ya omba aku siku teko molemele yamboma ka sipe Pulu Yemo popo tonjiringi ye ailime\* molemelena memba pumbe yemo imu lepamo." niringi.

<sup>22</sup> Nakolo Sollo yunge engemo paa olandopa perimu, Pulu Yemone 'Ene nokopa konjimbe ye te lipu mundumbu.' nimbe mako torumu ye nomi Kirasimu\* Yesusi yu kanu yemo molorumu mele tondolo mundupe nimbe sirimuna Juda yambomane yundu ungu te pundu toko manda naa niringi.

<sup>23</sup> Wale aisili omba purumu kinie Juda yambomane Sollo tongendo langi niringi,

<sup>24</sup> nakolo yu pilirimu. Yu tongendo tangoli kepe ipulueli kepe pala kerepulumanga nokoko moloringi.

<sup>25</sup> Nakolo walse ipulueli yu lombili puringi yambomane ‘Yu naa tangi.’ ningu mengo puku, kou palana ola mengo puku wale basiketena lakilku ka moko toko ,kolea aili Damasikasi, ulsu munduringi.\*

<sup>26</sup> Sollo ,Damasikasi mundupe kelepa pupe, kolea aili Jerusalleme ombalie nirimumuni, Yesusinge lombili andoli yamboma kinie pea molomba terimu nakolo enene ‘Yuni lipe lou sipelie we nikimu. Yu paa sike Yesusinge ungumu pilili ye te molo.’ ningu pilkulie yu pipili koloringi.

<sup>27</sup> Nakolo Banapasini\* yu lipe Yesusini “Nanga kongonomo tenjipai.” nimbe lipe mundurumu yema\*\* moloringine memba pupelie enendo nimbendo: “I yemo aulkena pupe Ailimu kanorumu, Ailimuni yundu ungu te nirimu kinie yu kolea aili Damasikasi pupe “Yesusinge ungumu nikiru.” nimbe pipili naa kolopa unguma nimbe sirimu.” nimbe aku sipe mele nirimu.

<sup>28</sup> Aku nirimumunge Sollo yu ene kinie pea molopa, Jerusalleme we andopa molopa, “Ailimunge ungumu nikiru.” nimbe\* pipili naa kolopa andopa nimbe sirimu.

<sup>29</sup> Yu kinie Giriki ungu niringi Juda yamboma kinie kerepali niringi nakolo enene yu toko konjingí teringi.

<sup>30</sup> Tonge teringi mele ,Yesusi pilku moloringi, angenupilimene pilkulie, yu kolea aili Sisaria maniendo mengo pukulie “Kolea aili Tasisi pui.”

ningu munduringi.\*

**31** Kanu kinie Sollone yamboma tepe kenjirimu mele mundupe kelerimu kinie Judia kinie Gallilli kinie Sameria\* kinie kanu disirikimenga Kirasinge yambo talapemo kinie\*\* umbuni te wendo naa orumu, molko konjiringi. Ailimu pipili kolko 'Yunge ungumu pilipu lipu teamili.' ningu moloringine Mini Kake Telimuni ene lipe taponjirimu kinie yunge talapemo enge nimbe yambo aisili yunge talapena sukundu sukundu purungi.

**32** Pita koleamanga pali andopalie, walse LLida taono ‚Pulu Yemonga, yambo kake teli moloringime\* pupe kanopurumu.

**33** Akuna ye te molorumumunge imbimu Iniasi, yu kimbu ki kolopa pora sirimuna ponie engaki aniembo lerimu.

**34** Pitane yuntu nimbendo: "Iniasi, Yesusi Kirasini 'Nuconde pani.' nikimu kene nu ola molko nunge aniembo leno kunungumu kimbú." nirimu. Aku nirimu kinie tamburembu yu ola molorumu.

**35** LLida taono yamboma kinie Sarone taono yamboma kinie pali yu kanokolie konopu alowa teko Ailimunge ungumu pilku moloringi.

**36** Jopa taono Ailimunge lombili andoli ambo te molorumu, yunge imbimu Tapita, (Giriki Unguna "Dokasi" niringi). Yu alieli siye naa kolopa, umbuni perimu yamboma kondo kolopa koropama lipe taponjirimu.

**37** Pita LLida taono molorumu kanu walemanga kanu ambomo kuru torumu kinie yu

kolorumu, yunge onomo no lenjiku suluminia tenga nosiringi.

<sup>38</sup> LLida taono lerimuna Jopa taono nondopa lerimu. Akumunge Ailimunge lombili andoli yambomane Pita LLida taonona molorumu pilkulie enene ye talo yu molorumuna liku munduringi kinie elte ongo yu paa mawa tekololie ningilindu: "Nu 'Pea pamili.' nimbu, limbulú okombolo." niringili.

<sup>39</sup> Pita elte kinie pea pupe yu ulkena purumu kinie enene yu ulke suluminiana mengo puringi. Ambo wayema Pita angilirimuna nondoko ongo makaye teko angilku kola tekolie, Dokasi yuniconde molopalie enenga mulu wambale tenjirimuma ongo liku ora siringi.

<sup>40</sup> Pitane "Ene suluminiana naa molko, ulsu pai." nimbelie, koporongo langopa manie molopa Pulu Yemo kinie ungu nirimu. Aku tepalie ambo onomo lerimuna topele topa kanopalie nimbendo: "Tapita, nu ola moloi." nirimu. Kanu kinie mongo makilipelie Pita kanopa imbi sipelie ola molorumu.

<sup>41</sup> Pitane yu ki ambolopa lipe ola anjipelie, 'Pulu Yemonga, yambo kake telime kinie ambo wayema pea walsipelie "Dokasi konde pumu kene ongo liei." nirimu.

<sup>42</sup> I ulu wendo orumumu Jopa taono yamboma pali pilkulie, yambo aisilini 'Aili Yesusi, yu sike 'Pulu Yemone "Ene nokopa konjimbe ye te lipu mundumbu." nimbe mako torumu ye nomi Kirasimu.' ningu tondolo munduku piliringi.\*

<sup>43</sup> Pita wale aisili Jopa ye te kinie molorumu. Yemonga imbimu Saimono, yu kongi kao kangi

tepa mimi tepa kou lirimu yemo.

## 10

<sup>1</sup> Romo ye te kolea aili Sisaria molorumu-munge imbimu Konilliasi. Yu Romo ami ye wane anderete nokorumu yemo. Aku ami yemanga talapemonga imbimu Italli Ami Ye Talapemo.

<sup>2</sup> Yu kinie yunge pulu lemo yamboma kinie ene Juda yamboma molo. Yambo lupema molkolie Pulu Yemo pipili kolko liku ai siku yunge ungumu piliringi yamboma moloringi. Yuni mele molo torumu yamboma lipe taponjiye kou mone sipe, alieli Pulu Yemo kinie ungu nirimu.

<sup>3</sup> Walse ipupini ena tere killoko mele Konilliasi yu Pulu Yemo kinie ungu nimbe molopalie\* kumbu mele tepe kanorumu. Pulu Yemonga angello te omba yu molorumuna orumu sumbi sipe kanorumu. Angellomone yundu nimbendo: "Konilliasi." nirimu.

<sup>4</sup> Konilliasi pungu pungu nimbe yu nemo nemo nimbe kanopalie walsipe nimbendo: "Ailimu, nambe temuye?" nirimu.

Angellomone pundu topa nimbendo: "Nuni Pulu Yemo kinie ungu ningu, yambo koropama liku taponjiku, telenomonga Pulu Yemone kanopa peanga kanolemo.

<sup>5</sup> Kinié nuni ye mare Jopa taonondo pangí liku mundukulie, akuna ye te molemomonga imbimu Saimono, yunge imbi te Pita, "Yu opili." niengi.

<sup>6</sup> Saimono Pita yu pelemo ulke pulu yemonga imbimu Saimonola nilimele. Yu kongi kao kilu tepe mimi tepe kou mone limo yemo, yunge ulkemo nomu kusa kélona angilimo." nirimu.

<sup>7</sup> Angello kanumuni aku sipe nimbeline yu purumu. Kanu kinie Konilliasini yunge kemande ye talo kinie, yu lipe taponjirimu ami ye te kinie "Ene wai." nirimu. Kanu ami yemo yu Pulu Yemonga ungumu pilirimu yemola.

<sup>8</sup> Konilliasini enendo ulu wendo orumu mele pali nimbe sipelie, "Ene Pita liku mengo wangí Jopa taonondo pai." nimbe lipe mundurumu.

<sup>9</sup> Ene puku aulkena pekolie, opalikundu anjupe puku ai tangoli Jopa taono nondoko pungí puringi. Ai tangoli Pita Pulu Yemo kinie ungu nimbendo ulke imuna ola purumu.

<sup>10</sup> Kanu kinie Pita engelene kolopa 'Langi te namboa!' nimbe pilirimu. Yamboma langi kokele kaloringine nokopa molopalie, yu kumbu mele tepa kanorumu kinie,

<sup>11</sup> mulúna anju yando pupe, múlu wambale paa aili te, ekendo ekendo pundu kisenga ambopalie taka lepa mana manie mundurumu.

<sup>12</sup> Aku mulu wambalena suku kongi lopa kera wambiye mele takarama pali moloringi.

<sup>13</sup> Kanu kinie ungu te ombalie yundu nimbendo: "Pita, ola molko i mele molemelemanga te toko noi." nirimu.

<sup>14</sup> Pitane pundu topa nimbendo: "Ailimu,\* paa naa nombo! Nuni kanoko keri kanoleno melema kinie, "kalaro molemo." nilino melema kinie, olio Juda yambomando "Naa nangi." ningun ungu mane sirinu melema na naa nolio naa nombó, molo!" nirimu.\*\*

<sup>15</sup> Wale talo sipe kanu ungumu altopa wendo omba yundu nimbendo: "Pulu Yemone kake

tenjilimo melemando nuni “Kalaro molemo.” ni naa ni.” nirimu.

**16** Elte aku siku wale yepoko kere pale niringili kinie walsikale mulu wambalemo kelepa mulúna olando purumu.

**17** Pita konopu kimbu sipelie ‘I kumbu mele tepo kanokoromonga pulumu nambolkarenje?’ nimbe pilipe molopili Konilliasini lipe mundurumu ye kanuma ongo yambo marendo ‘Saimononga ulkemo temoye?’ ningu walsiliku ongolie, yunge ulke kerepuluna ongo angiliringi.

**18** Akuna angilku walsikulie, “Saimono Pita andi molemoye?” niringi.

**19** Pita yu kumbu mele terimumunge ‘Pulumu nambolkarenje?’ nimbe konopu kimbu sipe molorumu kinie Minimuni yundu nimbendo: “Ye yepoko nu koroko okomele.

**20** Akumunge nu ola molko maniendo puku, konopu aisili liku naa munduku ene kinie pangipuyo. Nane yema lipu mundunduna okomele.” nirimu.

**21** Pita maniendo pupe yemando nimbendo: “Ene korokomele yemo na. Ene nambemuna ongiye?” nirimu.

**22** Yemane pundu toko ningindu: “Romo ami ye wane anderete nokolemo ye Konilliasini olio lipe mundumuna ómulu. Konilliasi yu ye sumbi nilimu, yu Pulu Yemo pipili kolemo yemo. Juda yambomane pali “Yu ye peangamo.” nilimele. Pulu Yemonga angello tene yundu nimbendo: “Saimono Pita ungu te nipili nu pilieni kene ‘Yu opili.’ ni.” nirimu.” niringi.

<sup>23</sup> Pitane nimbendo: “Ene pea peamili, ulkendo wai.” nirimu.

Pekolie niringimuni, ipulueli ou yu ene kinie purumu kinie ‚Yesusi pilku moloringi, Jopa taono Juda ye mare yu kinie pea tapu toko puringi.

<sup>24</sup> Ene puku aulkena pekolie, ipulueli ou kolea aili Sisaria suku puringi. Konilliasini ‘Kinié onge.’ nimbe yunge angenupili lapali kinie pulu lerimu yamboma kinie “Sukundu sukundu wai.” nirimu, ene liku maku toko nokoko moloringi.

<sup>25</sup> Pita ulkena sukundu pumbe purumu kinie Konilliasi omba yunge kimbuna tamalu pepa yunge imbi ambolopa ola linjipe kapi nirimu.

<sup>26</sup> Nakolo Pitane yundu nimbendo: “Na Pulu Yemo molo. Na we yemo. Nu ola moloi.” nirimu.

<sup>27</sup> Ungu nilikulu ulke sukundu puringili kinie yambo aisili maku toko moloringi kanorumu.

<sup>28</sup> Yuni enendo nimbendo: “‘Juda yamboma kinie yambo lupema kinie teluna naa molangi.’ nilimele ungu manemo ene pilkimili. Na Juda yemo molopo i ungu manemo piliomonga ene yambo lupe molemelena na naa olka, nakolo Pulu Yemone na lipe ora simu mele i sipe: Yuni nando nimbendo: “Yamboma apuruku ‘Te keri, kalaro mololimu.’ ningu teluna naa moloni kinie kapola naa temba.” nimu.\*

<sup>29</sup> Akumunge na ‘Oi.’ ningu walsíngi kinie enenga ungu lipu su naa sipu ondu. Nambe-muna nando “Oi.” níngiye?” nirimu.

<sup>30</sup> Konilliasini pundu topa nimbendo: “Wale kise omba pukumu, kinié ena tere killoko tekemo mele, ou aku sipe ipupini tere killokona i

nanga ulkena na Pulu Yemo kinie ungu nimbu molorundu kinie walsikale nanga kumbikerena yambo te mulu wambale tondolo pa telimu pakopa ombo angilipelie

<sup>31</sup> nimbendo: "Konilliasi, nuni Pulu Yemo kinie ungu nilino mele yuni pilipe lipe, yambo koropama liku taponjilino mele kanopa peanga kanolemo.

<sup>32</sup> Kinié nuni ye mare Jopa taonondo pangí liku mundukulie, akuna ye te molemo, yemonga imbimu Saimono, yunge imbi te Pita, "Yu opili." niengi. Pita yu kongi kao kilu tepa mimi tepa kou mone limo ye Saimononga ulkena molemo, yunge ulkemo nomu kusa kélona angilimo." nirimu.

<sup>33</sup> Aku nirimu pilipulie nane sumbi sipu nu molorununa ye marendo nu "Puku lipai." nirindumunge nu ongo língi, nu papu onu. Kinié olio Pulu Yemo kinie pea ombo molemolo yamboma 'Pulu Yemone nu ungu nimbe simuma olio ningu sieni.' nimbu, pilimulundu ombo molemolo." nirimu.

<sup>34-35</sup> Konilliasini aku sipe nirimu kinie Pitane pilipelie nirimumuni, Konilliasinge ulkena moloringi yambomando pulu monjipe nimbendo: "Ou na pilipulie, 'Pulu Yemone Isirele yamboma manjipe konopu monjilimo.' konopu lerindu. Nakolo kinié pilkiru, yuni yambo talapemanga pali yambo telu telu ningu yu pipili kolko liku ai siku ulu pulu peangama sumbi siku telemele yamboma kanopa peanga kanopa 'Nanga kumbikerena kapola ongo molangi.' nilimo lepamo, akumu kinié pilipero.

<sup>36</sup> "Pulu Yemone koro ou Isirele yambomando "Ene nokopa konjimbe ye te mundumbu." nimbe mako torumu yemo talko orumu ye Kirasi Yesusi yu yambomanga pali Ailimu, akumuni olio Pulu Yemo kinie konopu teluna pupili kapola kapola molomolo aulkemo akisnjirimu temane peangamo Isirele yamboma moloringine Pulu Yemone nimbe mundurumu.

<sup>37</sup> Ou kolea Judia disiriki koleamanga pali ulu wendo orumuma ene nanga ungu nikirumu pilkimili yambomane ou pilku pora silimele. Ou Jonone yambomando "Konopu alowa tekolie no liengi." nimbe aku unguma nimbe sirimu. Pe Yesusi kolea Gallilli disiriki yunge uluma pulu monjipe terimu.

<sup>38</sup> Kopongo wele te pengena ondoko pakon-jiringi mele\* Pulu Yemo yunge kongonomo tembando Pulu Yemone kolea Nasarete ye Yesusi Mini Kake Telimu sipe Yesusi 'Tondolo pupili.' nirimu. Kanu kinie Pulu Yemo Yesusi kinie molorumuna Yesusi koleamanga andopa ulu peangama tepa, „kurumanga nomi, depelemone\*\* ambolorumu yamboma "Konde pangi." nirimu. „Akumu ene pilku pora silimele..\*\*\*

<sup>39</sup> "Juda yambomanga koleama pali kinie enenga kolea aili Jerusalleme kinie yuni ulu terimuma pali olio yu lombili andorumulume mongone kanopo molorumulu. Enene 'Yu kolopili.' ningu unjuna uku toko panjiringi kolorumu.

<sup>40</sup> Nakolo yu wale talo yambo ono koleana perimu yepoko sipemonga Pulu Yemone topa makinjipelie "Yambomane nu kanangi mona moloi." nirimu.

**41** Yamboma paliyu lomboropa ola molorumu naakanoringi. Ou Pulu Yemone 'Kanangi.' nimbe mako torumu yambomane mindikanoringi; olio Yesusi lomboropa ola molorumu kinie yupea langi nombo molorumulu yambomane mindi yukanorumulu.

**42** "Yuni oliondo nimbendo: "Enene yamboma temane peangamo toko siku, 'Pulu Yemone na 'Yambo konde molemelema kinie kolemelema kinie enenga pali kote tenjipe pilimbe yemo molopili.' nirimu.\* ninguyamboma ningusiei." nirimu.

**43** Pulu Yemone ungu umbutonjirimumaya yamboma ningusiringiyemane\* pali ou yu ma koleana naa opili yunge ungumu ningusikulie ningindu: "Yesusi 'Yu sike ,Pulu Yemonga Malo molopa, sike yu mana manie omba nanga nimbe kolo wangopa kolonjirimu,' ningutondolo munduku pilingi\*\* yamboma Pulu Yemone Yesusi yambomanga nimbe tenjirimumunge pilipelie kanu yambomanga ulupulu keri teringime 'We manie pupili.' nimbesiye kolomba." niringi." nimbe Pitane nirimu.

**44** Pitane akusipe nimbe molopili Mini Kake Telimu omba Pitane ungu nirimupilku moloringiyambomanga konopuna suku purumu.

**45** Pulu Yemone Mini Kake Telimu ou Juda yambo Kirasi pililime sirimu melepeaku sipekanu yambo talape lupe moloringime sirimuna kanokolie Kirasi pilili Juda ye Pita pea taputoko oringimene paa suru niringi.

**46** Kanu yambo lupema Mini Kake Telimu liringimene umbu ungu lupe lupema ningu Pulu

Yemo kapi niringine pilkulie kanu yemane ‘Mini Kake Telimu ombo enenga konopumanga pumu lepamo.’ ningu piliringi. Ou Kirasi pilili Juda yambomanga konopuna mindi Mini Kake Telimu purumu kanumu.

Kanu kinie Pitane nimbendo:

<sup>47</sup> “Olio Kirasi pilili Juda yamboma Mini Kake Telimu lirimulu mele kinie i yambo talape lupema kepe Mini Kake Telimu likimili kene naene “Ene no naa liengi.” nimbe no manda mi tombaye?” nirimu.

<sup>48</sup> Aku nimbeline yuni nimbendo: “Ene Yesusi Kirasi yunge imbibunge no liei.” nirimu. No liku pora sikulie enene Pitando ningindu: “Nu isili ou naa pani. Wale pokore nu olio kinie pea molkolie pepani.” niringine yu ene kinie wale pokore we molorumu.

## 11

<sup>1</sup> Yesusini “Nanga kongonomo tenjipai.” nimbe lipe mundurumu yema\* kinie ‘Yesusi pilku moloringi, angenupili kolea Judia disiriki pali moloringime kinie enene Juda yambomanga ulsukundu moloringi yamboma Pulu Yemonga ungumu pilku liringi mele piliringi.

<sup>2</sup> Akumunge Pita Jerusalleme olando purumu kinie kangomanga kangi te kopisiku ele teringi ungu manemo\* ‘Paa teamili.’ niringi Kirasi pilili yemane Pita Romo ye Konilliasinge ulkena purumuna yu iri tokolie

<sup>3</sup> ningindu: “Nu Juda yemo molko yambo kangi naa kopisilimelemanga ulkena puku, ene

kinie pea molko langi noringimu, paa teko ken-jirinu.” niringi.

<sup>4</sup> Nakolo Pitane ulu pali wendo orumuma ene temane topa sirimu. Yuni nimbendo:

<sup>5</sup> “Tena. Na Jopa taonona molorundu kinie na Pulu Yemo kinie ungu nimbu molopolie nirindumuni, kumbu mele tepo kanorundu kinie mulúmu anju yando pupe, múlu paa aili te, ekendo ekendo pundu kisenga ambolopalie taka lepa mana manie mundurumu, na molorunduna ombo lerimu.

<sup>6</sup> Akuna sukundu kanorundu kinie kongi lopa kera wambiye mele takarama pali akuna sukundu moloringi.

<sup>7</sup> Kanu kinie ungu te ombalie nirimu pilirindu. Yuni nando nimbendo: “Pita, ola molko i mele takara te toko noi.” nirimu.

<sup>8</sup> “Nane pundu topo nimbundu: “Ailimu, paa naa nombo. Nuni kanoko keri kanoleno melema kinie, “Kalaro molemo.” nilino melema kinie, olio Juda yambomando ‘Naa nangi.’ ningun ungu mane siriñu melema ou walse kepe te paa naa norundu.” nirimu.\*

<sup>9</sup> “Wale talo sipe kanu ungumu altopa muluna wendo ombo nando nimbendo: “Pulu Yemone kake tenjilimo melemando nuni “Kalaro molemo.” ni naa ni.” nirimu.

<sup>10</sup> “Olto aku sipu wale yepoko kerepali nirimbulu kinie walsikale mulúmu kelepa móluna olando purumu.

<sup>11</sup> “Mulúmu kelepa olando purumu kanu wale kolea aili Sisaria ye tene “Pai.” nimbe mundurumu ye yepoko na molorundu ulkena oringi.

**12** Minimuni nando nimbendo: “Konopu aisili liku naa munduku i yema kinie pangи pui.” nirimu. I Kirasinge ye talo pakara ene na kinie pea tapu topo pupu, kanu Sisaria yemonga ulkena sukundu purumulu.

**13** “Ulkena sukundu purumulu kinie kanu yemone oliondo nimbendo: „Pulu Yemonga, angello te nanga ulkena ombalie nimbendo: “Nuni ye mare Jopa taonondo pangи liku mundukulie, akuna ye te molemo, yemonga imbimu Saimono, yunge imbi te Pita, “Yu opili.” niengi.

**14** Nu kinie nunge ulkena pelemele yamboma kinie Pulu Yemone ‘Ene mindili nolemelka aulkena wendo ongo yu kinie pea molko konjingí aulkena pangи.’ nimbe lipe taponjimbe.” nimbe\* angellomone nando aku sipe nirimu.” nimbe kanu yemone nirimu.

**15** “Kanu kinie nane pulu monjipu ungu nimbú nirindu kinie ou olio molorumuluna Mini Kake Telimu manie orumu meleaku sipe ene moloringine orumu.

**16** Aku terimu kinie nane Ailimuni ungu te ou nirimu mele altopo pilirindu. Yuni nimbendo: “Jonone yambo no mindi linjirimu nakolo Pulu Yemone ene Mini Kake Telimu linjimbe.”\* nirimu mele altopo pilirindu.

**17** Aku liemo olio Ailimu Yesusi Kirasi ‘Yu sike.’ nimbu tondolo mundupu pilirimulu\* kinie Pulu Yemone olio ou Mini Kake Telimu sirimu mele pe aku sipe aku yambo lupema sirimu liemo na nae molopolie na Pulu Yemondo “Molo.” nilkeye?” nimbe Pitane nirimu.

**18** Pitane aku sipe nirimu mele pilkulie enene ou yundu niringi mele kamu munduku kelkolie, Pulu Yemo kapi ningulie ningindu: "Akumunge Pulu Yemone 'Yambo lupema konopu alowa tekolie manda molopa mindi puli ulu pulumu\* liengi.' nimbe panjirimu lepamo." niringi.

**19** Ou Sitipene toko konjikulie pe Kirasinge yamboma mindili liku siringi kinie ene bulu balu ningu purungi kinie mare kolea Pinisia puku, mare kolea Saipirasi puku, mare kolea aili Andiyoko pukulie niringimuni, Juda yamboma mindi temane peangamo toko siringi.

**20** Nakolo ye mare, enenga pulu kolea Saipirasi kinie Sairini kinie, ene kolea aili Andiyoko pukulie pulu monjiku Aili Yesusinge temane peangamo yambo lupema toko siringila.

**21** Pulu Yemone ene lipe taponjirimuna yambo aisili "I ungumu sike." ningu tondolo munduku pilkulie konopu alowa teko 'Ailimunge yamboma molamili.' ningu moloringi.

**22** Aku teringi temanemo Kirasinge yambo talape Jerusalleme moloringimene\* pilkulie enene Banapasindu\*\* "Kolea aili Andiyoko pui." niringi.

**23-24** Banapasi yu ye peangamo, Pulu Yemo 'Sike.' nimbe paa tondolo mundupe pilirimu yemo; Mini Kake Telimu konopuna molopa kapola terimu yemo. Yu kolea aili Andiyoko pupe kanorumu kinie Pulu Yemo yambo aisili we kondo kolopa tenjirimu mele\* kanopalie yu paa konopu sipe, ene 'Ailimu mindi tondolo munduku pilku, mele te lupe alowa teko konopu naa monjengi.' nimbe ungu mare nimbe sirimu.

Yambo aisili Ailimunge talapena sukundu ongo moloringi.

<sup>25</sup> Kanu kinie Banapasiyu kolea aili Andiyoko mundupe kelepa, Sollo korombando Tasisi taono purumū.

<sup>26</sup> Pupe yu kanopa lipelie kolea aili Andiyoko yando memba orumu. Kanu kinie elte kolea aili Andiyoko Kirasinge yambo talapemo kinie pea moltkolo yambo paa aisili ungu mane sikulu molangili ponie telu omba purumu. Kolea aili Andiyokona, Yesusinge lombili andoli yambomando\* we yambomane imbi lelko pulu monjiku 'Kirasinge Yamboma' niringi.

<sup>27</sup> Kanu walemanga Pulu Yemone ungu umbu tonjirimuma pilku yamboma ningusiringi ye mare\* kolea aili Jerusalleme moltkolie kolea aili Andiyoko maniendo oringi.

<sup>28</sup> Kanu ye oringimenga ye te, yunge imbimu Akapasi, yu ola angilipelie, Minimuni yu pe wendo ombá mele nimbe sirimu pilipelie nimbendo: "Romo gapomanone nokolemo koleamanga pali engele pe lemba." nirimu. (Aku nirimu mele pe ye Lodiasi, Romo koleamanga pali nokorumu ye paa aili kumbinemo molorumu kinie, sike aku engelemo wendo orumu.)

<sup>29</sup> Ye Akapasiniaku nirimu kinie pilkulie ou wendo naa opili Ailimunge lombili andoli yambomane 'Olionga angenupili Judia disiriki molemelema liputaponjipukou mone i sипу mako topo siemili.' ningusanjiringi.

<sup>30</sup> Kanu kinie kou mone popo sikulie Banapasi kinie Sollotolo "Kou mone Jerusalleme mengo puku Aili Yesusinge yambo nokolemele

yema\* puku sipale." niringi kinie mengo puku  
sipuringili.\*\*

12

<sup>1</sup> Ye Nomi Kingi Erotene , kolea aili Jerusalleme molopa, Kirasinge yambo talapemonga\* yambo mare mindili lipe sipe tombando yunge ami yemando "Mare puku ka sipai." nirimu kinie ka siringi.

<sup>2</sup> Jononga angenu Jemisi “Tai!” nirimuna pilkulie opa teli lou pulsene yu toko konjiringi.

<sup>3</sup> Aku teringi kinie Juda yamboma pilku peanga piliringine kanopalie nirimumuni, pe "Pita puku ka sipai." nirimu kinie yu puku ka siringila. Juda yambomane ponie tengah tengah kolea aili Jerusalleme ongo akuna suku Pulu Yemone enenga anda kolepalime Naa Topa We Ombo Purumu mele\* piliringi wale akumu imbi lelko, 'Pillawa Akoli Mele Isimu Naa Munduku Pillawa We Kalko Noringi Walema'\* niringila, aku wale-manga yuni aku terimu.

<sup>4</sup> Pita ka siku ka ulkena panjiringi kinie ami ye talape kise, talapena sukundu ye kise kise ningu moloringi ene pali lipa tere lepa tene sikisi kanumu, "Ene yu nokoko molai." nimbeline nirimumuni, "Pulu Yemone enenga anda kolepalime Naa Topa We Ombo Purumu mele piliringi wale akumu ombo pumbe kinie 'Yamboma kanangi.' nimbu ene molongena membo pupu kote tenjipu pilipu ami yemando "Tai." nimbú." nirimu.

<sup>5</sup> "Mimi siku nokai!" nirimuna kanu ami yemane Pita ka ulkena pepili nokoko moloringi. Nakolo Kirasinge yambomane Pulu Yemo

kinie Pitanga ungu tondolo munduku ninjiku moloringi.

<sup>6</sup> Ipulueli oukundu Erotene Pita wendo lipe kote tenjimbe terimu kinie ipulueli mele Pitanga kitolo ami ye talo kinie ka senene ka toringi, Pita ai suku singine we uru perimu. Ka ulkena peringi yamboma nokoli ye mare kerepuluna angilku ka ulke pali nokoko angiliringila.

<sup>7</sup> Kanu kinie Ailimunge angello te Pita uru perimuna orumu kinie kanuna pa terimu. Yuni Pitanga wanguna topa makinjipelie, "Welea ola moloi." nirimu. Kanu kinie ka senetolo yuyu moki lepa manie purumu.

<sup>8</sup> Angellomone Pitando nimbendo: "Nunge kako toko kimbu su monji." nirimu kinie aku terimu. Kanu kinie yuni "Kinié ola ali walemo pakoko na lombili oi." nirimu.

<sup>9</sup> Pita molorumu suluminiamo mundupe kelepa yu lombili pupelie nirimumuni, angellomone terimu mele yu naa pilipelie 'Kumbu tepo kanokoro.' konopu lerimu.

<sup>10</sup> Pukululie niringilimuni, ka ulkena peringi yamboma nokoli ye telu angilirimuna ongo pukulu, nokoli ye talo sipe angilirimuna ongo pukululie, kolea ailine wendo pungilindu ka ulke pala kune kapane teline puringili kinie kunemo yuyu lirimu kinie ulsu ongo pukulu, aulke pulúna wendo pukulu aulke paka maliena oringili kinie angellomo Pita tamburembu mundupe kelepa yu purumu.

<sup>11</sup> Kanu kinie Pita, ou yu 'Kumbu tendu.' konopu lerimu nakolo pe kinié yunge umbu konopu ombo perimu kinie yuni pilipelie, "A,

kinié na pilipero. Kingi Eoretene nando ‘Teambo.’ nirimu mele kepe Juda yambomane nando ‘Teamili.’ ningu piliringi mele kepe ‘Aku siku naa teangi.’ nimbe Ailimuni\* yunge angellomo na “Ka ulkena wendo lipui.” nimbe mundumu lepamo, kinié na pilipero.” nirimu.

<sup>12</sup> Aku sipe pilipelie nirimumuni, Jono, yunge imbi te ‘Mako’ niringi, kanumunge anumu Mariangga ulkena Pita yu purumu. Kanuna yambo aisili maku toko Pulu Yemo kinie ungu ningu moloringi.

<sup>13</sup> Pita aku ulkena pupelie nirimumuni kune topa kilu kilu sirimu kinie kongono teli ambo wenepo te, yunge imbimu Roda, kune limbendo ombalie nirimumuni,

<sup>14</sup> Pitanga ungumu pilipe imbi sipelie, ‘Yu okomo lepamo.’ nimbe pilipe konopu sipelie kune naa lipe yu kelepa lkisipe anju pupe yambomando “Pita omba kerepuluna angilimo.” nirimu.

<sup>15</sup> Nirimu kinie pilkulie niringimuni, ‘Pita ka ulkena pelemo.’ konopu lelkolie ambomo yuntu “Nu kekelepa tokolie nikinuye?” niringi. Nakolo yuni karaye tepalie, “Molo. Sike Pita omba kerepuluna angilimo.” nirimu.

Kanu kinie enene ningindu: “Pita nokolemo angellomo omba kerepuluna angilimo lepamo. Paa sike Pita molo.” niringi.

<sup>16</sup> Aku siku kerepali ningí niringi kinie Pitane kune topa kilu kilu sipe angilirimu kinie kune wendo liku kanoringi kinie sike Pita kerepuluna angilirimu kanokolie suru ningu mini wale munduringi.

<sup>17</sup> Nakolo yuni enendo “Ungu naa niei.” nimbe kimuni pipi sipelie nirimumuni, Ailimuni yu ka ulkena wendo lirimu mele temane topa sirimu. Topa pora sipelie yuni enendo nimbendo: “I nikiru mele Jemisi\* keme, olionga angenupilime kinie, ene puku ningu sipai.” nimbeline yu ene mundupe kelepa kolea tenga lupe purumu.

<sup>18</sup> Kolea tangorumu kinie opa teli ami yema ola molkolie, ‘A, Pita tena pumunje?’ ningu pilku mini wale paa aili teko munduringi.

<sup>19</sup> Erote Pita koropa naa kanopa lipelie nirimumuni, yu nokoringi ami yemanga kote tenjipe pilipelie, ami ye lupe marendo nimbendo: “Pita nokoko kénjingi ami yema ene kolangi mengo puku toko konjipai.” nirimu.

Kanu kinie kingi Erote kolea Judia disiriki mundupe kelepa kolea aili Sisaria maniendo pupe wale mare kanuna molorumu.

<sup>20</sup> Kolea aili Taya kinie Saidonotolonga yamboma Kingi Erote mumindili kolopa molorumuna ene maku tokolie yu molorumuna oringi. Kanu yamboma Kingi Erote nokorumu koleana langi puku topo toko liku no pu opu teringimunge yu kinie ‘Taka lepo molamili.’ ningindu oringi. Erotenga ulke kinie melema pali nokorumu ye Billasitasi ‘Olio lipe taponjipe Erote nimbu, pupu nipumulú.’ ningu ou yu molorumuna puku yu kinie ungu niringi. Aku tekolie Erote molorumuna puku “Kinie olio kinie taka lepo molamili.” ningu puku mawa teringi.

<sup>21</sup> Kanu kinie “Erote kinie ‘Taka lepo molamili.’ nimbu, pupu nipumulú.” ningu panjiringi wale-monga Erote yunge ye nomi kingi wale pakoli

peangama lipe pakopa yunge kingi kongono tembando molorumu polona molopalie ungu aisili yamboma nimbe sirimu.

<sup>22</sup> Kanu kinie yamboma yu kapi ningu ru ningulie ningindu: "I ungu nikimu mele yambo tene nilimo mele naa nikimu. Pulu ye tene nilimo mele nikimu." niringi.

<sup>23</sup> Kanu kinie enene "Yu pulu ye te mele molemo." niringi mele Eretene pilipe peanga pilipe Pulu Yemo kapi naa nirimuna Pulu Ye Ailimunge angello tene yu topa nosirimu, opiyé kawene yu norumu kinie yu kolorumu.

<sup>24</sup> Nakolo Pulu Yemonga ungumu koleamanga pali pilku kapola tenjiringi.

<sup>25</sup> Banapasi kinie Sollotolo kolea aili Andiyoko munduku kelko kolea aili Jerusalleme kou mone mengo puringilime yamboma siku pora sikulie niringilimuni,\* Jerusalleme munduku kelko Andiyokondo yando Jono liku mengo oringili. (Jononga imbi te 'Mako' niringi.\*\*)

## 13

<sup>1</sup> Kirasinge yambo talapemo\* kolea aili Andiyoko moloringimenga mare Ailimuni ungu umbu tonjirimuma pilku yamboma ningu siringi yema molko,\*\* mare yamboma ungu mane siringi yema moloringi. Enenga imbime i sipe: Banapasi keme, 'Ye Pombera' niringi ye Simiono keme, kolea Sairini ye LLusiasi keme, (poropinji te nokorumu ye nomi kingi Eretenga ulkena ai lerimu) ye Maneyene keme, Sollo keme.

<sup>2</sup> Kirasi pilili yamboma Ailimu\* kapi ningu imbi ambolko ola linjiku langi naa nongo mi toko

moloringi kinie Mini Kake Telimuni nimbendo: "Nane 'Banapasi kinie Sollotolo teangili.' nindu kongonomo teangili mako tangi." nirimu.

<sup>3</sup> Aku nirimuna pilkulie langi naa nongo mi toko Pulu Yemo kinie ungu ningulie, elte ki ola munduku ambolkolie "Pale." ungu munduringi.

<sup>4</sup> Mini Kake Telimuni "Elte pale." nimbe lipe mundurumu kinie Sellusia taono maniendo pukulu, nomuna sipi lerimuna suku pukulu kolea Saipirasi puringili.

<sup>5</sup> Sallamasi taono ongolo sipine manie pukululie, Juda yamboma maku toko Pulu Yemonga ungumu piliringi ulkemanga andoko Pulu Yemonga ungu nengu siringili. Jono Mako elte lipe taponjipe pea tapu toko andoringi.

<sup>6</sup> Kolea Saipirasi nomu kusa suku singine lerimu kolea te. Akuna kimbu kongono tekolo kolea kangamanga ungu nengu siliku pukululie, Peposi taono nomu kelona lerimuna wendo puringili. Kanuna Juda ye te molorumu kanoringili. Kanu yemo kurumanga nomi Setenene lipe taponjirimuna ulu tondoloma tepa, yu kolo topa "Pulu Yemone ungu umbu tonjilimoma pilipu ene nimbu sikiru" nimbe yamboma kolo topa sirimu yemo. Yemonga imbimu Josua Malo. Imbi te Ellimasi niringila.

<sup>7</sup> Ellimasi yu Saipirasi poropinji nokorumu Romo gapomano ye Sesiasi Pollasi kinie tapu toko moloringili yemo. Sesiasi Pollasi yu pilipe konginjili paa perimu yemo. Yuni 'Pulu Yemonga ungu piliembo.' nimbe yuni Banapasi kinie Sollotolo "Wale." nirimu.

**8** Nakolo kurumanga nomi Setenene lipetaponjirimu kinie ulu tondoloma terimu ye kanumu, yunge imbi te Ellimasi niringi, kanumuni "Naa wangili." nimbe pipi simbe tepa, gapomano ye endisimuni 'Eltenga ungu pilipelie 'Sike.' nimbe konopu alowa naa tepili.' nimbe, endisimu pilimbe aulkemo pipi simbe terimu. (Imbi Ellimasi kanumu Giriki ungu te, kanumunge pulumu kurumanga nomi Setenenga ulu tondoloma tenjili yemo.)

**9** Kanu kinie Sollo, yunge imbi te Pollo niringila, yu Mini Kake Telimu konopuna molopa kapola terimu kinie yuni Ellimasi nemo nemo nimbe kanopalie nimbendo:

**10** "Nu depelemonga\* malo te, nu mele sumbi silimenga opa tou te moleno. Kiyongo nimbe andopa wa nomba kolo topa tepa kenjili ulumanga pali puluma nu kinie pelemo. Ailimuni yamboma lipetaponjilimo aulkemo pipi siku, 'Yamboma aulke tengat lupe pamili.' ningu kolo toleno uluma manda munduku naa keleniye?

**11** Aku kapola, Ailimuni nu kinie 'Opa tou molambili.' nikimu.

Nunge mongotolo tambulumbe kinie nu kolea pa temba mele naa kanoko, wale mare sumbulu toline moloni." nirimu.

Pollone aku nirimu kinie tamburembu kupe mele tene Ellimasinge kumbikeremo pipi sipe sumbulu torumuna yu andopa pererimu. Yambo tene yu 'ki ambolopa aulke lipet ora sipe memba pupili.' nimbe kororamu.

**12** Gapomano ye endisimuni ulu wendo orumu kanumu kanopalie, Aili Yesusi molopa ter-

imu mele Pollo Banapasitolone mane siringili kanumu pilipe mini wale mundupe "I nikimbili mele sike nikimbili lemo." nimbe tondolo mundupe pilirimu.

<sup>13</sup> Pollo kinie tapu toko puringi yema kinie Peposi taono munduku kelko sipine Peka taono puringi. Peka akumu Pambillia poropinji lerimu taono te. Kanuna Jono Mako\* elte mundupe kelepa Jerusallemendo kelepa purumu.

<sup>14</sup> Kanu kinie Pollo kinie Banapasitolo Peka taono munduku kelkolo kolea Pisidia poropinji Andiyoko taono\* puringili. Pukululie „Juda yamboma koro moloringi, wale Sambate kinie\*\* Juda yamboma maku toko Pulu Yemonga unguungu piliringi ulkena puku moloringili.

<sup>15</sup> Yambo maku toringime nokoringi tapu yemanne „boku lipe, Mosisini Pulu Yemonga ungu manema pilipelie boku torumu ungu te kinie, Pulu Yemone ungu umbu tonjirimuma pilku yamboma ningu siringi yemanne boku toringi ungu te kinie\* kambu toko pora sikulie, elte wal-sikulie ningindu: "Angenungulutolo, 'Yamboma ungu mane te simbulú.' konopu léngili liemo piliemili ongo ningu siele." niringi.

<sup>16</sup> Kanu kinie Pollo ola angilipelie nimbendo: "Ene Isirele yamboma kinie Pulu Yemonga imbi ambolko ola linjili yambo lupema kinie ungu te niembo piliei." nimbelie yuni nimbendo:

<sup>17</sup> "Olio Isirele yambomanga Pulu Yemone olionga anda kolepali mako topa "Ene kinie enene pe pe kepe kalko lingíme kinie na nokopo molombo." nirimu.\* Kanu kinie ene kolea Isipi moloringi kinie 'Ene yambo talape paa aisili

molangi.' nirimu.\*\* Kolea Isipi ene yambo talape paa aisili moloringi kinie yuni yunge tondolomone ene aku koleamonga ulsu memba omба,\*\*\*

<sup>18</sup> kolea ku lepa langi naa oli koleana memba pupelie, ene ponie paono talo omба pupili kolea ku leli akuna teko kenjiku moloringi mele yuni kanopalie, yunge konopuna umbuni tepili kanopa molorumu.

<sup>19</sup> Yunge yamboma 'Kolea Kenane kamu molangi.' nimbelie yambo talape yepoko pakara akuna ou moloringime topa mundupe mamo yunge yamboma lipe sirimu.\*

<sup>20</sup> Ene kolea Isipi puku molko, kelko yando ongo molko, kolea pulu yamboma toko mundengi ponie po anderete pipiti omба purumu.\*

"Kanu kinie Pulu Yemone 'Nanga yamboma nokai.' nimbe walse yambo tela lipe monjipe, walse yambo tela lipe monjilipe pupelie nirimumuni,\*\* pe yuni ungu umbu tonjirimuma pilipe\*\*\* yando nimbe sirimu ye Samuelene 'Ene nokopili.' nirimu.

<sup>21</sup> Kanu ye Samuelene ene nokopa molopili ene we tapu yambomane nokoringimunge siye terimuna "Ye nomi kingi tene olio nokopili mako toi." niringi. Kanu kinie Benjaminini kalopa lirimu ye te, Kisi malo Sollo, Pulu Yemone mako torumu, yu enenga pulu pulu ye nomi kingimu molopili ponie paono talo omба purumu.

<sup>22</sup> "Pulu Yemone Sollo makoropalie "Depisi enenga ye nomi kingimu kolo wangopa molopili." nirimu.\* Yuni Depisindu nimbendo: "Jesi

malo Depisi nanga uluma pali pilipe lipa temba  
lemo na kanopolie yu kanopo peanga kanolio."  
nirimu.

<sup>23</sup> Kanu kinie Pulu Yemone Isirele yambo-  
mando\* "Ene lipa taponjimbe ye te simbu." ou  
nirimumu\*\* 'Kamu siembo.' nimbelie yuni kanu  
ye Depisini yandopa kalopa lirimu yambo tene  
'Yamboma Lipe Taponjipe Mindili Nolemelka  
Aulkena Wendo Limbe Ye Yesusi\*\*\* mepili.' nir-  
imu.\*\*\*\*

<sup>24</sup> Yesusi ou naa opili No Linjili Jonone Isirele  
yambomando pali ungu mane sipelie nimbendo:  
"Ulu pulu kerime munduku kelko konopu alowa  
teko no liei." nirimu.\*

<sup>25</sup> Jono yu aku kongonomo nondopa tepa  
pora sipelie yuni enendo nimbendo: "Na nae  
konopu lemeleye?" nirimu. "Pulu Yemone "Ene  
nokopa konjimbe ye te lipu mundumbu." nirimu  
ye Kirasimu 'Ombá.' ningu nokoko molemele  
'Akumu na.' konopu lekemeleye? Na aku yemo  
molo. Ombá yemo paa peangamo na paa kerimu,  
yunge we kongono kepe manda naa tepo yunge  
kimbu su ka pilke manda naa tonjilke." nirimu.\*

<sup>26</sup> "Angokeme, ene Eporayamone kalopa lir-  
imu yamboma\* kinie, ene Pulu Yemo pipili kolko  
liku ai silimele yambo lupema kinie, i temane  
peangamo, Pulu Yemone olio lipa taponjipe,  
mindili nolemelka aulkena wendo lipa, yu kinie  
pea molopo konjimulú aulkena lipa monjirimu  
temane peangamo olionga.

<sup>27</sup> "Jerusalleme moloringi yamboma kinie  
enenga ye ailime kinie enene Yesusi kanoko  
imbi naa siku, 'Pulu Yemone "Ene nokopa kon-

jimbe ye te mundumbu.” nimbe mako torumu ye Kirasimu yu.’ konopu naa lelko, yunge imbi we lelko ‘Yu we yere.’ konopu leringi. Nakolo olionga ye nomi kanumane “Yesusi toko konjengi.” niringimunge Pulu Yemone ungu umbu tonjirimuma pilku yamboma ningu siringi yemane “I siku i siku tenge.” koronga ou niringi aku mele wendo orumu. Kanu unguma kanu yemane bokuna toringi molemo unguma “Yesusi tangi.” niringi yambomane ‚ene koro molemele, wale Sambatemanga pali boku kanoko piliringi nakolo kanu ungu taki taki bokuna kanoko piliringimenga pulumu naa piliringi.

<sup>28</sup> Yu ulu te tepa kenjirimumu kanokolie ‘Yu kolopili.’ ni naa niringi nakolo Romo ye nomi Paillatendo mawa tekolie “Kolopili, ‚unjuna ola uku toko panji.’” niringi.

<sup>29</sup> “Ou yambomane ene pe tenge mele ningu boku toringi uluma pali Jerusalleme yambomane Yesusi kinie teko pora siringi yu kolorumu kinie yambo marene yu ongo unjuna manie liku yambo ono teli kou kande tengə mengo puku nosiringi.

<sup>30</sup> Nakolo Pulu Yemone “Yu yambo ono koleana kelepa lomboropa ola molopili.” nirimu.

<sup>31</sup> Kanu kinie yu lomboropa ola molorumu kinie ou yu naa tangi yamboma yu kinie kolea Gallilli disiriki munduku kelko kolea aili Jerusallemendo olando puringi kanu yambomane enamanga taki taki yu kanoringi. Kinié kanu yambomane kanoringi mele olionga Isirele yamboma ningu siliku andolemele.

<sup>32-33</sup> “Pulu Yemone pe wendo ombá mele

olionga anda kolepalimendo nirimu kanu ulumu  
olio kalko liringime molamili kamu wendo  
omu, kanumu Banapasi oltone kinie ene te-  
mane peangamo topo sikimbulu. Pulu Yemone  
Yesusinge onomo topa makinjirimu kanu ulu-  
muni ou yuni "Tembo" nirimu mele wendo omu.  
Kanumundu Pulu Yemone yunge konana talo  
sipemonga suku nirimu nimbe molemo mele i  
sipe:

"Nu nanga malo; kinié na nunge lanie."\*  
nirimu.

<sup>34-35</sup> Pulu Yemone 'Yu paa pe kepe naa purupili.'  
nimbe yu topa makinjirimu kanumu ou naa  
tepili ungu talo pea ou nirimula. Kanu unguto-  
longa te i sipe:

"Depisindu tepo konjipu ulu peanga paa sikema  
simbu nirindu mele nu simbu."\*  
nirimula. Te Depisini i sipe nirimu:

"Pulu Yemo, nunge Ye Kake Telimu kolomba  
kinie  
nuni 'We purupili.' naa nini."\*\*  
nirimu.

<sup>36</sup> Depisini Pulu Yemondo aku nirimu Depisi  
yuyu temba mele naa nirimu. Pulu Yemone  
yundu "Tei." nirimu kongonoma pali tepa lipelie  
yu kolorumu, ono teringi kinie pururumu.

<sup>37</sup> Nakolo ye kolorumu ono teringi kinie Pulu  
Yemone topa makinjipe "Lomboroko ola moloi."  
nirimu kanu yemo yu puru naa pururumu. Aku  
yemo Yesusi.\*

<sup>38</sup> "Angokeme, aku terimuna 'Ene piliengi!'  
nimbu nimbu tekero mele i sipe: Yesusini  
terimumunge yuni olianga ulu pulu kerime

pali 'Kamu manie pupili.' nimbe akuma siye kolomba.

<sup>39</sup> Mosisini ungu mane ou sirimumane 'Yambomanga ulu pulu kerime kamu ombo manie pumbe, ene konopu sumbi nimbe peli yamboma molonge.' manda naa nirimu nakolo kinié Yesusi olionga nimbe tenjirimu uluma "Sike aku terimu." ningu tondolo munduku pilingí\* yamboma Pulu Yemone ene kanopalie, enenga ulu pulu kerime siye kolopa, ene 'konopu sumbi nimbe peli yamboma.' nimbe kanomba.\*\*

<sup>40</sup> "Akumunge ou Pulu Yemone ungu umbu tonjirimuma pilku yamboma ningu siringi yemane ulu wendo ombá niringi mele 'Olio kinie wendo naa opili.' ningu, pilku konjiku molangi.

41 Kanu yemanga tene nimbendo:  
“Ene ungu taka tonjilimele yamboma pilieme.  
Konopu aisili liku mundukulie kolangi.  
Ene molemele walemanga nane ulu te tembo,  
kinié yambo tene akumu kanopa  
“I sipe i sipe wendo omu kanondu.” nimbe  
ene temane topa simbe kinie  
‘Ulu te aku sipe manda wendo naa ombá.’ ningu  
pilku

"Kolo tokono." ningu, naa pilingí kene  
ene ungu taka tonjilimele yamboma pilieme.  
Konopu aisili liku mundukulie kolangi."\*  
nirimu." nimbe Pollone nirimu.

<sup>42</sup> Pollo Banapositolo Pulu Yemonga ungumu piliringi ulkemo munduku kelkolo pungilí teringili kinie yambomane elte mawa tekolie ningindu: "I ungu nantu sikimbilimu pe 'koror

molomolo, wale Sambatemo kinie\* altoko ongo  
ningu siele." niringi.

<sup>43</sup> Bulu balu ningu pena puringi kinie Juda  
yamboma kinie yambo lupe\* Pulu Yemonga  
ungu piliringime kinie enenga yambo aisili  
Pollo Banapositolo lombili puringi. Eltene ene  
ungu ningu sikulu, "Ene 'Pulu Yemone we  
kondo kolopa tepa konjilimo ulu pulumu olio  
kinie pelemo mele pepa mindi pupili.' ningu  
molangi."\*\* niringili.

<sup>44</sup> Pe Sambate walemo wendo orumu kinie aku  
taonona yambo paa aisili Pulu Yemonga ungu  
pilingindu maku toringi.

<sup>45</sup> Nakolo yambo aisili Pollonga ungu  
pilingindu maku toringine Juda yambomane  
kanokolie konopu keri panjiku Pollone ungu  
nirimuna ungu taka tonjiku "Nimbe kenjikimu."  
niringi.

<sup>46</sup> Kanu kinie Pollo Banapasitolone enendo  
tondolo mundukulu ningilindu: "Pulu Yemone  
'Ene Juda yamboma yunge ungumu ou piliengi!'  
ou nirimuna ene kumbi lepo ombo nimbu  
sirimbulu. Nakolo enene 'Olio molopo naa  
konjilimolomonga alieli konde molopa konjipe  
mindi puli ulu pulumu\*' manda naa limulu.'  
ningu ungu nimbu sikimbulumu liku bulu siku  
naa pilimelemonga oltone ene Juda yamboma  
mundupu kelepo yambo lupema molemelena  
pumbulú.

<sup>47</sup> Ailimuni\* oltondo "Aku teale." nirimu  
kanumu. Yuni nimbendo:

"Koleamanga pali yamboma  
mindili nolemelka aulkena manda wendo ongo

Pulu Yemo kinie molko konjingí mele  
ningu sieni.' nimbu  
'Nu Isirele yambomanga ulsu molemele yambo-  
manga  
pa tenjilimu molani.' nikiru." nirimu.\*\*  
niringili.

<sup>48</sup> Juda yambo naa moloringi yambomane  
aku niringili pilkulie konopu siku "Ailimunge  
ungumu peanga." niringi. Pulu Yemone 'Alieli  
konde molko konjiku mindi pang.' nimbe mako  
torumu yambomane 'Ungu nikimbili mele sike.'  
ningu tondolo munduku pilku liringi.

<sup>49</sup> Elte moloringili koleamanga pali Ailimunge  
ungumu pupe kapola terimu.

<sup>50</sup> Nakolo Juda yambomane Pulu Yemo pip-  
ili kolko piliringi ambo nomime kinie kanu  
koleana ye ailime kinie teko mumindili kon-  
jiringi, kinie enene yamboma pali teko mu-  
mindili konjiku, Pollo Banapositolo 'Enenga  
koleana naa molangili.' ningu toko makoroko  
ulsu munduringi.

<sup>51</sup> Aku teringimunge 'Teko kenjikimili  
kanangi.' ningulu eltenga kimbuna ma kulu  
tokolo\* Akoniamo taono puringili.

<sup>52</sup> Andiyoko taonona moloringi Yesusinge lom-  
bili andoli yamboma\* paa konopu aisili siku,  
Mini Kake Telimu ene kinie molopa kapola tepili  
moloringi.

## 14

<sup>1</sup> Pollo Banapositolo Akoniamo taono pukul-  
ulie niringilimuni, alieli taono tengah sukundu  
pukululie teringili mele aku siku Akoniamo

kepe Juda yamboma maku toko Pulu Yemonga ungumu piliringi ulkena sukundu pukulu ungu mane siringili. Ningu konjiringiline pilkulie Juda yamboma kinie yambo lupema\* kinie enenga yambo aisili 'Yesusi molopa terimu mele nikimbili ungumu paa sike.' ningu tondolo munduku piliringi.\*\*

<sup>2</sup> Nakolo 'Kolo tokombele.' ningu ungu naa piliringi Juda yambomane yambo lupema teko mumindili konjiku kondi toringi kinie yambo lupemane Pollo kinie Banapasitolo konopu keri panjiringi.

<sup>3</sup> Pollo Banapasitolo wale aisili Akoniamo taono molko 'Ailimunge' ningulu ungu pipili naa kolkolo tondolo munduku niringili kinie, Pulu Yemone 'Nane yambo we kondo kololi ungu ninjikimbilim 'Paa sike nikimbili.' ningu, pilku liengi!' nimbe 'Eltene 'aku sipe mele, lipe ora simbe ulu tondolo\* aisili teangili.' nimbe lipe taponjirimu kinie ulu tondolo aisili teringili. 'Eltene ulu tondoloma tenegele kinie yambomane kanokolie, 'Paa sike Pulu Yemonga ungumu nikimbili lepamo.' ningu piliengi!' nimbe Pulu Yemone 'Aku siku ulu tondoloma teangili.' nirimu.

<sup>4</sup> Kanu kinie aku taonona yamboma konopu talo teko panjiku moloringi. Marene "Juda yambomane nikimilim sike nikimili." niringi, marene "Pollo Banapositolone nikimbilim sike nikimbili." niringi.

<sup>5</sup> Juda yamboma kinie yambo lupema kinie enene 'Pollo Banapositolo tepo kenjipu kouni tamili.' ningu langi niringi

Lipe Mundurumu Yema 14:6 lxxxviii Lipe Mundurumu Yema 14:13

<sup>6</sup> nakolo langi niringi mele pilkululie elte kowa pukulu kolea LLikoniya poropinji pukulu kanuna LLisira taono kinie Depi taono kinie kolea nondopa lerimu koleamanga pali andokolo

<sup>7</sup> temane peangamo we toko siliku andoringili.

<sup>8</sup> LLisira taono ye te kimbu tambululimu molorumu. Anumuni merimu kinie kimbu tambululimu merimu,\* walsikale kepe aulke naa andorumu.

<sup>9</sup> Pollone ungu nirimu mele pilipe molorumu. Pollone yu nemo nemo nimbe kanopalie, ‘Pulu Yemone na manda tepa kondé limbe.’ nimbe pilipe molorumu kanopalie,

<sup>10</sup> tondolo mundupelie yundu nimbendo: “Nu kimbu kambilku ola angili!” nirimu. Kanu kinie ye kanumu walsikale kimbu kambilipe ola angilipe purumu.

<sup>11</sup> Pollone ye kimbu tambulurumumu tepa kondé lirimu kanokolie yambo maku toko moloringimene enenga LLikoniya ungu lelko ningindu: “Olio popo tolemolo pulu yemanga ye talo manie ongo mana ye au lelkolo olio molemolona okombele lepamo.” niringi.

<sup>12</sup> Pollo ungu aisili nirimuna kanokolie ‘Yu pulu ye Emisi’ niringi.\* Banapasi Pollo kinie tapu toko oringiline kanokolie ‘Yu pulu ye Susi.’ niringi.\*\*

<sup>13</sup> Kolo toli pulu ye Susi kanumunge tamandu ulkemo\* kanu taonona ulsukundu angilirimu, yunge ala yemo kongi kao pelea pokore kinie pillawa sindi mulkewe pokore kinie lipe ‘Elte au sipu popo topo kongime kalopo siemili.’ nimbe taono pala kerepuluna memba orumu.

<sup>14</sup> Nakolo Yesusini “Nanga kongonomo tenjipale.” nimbe lipe mundurumu ye\* Banapasi kinie Pollotolone tengi teringi mele pilku keri pilkululie eltenga wale pakolime liku sungu sikulu,\*\* yamboma maku toringine lkisiku ru niliku pukululie ningilindu:

<sup>15</sup> “Yema, aku ulumu nambemuna tekemeleye? Olto ene mele, mana yetolo mindi. Temane peangamo ene topo simbulú ombulu. Ene pulu ye kolo toli koropama munduku kelko, kanu mele koropama bulu siku, mulu kinie ma kinie nomu kusa kinie melema pali tepa, yu yuyu konde molemo Pulu Yemonga ungumu ‘Pilku liengi!’ nimbululie, nimbu simbulú ombulu kanumu.

<sup>16</sup> Ou sike yambo lupe lupema enenga konopuni pilku ulu teringime Pulu Yemone kanopa we siye kolopa, teko molonge kinie yu kanopa peanga kanomba mele kamu naa nimbe para sirimu.

<sup>17</sup> Nakolo ou Pulu Yemone ‘Na molio mele naa piliengi!’ nimbe melema pali lopi naa terimu. Yuni olia ‘Nane ene kondoo kolopo tepo konjilio mele kanangi.’ nimbe ‘Lo manie ombo langi peangama wendo opili, ene nongo kapola tenjiku konopu siku molangi.’ nimbe aku sipe terimu.” nirimu.

<sup>18</sup> Eltene aku niringili nakolo yambomane ‘Elte pulu yetolo.’ ningu popo toko kongime kalonge teringi uluma ‘Munduku keleangi.’ ningulu tondolo munduku karaye teko “Molo!” niringili kinie munduku keleringi.

<sup>19</sup> Kanu kinie Akoniamo taono kinie kolea

Pisidia poropinji lerimu Andiyoko taono kinie moloringi Juda yambo mare LLisira taono ongolie ene kondi toringi kinie enene Pollo kouni tokolie, 'Kolomu.' konopu lelko yunge onomo kunduku liku mengo puku taonona ulsukundu toko ele teringi.

<sup>20</sup> Nakolo Yesusinge lombili andoli yamboma yu lerimuna ongo kakapu teringi kinie yu ola angilipe kelepa taonona sukundu purumu.

Opalikundu Banapasi kinie Depi taono puringili.

<sup>21</sup> Akuna temane peangamo toko siringili kinie yambo aisili Yesusinge ungumu pilku liringi.

Pe elte kelko LLisira taono yando ongolo, Akoniamo taono ongolo kolea Pisidia poropinji lerimu Andiyoko taono oringili.

<sup>22</sup> Kanu taonomanga Yesusinge lombili andoli yamboma "Pulu Yemo ye nomi kingi molopa nokolemo koleana\*" ou naa pupu ya mana molopolie Kirasinge yamboma molemolomonga mindili nombo umbunime memolo nakolo 'Paa sike Pulu Yemo nokopa molemo koleana pambo.' ningu yunge ungumu munduku naa kelko, tondolo munduku pilku molai." ningu silikulu oringili.

<sup>23</sup> Pollo Banapasitolone taonomanga pali Kirasinge yambo talapemanga tapu yema\* mako tonjikulu, Pulu Yemo kinie ungu ningu mawa tengelendo langi mi toko naa nongololie ningilindu: "'Aili\*\* Yesusi Pulu Yemone 'Ene nokopa konjimbe ye te lipu mundumbu.' nimbe mako torumu ye nomi Kirasimu ombo sike lipe taponjipe mindili nolemelka aulkena wendo

lirimu., Yu sike.' ningu tondolo munduku pilimele yemo ene nokopa konjipili." niringili.

<sup>24</sup> Kolea Pisidia poropinji ongololie, pe kolea Pambillia poropinji sukundu ongolo,

<sup>25</sup> kanuna Peka taono ongo yamboma ungumu nengu silikulu, Atelliya taono oringili.

<sup>26</sup> Atelliya taono munduku kelko, sipine kelko kolea Siria poropinji lerimu kolea aili Andiyoko\* kamu oringili. I kongono teko liringili kongonomo ou pulu monjiku tengèle mele yambomane "Pulu Yemone i kongonomo sikimu yuni elte kondo kolopa lipe taponjipili i kongonomo tepale."\*\*\* nengu liku munduringi kolea aili\*\*\* kanuna kongono teko pora sikululie kelko sukundu oringili kanumu.

<sup>27</sup> Kanuna ongo molkololie, Kirasinge yambo talapemo liku maku tokolo, Pulu Yemone elte lipe taponjirimu kinie teringili mele kepe, Pulu Yemone Juda yambomanga ulsukundu molemele yambo lupemane yunge ungumu pilku liku yunge koleana manda pungí aulkemo akisinjirimu mele kepe, temane toko siringili.

<sup>28</sup> Kanu kinie elte akuna Yesusinge lombili andoli yamboma\* kinie wale aisili pea moloringi.

## 15

<sup>1</sup> Juda ye mare kolea Judia disiriki molko kolea aili Andiyoko maniendo ongolie Kirasi pilku moloringi yambo lupema ungu mane siku moloringi. Enene ningindu: "Kirasinge ungumu manjiku pilimele kapola naa temba. Enene Mosisinge ungu manemo pilku yemanga kangi te kopisiku makaye teko wendo naa língi liemo\*

mindili nolemelka aulkena wendo ongo molko konjingí pungí aulkemo Pulu Yemone naa lipe taponjimbe.”\*\* niringi.

<sup>2</sup> Aku niringimunge Pollo Banapasitolone ene kinie kerepali ningu irinele teringi. Aku munge Kirasinge yambomane Pollo Banapasitolone kinie Kirasinge ye mare kinie “Ene kolea aili Jerusalleme puku Yesusini “Nanga kongonomo tenjipai.” nimbe lipe mundurumu yema kinie ‚Kirasinge yambo talape moloringimenga, tapu yema kinie\* puku kanoko, i irinele teke-molomonga ningu sumbi sinjengi puku walsipai.” ningu liku munduringi.

<sup>3</sup> Kirasinge yambo talape Andiyoko taonona moloringimene\* “Ene pai.” ningu munduringi kinie Jerusalleme pungindu kolea Ponisia poropinji kinie kolea Sameria poropinji kinie puku, ou kolea lupe lupema temane peangamo toko siliku andoringili kinie Juda yambo naa molko yambo lupe moloringi yamboma konopu alowa teko Pulu Yemonga ungumu pilku liringi mele temanemo toko siliku purringi. Kirasinge yambo temanemo piliringimene paa konopu siringi.

<sup>4</sup> Jerusalleme kamu suku purringi kinie Kirasinge yamboma kinie, enenga tapu yema kinie, Yesusini lipe mundurumu yema kinie enene “Papu okomele.” niringi. Kanu kinie Pollo Banapasitolone Pulu Yemone elte lipe taponjirimu kinie teringili mele pali temane toko siringili.

<sup>5</sup> Kanu kinie Parisi ye\* Kirasinge ungumu pilku liringi yema ola angikulie ningindu: “Juda yambo naa molemele yambo lupemane ‘Yesusi

Kirasinge yamboma molamili.' ningu yemanga kangi te kopisiku makaye teko, Mosisinge ungu manema\*\* pali pilku liku tengen panjiku teangi." niringi.

<sup>6</sup> Kanu kinie Yesusini lipe mundurumu yema kinie tapu yema kinie 'I ungu wendo okomomo lipu sumbi siemili.' ningu maku toringi.

<sup>7</sup> Ene ungu aisili kerepali ningu moloringi kinie Pita ola angilipelie enendo nimbendo: "Angokeme, ene ou ulu te wendo orumu mele pilku molemele. Pulu Yemone ene molemelemanga na mako topalie, "Kirasinge temane peangamo Juda yambo naa molemele yambo lupema pilku liengi\* nu puku toko sipui." nirimu.\*\*

<sup>8</sup> Pulu Ye yambomanga pali konopumanga kanolemo Pulu Yemone kanu yambo lupema konopu alowa teko yunge ungumu pilku liringi kinie kanopalie 'Aku tekemelemonga na konopu peanga pekemo mele Juda yamboma kanangi.' nimbe Mini Kake Telimu, ou olio Juda yamboma sirimu mele, kinié ene yambo lupema aku sipe sirimu.

<sup>9</sup> Yuni ene yambo lupema ulu te lupe tepa, olio Juda yamboma ulu te lupe tepa, naa terimu. Ene 'Yunge ungumu sike ungumu.' ningu tondolo munduku piliringi kinie 'Enenga konopuma kake tepili.' nirimu.

<sup>10</sup> "Akumunge kinié ene nanga ungumu pilku molemele Juda yema, enene "Yambo lupema aku siku teangi." nikimilimu nambemuna 'Pulu Yemo olio kinie mumindili kolomba molo molonje.' ningu aku siku nikimiliye? Ou olionga anda kolepalime kinie olio umbuni manda naa

merimulu umbunimu kinie enene i yambo lupe Yesusinge lombili andoli yambo molemelema\* nambemuna ‘meangi.’ nikimiliye? Pulu Yemone olio Juda yamboma “Teangi.” nimbe ungu mane sirimura Mosisini pilipe yando nimbe sirimu ungu manema temolondo perelemolo aku unguma “Yambo lupema teangi.” nikimilimu paa kapola naa tekemo.

<sup>11</sup> Aku siku paa naa niengi, molo! Olio pilimolo mele i sipe: Aili Yesusini\* kanu yambo lupema we kondo kolopa lipe taponjipe mindili nolemelka aulkena wendo lipe yu kinie pea molko konjingí aulkena lipe monjimbe mele olio Juda yamboma kepe aku sipela we kondo kolopa lipe taponjilimo. „Pulu Yemo kinie kapola kapola molomolo aulke te lupe paa molo.” nimbe Pitane aku sipe nirimu.

<sup>12</sup> Kanu kinie Banapasi kinie Pollotolone Pulu Yemone elte lipe taponjirimu kinie kolea lupemanga andoko „Pulu Yemo kinie tapu toko moloringili, lipe ora sirimu ulu tondoloma\* teringili mele temane toko siringili kinie maku toringi yamboma pali ungu naa ningu we pilku moloringi.

<sup>13</sup> Eltene temane tokolo pora siringili kinie Jemisini\* nimbendo: “Angokeme, na ungu te niembo piliei.

<sup>14</sup> Pulu Yemone yambo lupemanga ‘Mare nanga yamboma molangi kene lipu taponjembo.’ nimbe molemo mele ou kumbi lepa lipe ora sirimu mele Saimono Pitane ene nimbe simu.

<sup>15</sup> Nimbe simu kanu mele kinie, Pulu Yemone ungu umbu tonjirimura pilku yamboma ningu

siringi yemane\* ou ungu ningu bokuna toringi  
mele kinie, telu sipe. Aku bokuna toringi  
molemo mele i sipe:

**16** ‘Pulu Ye Ailimuni ungu iku te topalie nim-  
bendo:

“Na pe kelepo yando ombolie,  
ye nomi kingi Depisinge ulke\* toko tekisin-  
jiringimu

altopo ombo takombo.

Ulke melema keri lerimuma kondenga lipu  
ou angilirimu mele altopo takombo.

**17** Akumunge yambo lupema pali  
Pulu Ye Ailimu andoko koronge.

‘Nanga yamboma.’ nimbu mako torundu yam-  
boma  
na andoko koronge.”

**18** nimbe koronga ou i unguma  
nimbe para sirimu Pulu Ye Ailimu yuni  
aku sipe nikimu.\*  
nimbe bokuna aku sipe nimbe molemo.

**19** “Akumunge nanga konopuni pilkiru mele i  
sipe: ‘Yambo lupe konopu alowa teko ‘Pulu Yemo  
pilipu molamili.’ ningí yamboma mindili lipu  
simulú kinie kapola naa temba.’ konopu lekero.

**20** Aku ulumu mundupu kelepo ulu te lupe  
teamili konopu lekero mele i sipe: ‘Pepá te topo  
mundupulie i sipu niemili: ‘Melema liku ola  
anjiku, “Olionga pulu yema.” ningulie popo  
toko langi kalko silimele langime ‘Kalaro mololi  
langime.’ ningu naa nongo,\* wa ulu kerinele  
naa teko, kongi kepe melema ‘Meme naa omba  
pupili.’ ningu nomi kolomongo naa tengema naa

nongo, melemanga meme naa nangi.”\*\* nimbu pepá tamili.’ konopu lekero.

<sup>21</sup> ‘Mosisini Pulu Yemone sirimu ungu manema nimbe sirimuma koleamanga pali paa koronga ou ningu siringi mele yandopa yandopa kinié kepe ningu silimele, alie li Juda yambomane Sambate walemanga pali\* koro molko Pulu Yemonga ungumu maku toko pilimele ulkemanga kanu unguma Mosisini torumu bokumanga kambu tolemele „pilimele kinie i yambo lupe Kirasinge yambo molemelema ‘naa teangi.’ nikiru mele pea maku toko pilkulie naa tengé, kene aku siku ‘naa teangi.’ nimbu pepá topo siemili.’ konopu lekero.” nirimu.

Aku nirimu kinie enene “E.” niringi.

<sup>22</sup> Kanu kinie Yesusini lipe mundurumu yema kinie „Kirasinge yamboma nokoringi, tapu yema kinie Kirasinge yamboma pea pali kinie enene ningindu: “Pollo Banapasitolo kinie olionga ye mare kolea aili Andiyoko pea tapu toko pangipu mundemili.” niringi. Aku ningulie, Judasi, yunge imbi te Basipasi,\* yu kinie, Saillasi kinie mako toringi. Kanu yetolo yambomanga pali kumbine moloringilitolo.

<sup>23</sup> Kanu yetolo mako tokolie, ‘Elte mengo pangili.’ ningu pepá te i siku toringi:  
‘Olio, Yesusini lipe mundurumu yema kinie,  
tapu yema kinie,  
olio enenga angenalini i pepámo topo,  
ene kolea aili Andiyoko molemele yambo lupema  
kepe  
kolea Siria poropinji molemele yambo lupema  
kepe

kolea Sillisia poropinji molemele yambo lupema  
kepe

kolea lupe lupemanga molemele yambo lupema  
kepe

ene pali pepá topo

‘Angokeme, ene kapola molemeleye?’ nikimulu.

<sup>24</sup> Olio pilirimulu, olionga ye mare olio  
molorumuluna munduku kelko puku, olione  
“Teai.” naa nimbu sirimulu mele teringi.\*

Kanu yemane niringi ungumuni enenga konopu  
toko

bulu balu sinjiku ene ningu embambo siringi.

<sup>25</sup> Kanumunge “Olione olionga pulu lemo ye  
peanga

Banapasi Pollotolo kinie ye mare mako topo,  
ene elte kinie pea tapu toko pangì mundemili.”  
nimbu panjirimulu.

<sup>26</sup> Banapasi Pollotolone ‘Olto toko konjingí kinie  
kolombulu liemo unguri molo.’ ningulu pipili  
naa kolko olionga Ailimu Yesusi Kirasinge  
kongonoma tenjikulu yunge imbi  
ambolko ola linjiringili.

<sup>27</sup> ‚Aku sipu nimbu panjirimulu, akumunge,  
olione Judasi Saillasitolo mako topo,  
‘Pepá tokomolomo ene kanoko pilingí kinie  
i yetolone ungu ningu singilí kinie  
‘Enene aku siku paa sike

ningu panjiringi lepamo.’ ningu piliengi!’  
nimbu elte mako topo lipu mundukumulu.

<sup>28</sup> Mini Kake Telimuni olio lipe taponjirimu kinie  
olio pilipulie nimbu panjirimulu mele i sipe:  
Olione umbuni lupe aisili ene simulú  
kapola naa temba. I siku mindi pilku teangi:

29 Melema liku ola anjiku, "Olionga pulu yema." ningulie popo toko kalko silimele langime 'Kalaro mololi langime.' ningu naa nongo, melemanga meme naa nongo, kongi kepe melema 'Meme naa ombo pupili.' ningu nomi kolomongo naa tengema naa nongo, wa ulu kerinele naa teangi.  
Aku uluma naa tenge kinie akumu papu.  
Aku pea.

Kapola, ene molko konjeyo.'  
'ninguaku siku pepá te toringi..'

30 Pepá toko pora sikulie, "Mengo puku kolea aili Andiyoko maniendo pai." niringi kinie yema akuna puku Kirasinge yamboma liku maku toko pepá kanumu siringi.

31 Pepá toko ungu niringi mele yambomane kanokolie 'Ungu paa peanga.' ningu kanoko konopu siringi.

32 Judasi kinie Saillasitolo elte Pulu Yemonga ungu umbu tonjirimuma pilkulu yamboma ningu siringili yetolo moloringilimunge Kirasinge yamboma 'Molko konjengi.' ningulu ungu peanga aisili ningu siringili.

33 Kanu yetolo wale aisili mele Andiyoko moloringili kinie pe Kirasinge yambomane "Elte yando 'pale.' ningu liku munduringime molemeleno elte kelko konopu pe nipili pale." niringi.

34 (Nakolo Saillasi yu 'Andiyoko we molambo.' nimbe naa purumu.)

35 Pollo kinie Banapasitolo kolea aili Andiyoko molkolo, ye mare lupe aisili pea Ailimunge ungumu yamboma mane siku temane peangamo toko siringi.

<sup>36</sup> Pe wale aisili omba purumu kinie Pollone Banapasindu nimbendo: “Olto kelepo ou Ailimunge ungumu nimbu silipu andorumbulu koleamanga altopo pupu, Kirasinge yamboma kapola molemelenje, nambe telemelenje, kanopambolo.” nirimu.

<sup>37</sup> Banapasini nimbendo: “Jono Mako pea tapu topo pamili.” nirimu.

<sup>38</sup> Pollone nimbendo: “Molo. Ou pea tapu topo kolea Pambilia purumulu kinie olto mundupe kelepa kongono naa tepa yu purumu kanumu.\* Kinié pea naa pumulú.” nirimu.

<sup>39</sup> Aku nirimu kinie kerepali ningulu kongono tere lelko naa tepuringili. Banapasini Makondo “Pea tapu topo pambili oi.” nimbe memba pupe, sipi tenga kolea Saipirasi puringili.

<sup>40</sup> Pollone Saillasindu “Pea tapu topo pambili.” nirimu. Pungilí teringili kinie Kirasinge yambomane ningindu: “Pulu Ye Ailimuni elte we kondo kolopa nokopa konjipili pangili.”\* niringi kinie elte kolea aili Andiyoko munduku kelkolo puringili.

<sup>41</sup> Elte kolea Siria poropinji kinie kolea Silisia poropinji kinie Kirasinge yambo talapema taonomanga lupe lupe moloringi yamboma ‘Ene molko konjiku Pulu Yemonga ungumu tondolo munduku pilku molangi.’ ningulu ungu mane siliku andoringili.

## 16

<sup>1</sup> Pollo Saillasitolo kolea Depi taono pukulu LLisira taono puringili kinie kanuna Yesusinge lombili andoli ye te molorumu, yemonga imbimu

Timoti. Yu Juda ambo tengah malo. Anumu Kirasi pilili ambomo molorumula, nakolo lapa Juda ye te molo, yu ye te lupe.\*

<sup>2</sup> LLisira kinie Akoniamo taonotolonga „Kirasi pilku moloringi, angenupilimene ningindu: “Timoti yu ulu peangama tepa, yu paa molopa konjilimo yemo.” niringi.

<sup>3</sup> Pollone ‘Timoti pea pamili.’ konopu lepalie yunge kangi te kopisipe wendo linjirimu. Juda yambo aku koleana peringimene ‘‘Timoti lapa yu Juda ye te molo,’ ningu ‘Timoti kepe ye lupemo.’ ningu yunge ungu nimbéma liku su singí.’ nimbelie Pollone Timotinge kangi te kopisinjirimu.\*

<sup>4</sup> Kanu kinie ene koleamanga puku, Yesusini “Nanga kongonomo tenjipai.” nimbe lipe mundurumu yema kinie Kirasinge yambomanga tapu yema kinie\* enene ou Jerusalleme maku toko Kirasi pilili yambo lupemane tengé mele, ungu mane siku ningu panjiringi ungu akumu,\*\* koleamanga pali ningu siliku andoringi.

<sup>5</sup> Aku teringimunge Kirasi yambo talapemanga yambomane\* ‘Sike.’ ningu piliringi mele tondolo pupe, enenga yambo talapemanga yambo aisili taki taki sukundu sukundu oringi, yambo kambumu olandopa purumu.

<sup>6</sup> Pollo yu kinie pea tapu toko puringili yetolo kinie ene Mini Kake Telimuni ‘Kolea Esia poropinji ungu naa ningu sipai.’ nirimuna ene kolea Pirisia poropinji kinie kolea Gallesia poropinji kinie suku singi owena koleamanga puku ‘yamboma ungu ningu siringi.‘

<sup>7</sup> Ningu siliku puku kolea Misia poropinji

Lipe Mundurumu Yema 16:8        ci        Lipe Mundurumu Yema 16:13

kinie kolea Bitinia poropinji kinie owena pukulie 'Kolea Bitinia poropinji pamolo.' niringi nakolo Yesusinge Minimuni 'Molo.' nimbe aulkemo pipi sirimu.

<sup>8</sup> Yuni "Molo." nirimu pilkulie kolea Misia munduku kelko ongo puku nomu kusa kélona Toroasi taono puringi.

<sup>9</sup> Kanu kinie akuna moloringi kinie ipulueli Pollo kumbu mele tepa kanorumu kinie kolea Masedonia poropinji ye te omba ola angilipe Pollondo mawa tepalie nimbendo: "Nu nomu kusa lumbilku yakondo ongo olio kolea Masedonia yamboma liku taponjeni oi." nirimu.

<sup>10</sup> Pollone aku sipe kanorumu kinie olione\* nimulundu: "Kapola, kolea Masedonia poropinji pamolo." nirimulu. 'Pulu Yemone olio walsipe 'Akuna nanga temane peangamo yamboma toko siei.' nikimu lepamo kene' nimbu pilipulie "Sumbi sipu pamolo." nimbu pumulú terimulu.

<sup>11</sup> Olio sipine pupu Toroasi taono mundupu kelepo sumbi sipu kolea Samoteresi purumulu. Kanuna pepolie opalikundu Niapolisi taono pupu\* sipine wendo purumulu.

<sup>12</sup> Niapolisi taono mundupu kelepo kolea aili Pillipai purumulu. Pillipai Romo yambo aisili moloringi taono aili te; yu kolea Masedonia poropinji sukundu taono aili te. Akuna wale mare molorumulu.

<sup>13</sup> Kanu kinie „Juda yambomanga\* koro moloringi, wale Sambatemonga\*\* kolea aili Pillipai pala kerepuluna ulsu pupu no kélona purumulu. Olio konopuni pilipulie 'Akuna „Juda yamboma puku maku toko, Pulu Yemo popo

Lipe Mundurumu Yema 16:14      cii      Lipe Mundurumu Yema 16:17

toko yu kinie ungu ningí kolea te lemonje.' konopu lepo purumulu.\*\*\* Akuna pupu kanorumulu kinie ambo mare maku toko moloringi kanopolie manie molopo kanu amboma ungu nimbu sirimulu.

<sup>14</sup> Ungu pilku moloringi ambomanga te, ambomonga imbimu 'LLidia' niringi, kanu ambomonga kolea Tayatara taono; yu mulu wambale kondolimene bisinete terimu; yu Juda ambo te molo, nakolo yu Pulu Yemonga ungu pilipe popo topa molorumu ambomo. Kanu ambomo Ailimuni\* 'Pollo ungu nimbema pilipe lipili.' nimbe yunge konopuna ungu pilimbe aulkemo sumbi sinjirimuna ungumu pilipe lir imu.

<sup>15</sup> Kanu kinie ambo LLidia kinie yunge ulkena moloringi yamboma kinie ene no liringi. No lipe pora sipelie yuni oliondo nimbendo: " 'Yu 'Ailimu sike.' nimbe tondolo mundupe pilimo.' konopu lengi liemo nanga ulkena molamili wang'i." nirimu. "Yuni olio karaye tepa walsikimu kene olio yunge ungu tengenji pamolo." nimbu purumulu.

<sup>16</sup> Walse olio ,Juda yamboma puku maku toko, Pulu Yemo popo toko yu kinie ungu niringi koleana pumulú purumulu kinie ye marenga kongono kendemande tenjirimu ambo wenepo te aulkena kanorumulu. Yunge konopuna kuru te molorumumuni yu yamboma kinie pe ulu mare wendo ombá mele nimbe sirimu mele pilipe yamboma nimbe sirimu kinie yu nokoringi yemane kou mone aisili liringi.

<sup>17</sup> Pollo kinie olio purumulu kinie kanu am-

Lipe Mundurumu Yema 16:18      ciii      Lipe Mundurumu Yema 16:22

bomo olio lombili ombo tondolo ru nimbeline  
nimbendo: "I yema Paa Olandopa Pulu Ye  
Ailimunge kendemandema. Pulu Yemone yam-  
boma lipe taponjipe mindili naa nongo molko  
konjingí aulkemo\* liku ora singí okomele." nir-  
imu.

<sup>18</sup> Alieli kanu ambo wenepomo aku sipe  
mindi nirimu kinie Pollone pilipe keri pilipelie,  
topele topa, ambo wenepomonga konopuna  
kuru molorumu kanu kurumundu nimbendo:  
"Nane Yesusi Kirasi walsipu yunge tondolomone  
nundu nikiru: 'Nu i ambo wenepomo munduku  
kelko ongo wendo pui.' nikiru." nirimu. Kanu  
kinie kurumu ambo kanumu walsikale mundupe  
kelepa ombo wendo purumu.

<sup>19</sup> Ambomo nokoringi yemane kanokolie,  
enenga kou mone liringi aulke kanumu ombo  
wendo purumu kanokolie niringimuni, Pollo  
kinie Saillasitolo ongo ambolko liku, 'Ye ailimene  
kote tenjengi.' ningulie, ki kunduku yamboma  
taki taki maku toko moloringi koleana mengo  
puringi.

<sup>20</sup> Elte kote pilili yema moloringine mengo  
pukulie ningindu: "I yetolo Juda yetolo. Eltene  
olianga yamboma teko mini wale mundunjingi-  
line membo okomolo.

<sup>21</sup> 'Olio Romo yamboma manda naa pilipu,  
manda naa temolo.' nilimolo ulu mare "Teangi."  
níngili." niringi.

<sup>22</sup> Yambo moloringimene 'Paa mongo liengili.'  
ningu "Elte paa sike aku siku tengili." niringi.  
Kanu kinie kote piliringi yemane ningindu: "El-  
tenga wale pakolime wendo linjiku, ka pulsene

elite tai." niringi.

<sup>23</sup> Kanu kinie enene ka pulsene elite toko toko ka sikulie, ka ulke nokorumu yemondo ningindu: "I yetolo mimi siku nokoi." niringi.

<sup>24</sup> Ka ulke nokorumu yemo enene aku siku ungu tondolo munduku niringi pilipelie, elite lipe memba paa suluminiana sukundu pupe eltenga kimbutolo unju pellangene talapu lipe lloko torumu.

<sup>25</sup> Kanu kinie ai burumi Pollo kinie Saillasitolo Pulu Yemo kinie ungu ningulu 'Pulu Yemonga imbi ambolopo ola linjembili.' ningulu konana niringili kinie ka ulkena pea peringi yambomane pilku moloringi.

<sup>26</sup> Kanu kinie walsikale ma jimi jimi aili te tepalie, ka ulke kanumu kolkalu sipe nambune kanuma topa bulsupe bulu balu terimu. Ka ulkena peringi yamboma ka senene ka toringime pali wendo orumu, ka yamboma we moloringi.

<sup>27</sup> Kanu kinie ka ulke nokorumu yemo makilipe ola molopa kanorumu kinie nambune kanuma pali bulsupe lerimu kanopalie 'Ka yamboma ongo púngi lepamo.' konopu lepalie, yunge opa teli lou pulse kanumu kulu topa wendo lipe yu yuyu 'Kolambo.' nimbe nomi karu lemba terimu.

<sup>28</sup> Nakolo Pollone yundu ru nimbelie nimbendo: "Nu nunu uluri naa tei! Olio pali ya we molemolo." nirimu.

<sup>29</sup> Kanu kinie ene nokorumu yemone ru nimbe "Kiye kandoko mengo wai!" nimbe, yu ombo Pollo kinie Saillasitolo moloringiline lkisipe sukundu ombo, yu pungu pungu nimbe

Lipe Mundurumu Yema 16:30      cv      Lipe Mundurumu Yema 16:36

mini wale mundupelie, eltenga kumbikerena tamalu perimu.

<sup>30</sup> Kanu kinie elte lipe memba pena pupelie, walsipelie nimbendo: "Yetolo, na nambe tembo kinie manda we molopo mongo naa limbuye?" nirimu.

<sup>31</sup> Eltene yundu ningilindu: "Nu Aili Yesusi 'Yu sike Pulu Yemonga Malo molopa na manda lipe taponjimbe.' ningu tondolo munduku pilini kinie yuni nu lipe taponjipe mindili nolena aulkena wendo lipe yu kinie molko konjini aulkena lipe monjimbe.\* Nu kinie nunge yamboma kinie ene aku sipe lipe taponjimbe molko konjingi." niringili.

<sup>32</sup> Kanu kinie eltene yu kinie yunge yamboma kinie enendo Ailimunge ungumu ningu siringili.

<sup>33</sup> Sike ai burumiaku siku teko moloringi nakolo yuni elte lipe memba pupe elte toringi ereli kanuma kulumiye tonjirimu. Kanu enamonga yu kinie yunge yamboma kinie no liringi.

<sup>34</sup> Kanu kinie pe yuni elte lipe memba yunge ulke pupe elte langi sirimu. Yunge yamboma kinie ene 'konopu alowa teko, Pulu Yemo 'Yu telumu mindi sike molemo.' ningu tondolo munduku pilku konopu siringi.

<sup>35</sup> Kolea tangorumu kinie kote piliringi yemane enenga ele yema ka ulkena liku mundukulie ningindu: "Yetolo wendo liku munduku 'Pangili.' niei." niringi.

<sup>36</sup> I ungu niringime ka ulke nokorumu yemone Pollo nimbe sipelie nimbendo: "Kote pilimele yemane 'Elte pangili.' ningu mundungi kene pangili. Elte konopu pe nipili pangili." nirimu.

**37** Nakolo Pollone ele yemando nimbendo: “Olto Romo yetolo\* nakolo kote naa pilkulie yambo aisilini kanoko molangi olto we ka pulsene toko ka síngi kanumu. Pe kinié ‘Yamboma naa kanangi kiyongo nimbu lipu mundumulú.’ ningu nikimiliye? Paa manda molo. Olto ka síngi yema eneno ongo olto ‘Pale.’ niengi.” nirimu.

**38** Kanu kinie ele yema Pollone aku nirimu pilkulie kelko anju puku kote piliringi yema ningu siringi. Kanu kinie kote piliringi yemane ungu niringilimu pilkulie ‘Elte Romo yetolo lepamo.’ ningu mini wale mundukulie niringimuni,

**39** elte moloringiline ongo “Tepo kénjimulu lepamo.” ningu ka ulkena wendo liku mengo ulsu ongolie ningindu: “I kolea ailimu munduku kelkolo pangili.” niringi.

**40** Kanu kinie Pollo kinie Saillasitolo ka ulkemo munduku kelko pukululie niringilimuni, ambo LLidianga ulkena pukulu Yesusinge yambo talape akuna maku toringimendo ningilindu: “Ungu nímbuluma munduku naa kelko tondolo munduku pilku molangi.” ningulu, ungu mare ningu sikululie elte puringili.

## 17

**1** Pollo Saillasitolo Pillipai taono munduku kelko pukulu, kolea Ambipollisi kinie Apollonia kinie kanu taonotolo ongo munduku kelko anju pukulu, Tesallonaika taono puringili. Juda yamboma maku toko Pulu Yemonga ungumu piliringi ulke te akuna angilirimu.

<sup>2</sup> Kanu kinie Pollo yu ou alieli terimu mele tembando Juda yamboma maku toko Pulu Yemonga ungumu piliringi ulkena purumu. Kanuna yambo koro moloringi wale Sambate yepoko\* Pulu Yemonga bokuna ungu ou toringi molorumuma ‘Ene piliengi!’ nimbe paa mimi sipe nimbe sipe,

<sup>3</sup> Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu\* mindili nomba kolopalie kelepa lomboropa ola molomba mele, bokuna aku sipe wendo ombá mele ou toringi molorumu mele pilipelie, ene nimbe sirimu. Pe yuni nimbendo: “I ye Yesusi temane topo sikiru aku yemo kinie Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu kinie akumu ye telumundu nikiru.” nirimu.

<sup>4</sup> Juda yambo mare yuni nirimu ungumu pilkulie, ‘Yu paa sike nikimu.’ ningu Pollo Saillasitolo lombili puringi. Juda yamboma pea Pulu Yemonga ungu piliringi yambo lupe\* aisili lombili puringila. Ye ailimenga menupili aisili aku siku lombili puringila.

<sup>5</sup> Nakolo yambo aisili Juda ye ailime munduku kelko Pollo Saillasitolo lombili puringine kanokolie Juda yema ene elte kinie konopu keri panjiringi. Konopu keri panjikulie yamboma maku to pu opu teringi koleana mongo kondoringi ye mare moloringime liku maku toko, yamboma pali teko mumindili konjiku “Andoko ru niengi.” niringi kinie, lkisiku puku Jesononga ulkena ‘Elte molongele.’ ningu

koroko, yamboma liku singíndu kororingi.

<sup>6</sup> Pollo Saillasitolo naa moloringiline koroko kelkolie, Jesono kinie Kirasinge ye mare kinie liku mengo kanu koleamonga tapu yema moloringine mengo ru niliku pukulie ningindu: "Koleamanga pali teko kenjiringili yetolo kinié ya olionga taonona ongili.

<sup>7</sup> Ongili kinie Jesonone "Elte pea molamili wale." nimbe yunge ulkena memba pumula. Enene "Olionga Romo koleamanga pali nokolemo Ye Paa Aili Kumbine Sisamonga ungu manema kamu manie pupili, ye te, imbi Yesusi, kolo wangopa ye nomi kingimu molemo." nilimele." niringi.

<sup>8</sup> Aku niringi pilkulie yambo maku toringime kinie 'Tesallonaika taono' tapu yema kinie paa mini wale munduku 'Nambe temolonje?' ningu, pilku sunduringi.

<sup>9</sup> Kanu kinie Jesono kinie ye liku mengo oringime kinie, ye kanuma "Pame kote teko ene pai." niringi.

<sup>10</sup> 'Pollo kinie Saillasitolo kamu liku ka naa siengi.' ningu ipu lerimu kinie Kirasinge yambo-mane tamburembu elte "Kolea Beriando pale." ningu liku munduringi.

Pollo Saillasitolo Beria taono suku pukul-  
lie, Juda yamboma maku toko Pulu Yemonga  
ungumu piliringi ulkena puringili.

<sup>11</sup> Eltene Beria taono yamboma temanemo  
toko siringili kinie ou Tesallonaika taono yam-  
bomane teko kenjiringi mele Beria yambomane  
aku naa teringi. Ungu niringili mele paa  
pilku peanga pilku, 'Sike nikimbilinje, molo

colo tokombelenje, kanamili.' ningu taki taki Pulu Yemonga boku nosiringimenga mimi siku kanoko moloringi.

<sup>12</sup> „Kanoko pilkulie, Juda yambo aisilini ‘Yesusi yu sike, Pulu Yemone’ ene nokopa konjimbe ye te lipu mundumbu.’ nimbe mako torumu ye nomi Kirasimu,’ ningu tondolo munduku piliringi.\* Yambo lupe aisilini aku sikula ‘Sike.’ ningu tondolo munduku piliringi. Yambo lupemanga ambo imbi molorumu ambo aisili kinie kanu ambomanga ye aisili kinie aku teringi.

<sup>13</sup> Juda yambo Tesallonaika taonona moloring-imene Pollone Beria taonona moloringi yamboma Pulu Yemonga ungumu nimbe sirimu pilkulie, Beria taonondo yando ongo Beria yambomanga konopuma toko bulu balu sinjiku ‘Pollone nirimu ungumu pilku liringi yamboma kinie Pollo yu kinie we yambomane ene mu-mindili kolangi.’ ningu kondi toringi.

<sup>14</sup> Aku teringi kinie Kirasinge yambomane Pollo liku nomu kusa kélona maniendo mengo puku mundupuringi, nakolo Saillasi kinie Timotitolo Beria taonona we moloringili.

<sup>15</sup> Pollo mundupuringi yema Atene taono mengo puku mundukulie niringimuni, kelko yando onge teringi kinie Pollone ungu te enendo nimbe mundupelie nimbendo: “Saillasi kinie Timotitolo na moliona welea yando wangili niei.” nirimu kinie Beria yema yando oringi.

<sup>16</sup> Pollo Atene taono pupe Saillasi kinie Timotitolo nokopa molopalie nirimunumi, kanorumu kinie kolea akuna unju kinie kou kinie akumane

pulu ye kolo toli none telime teko anjiringi kanopalie yu paa konopu keri panjirimu.

<sup>17</sup> Aku siku teringi kanopalie yuni 'Ungu mare nimbú.' konopu lepa, Juda yamboma maku toko Pulu Yemonga ungumu piliringi ulkena pupe, Juda yamboma kinie, Pulu Yemonga ungu piliringi yambo lupema kinie anju yando ungu mare niringi.

Atene yamboma maku toringi koleana yu aliei pupelie yambo akuna ongo moloringime kinie ungu mare pea niringila.

<sup>18</sup> Epikurina yamboma kinie\* Sitoke yamboma kinie\*\* akumane 'Yamboma molko konopu lemelemanga pulumu pilimulú.' ningu mane siringi, kanu yambo talapetolonga ye mare kinie ene Pollo kinie kerepali niringi.\*\*\* Pollone Yesusinge temane peangamo topa sipelie Yesusi ono koleana lomboropa ola molorumu mele nimbe sirimununge pilkulie enenga ye marene ningindu: "I ye ungu aisili nikimumuni nambolka ungu mare nimbendo nikimunje?" niringi. Marene ningindu: "Olio pulu ye naa pilipu imbi silimolo pulu yemando nikimunje?" niringi.

<sup>19</sup> Kanu kinie enene Pollo liku Ariopakasi kanjollo yema maku toko moloringine mengo puringi. Akuna mengo puringi kinie enene yundu ningindu: "Nuni ungu konde te yamboma mane sinu akumu nambolka unguri ninuye? Olio piliemili ni." niringi.

<sup>20</sup> "Nuni ungu nikinumu olio pilipu sundukumulu. I ungumu paa konde toko nikinumu. Olio ungu pulumu piliemili ningu si." niringi.

<sup>21</sup> (Atene yamboma kinie yambo ponenge ongo

Atene moloringime kinie ene pali kongono te lupe naa teko enamanga pali ungu konde wendo orumuma mindi pilku anju yando kerepali ningu moloringi. Pollo kanjolloma moloringine mengo puringi yemane i ungu wendo orumumu pilingindu mengo puringi.)

<sup>22</sup> Ariopakasi kanjolloma maku toko moloringi penana ongolie Pollondo "I ungu ninkinumunge pulumu piliemili ningu si." niringi kinie yu ola angilipelie nimbendo:

"Atene yamboma, 'Ene pulu ye lupe lupe manga unguma tondolo munduku pilimele yamboma molemele.' nimbu kanokoro.

<sup>23</sup> Ou ombó orundu kinie Atene yamboma enenga popo tolemele melema andopo kanorundu. Mimi sipu kanorundu kinie enenga popo tolemele polo tengah ungu mare toko monjiringi kanorundu mele i sipe:

PULU YE NAA PILIPU IMBI SILIMOLOMONGA POLOMO  
aku sipe ungu nimbe molorumu kanorundu.  
Kanu pulu yemo, ene naa pilku we popo tolemele akumunge ungu pulumu nane nimbu simbu tekero.

<sup>24</sup> "Ma kinie melema pali terimu Pulu Yemo yu mulumu kinie mamo kinie melema pali nokolemo Ye Nomi Ailimu.\* Yambomane 'Olio ku naa pepo, kapola molamili.' nimbu ulke takopo pelemolo mele yu aku sipe molo. 'Pulu Yemo olio kinie molopili.' ningu takonjingí ulke akuna manjipe yu manda naa molomba.

<sup>25</sup> Yu melte manda molo naa tolemo, yu yambo tene manda lipe naa taponjimbe, molo. Yuni yu yuyu konde mololi ulu pulumu\* yamboma

sipe, múlu limele mólumu sipe, melema pali yamboma silimo. Akumunge yambomane yu nambe teko manda liku taponjingíye? Manda molo.

<sup>26</sup> Pulu Yemone olionga anda kolepa telu mindi terimu kanumuni olio mana yamboma pali kalopa lirimu. Olio 'koleamanga pali molangi.' nimbe aku terimu. Yu yuyu yambomanga walema nimbe panjipe, yambo talape lupe lupe molonge mama mako torumu.

<sup>27</sup> 'Mana yamboma yu waka lembama yu kanoko lingí uluma teangi.' nimbe Pulu Yemone aku terimu. Yu koroko lingí uluma pali teliku pungí kinie manda temu liemo ene yu manda lingí. Nakolo yu olio kinie sulu tepa naa molemo. Olio yamboma kinie telu telu nimbe nondopa molemo.

<sup>28</sup> Akumunge enenga ye konopuni pilku konana toringi yemanga ye tene torumu konanamonga sukundu nimbe pelemo mele i sipe:

'Yu kinie molopa, yuni mindi  
olio konde mololi ulu pulumu kinie,  
aulke andopo uluma telemolo tondoloma kinie,  
yuni mindi olio silimo.'

nimbe pelemo kanumu. Ye tene konana te torumu, kanu konanamonga ungu te nimbe pelemo mele i sipe:

"Olio kepe yunge kalopa lirimuma molemolo."  
nimbe pelemo. 'Enenga yemane ou konana pilku niringi mele kinie, nane kinié nikiru mele kinie,  
telu sipe.,'

<sup>29</sup> "Sike olio Pulu Yemonga kalopa lirimu yamboma molemolo kene 'Yu kou gollo kinie

kou sillipa kinie umbu kou kinie yu aku sipe mele.' konopu naa leamili. Pilipe konginjili pelemo yambo tene konopuni pilkulie melte kini telemele mele Pulu Yemo yu aku sipe molo.

<sup>30</sup> Ou yambomane Pulu Yemo yunge imbi naa pilku walu molko we melema popo toringi kinie Pulu Yemo yu ene aku siku ulu teko kenjiringime pundu topa mongo naa sirimu, kanopa siye kolopa molorumu. Nakolo kinié "Yamboma pali konopu alowa tekó molko konjengi." nikimu.

<sup>31</sup> Yuní mana yamboma pali kote tenjipe apurumbe wale te mako torumumu wendo ombá kene "Kinié ene konopu alowa teai." nikimu. Yuní mako torumu ye kanumuni kanu kotemo sumbi sipe tenjimbe.\* 'Yambomane 'I walemo sike wendo ombá.' ningu piliengi!' nimbe yuni kanu yemo ono koleana topa makinjirimu." nimbe Pollone nirimu.

<sup>32</sup> "Yambo te kolkolie lomboroko ola molonge." nirimu kinie ene pilkulie, marene "Kolo tokomo." ningu ungu taka tonjiringi. Nakolo marene ningindu: "I ungu temba nikimu mele walse altope piliemili nipili." niringi.

<sup>33</sup> Aku niringi kinie Pollo ene mundupe kelepa yu purumu.

<sup>34</sup> Yambo pokore yuni nirimu unguma 'Sike unguma.' ningu tondolo munduku pilkulie Pollo lombili puringi. Te Diyonisasi, yu Ariopakasi kanjollo te; te ambo te, ambomonga imbimu Damarisi; yambo mare lupe pea yu lombili puringi.

## 18

<sup>1</sup> Pe Pollo Atene taono mundupe kelepa kolea aili Korini purumu.

<sup>2</sup> Akuna Juda ye te molorumu, yemonga im-bimu Akuwilla. Yunge pulu kolea Pondasi. Yu kinie yunge menu Pirisilla kinie elte kolea Italli poropinji molkololie nondoko mele kolea aili Korini yando ongo molangili Pollo yu pe orumu. Romo koleamanga pali nokorumu ye nomi kingimuni ou nimbendo: "Juda yamboma pali kolea aili Romo munduku kelko pang." nimbe panjirimuna oringili. Pollo elte moloringi-line pupelie nirimumuni,

<sup>3</sup> elte sele ulke tambuluringili mele yu aku sipe ou tambulurumumunge yu elte kinie tapu toko molko kou mone lingí kongono teringi.

<sup>4</sup> 'Juda yamboma kinie Pulu Yemonga ungu piliringi yambo lupema\* kinie enene Yesusi yu Pulu Yemone "Ene nokopa konjimbe ye te lipu mundumbu." nimbe mako torumu ye nomi Kirasimu molopa, olionga nimbe kolonjipe, lomboropa ola molorumu mele, 'Paa sike.' ningu tondolo munduku piliengi.' nimbe Pollo yu 'Juda yambomanga koro moloringi, wale Sam-batemanga pali\*\* ene maku toko Pulu Yemonga ungumu piliringi ulkena pupe ene kinie kerepali nimbe tondolo mundupe nimbe sirimu.

<sup>5</sup> Nakolo Saillasi kinie Timotitolo kolea Masedonia poropinji munduku kelkolo kolea aili Korini oringili kinie Pollo 'sele ulke kongono terimumu mundupe kelepa,' walemanga pali Juda yamboma ungu nimbe sipe tondolo mundupe nimbendo: "Yesusi yu Pulu Yemone 'Ene nokopa

konjimbe ye te lipu mundumbu.' nimbe mako torumu ye nomi Kirasimu."\* nimbe molorumu.

<sup>6</sup> Nakolo yuni nirimu mele Juda yambomané pilku naa liku, ungu taka tonjiringi kinie 'Teko kenjikimilimenga nane ene mundupu kelkero mele kanangi.' nimbe yuni yunge wale pakoline nurupulu lerimuma tanda sipe ele tepalie\* enendo nimbendo: "Ene mongo língi liemo nanga ungu te molo. Enene ungumu liku su siku "Molo." nikimilimunge mongo lingí kinie ulu enengamo.\*\* 'Kirasinge ungumu naa pilimulú.' nikimiline kinié na ene Juda yamboma mundupu kelepo yambo lupema molemelena pukuru." nirimu.

<sup>7</sup> Kanu kinie Pollo Juda yamboma maku toko Pulu Yemonga ungumu piliringi ulkemo mundupe kelepa ulke te nondopa angilirimuna purumu, kanu ulke pulu yemo, yemonga imbimu Tisiasi Jasitasi, yu Pulu Yemonga imbi ambolopa ola linjirimu yemo.

<sup>8</sup> Juda yamboma maku toko Pulu Yemonga ungumu piliringi ulkemo nokorumu ye nomimu, yemonga imbimu Kirisipasi, yu kinie yunge ulke moloringi yamboma pali kinie Pollone nirimu ye Aili ,Yesusi, 'Yu sike ,Pulu Yemone 'Lipu mundumbu.' nimbe ou mako torumu ye nomi Kirasimu.' ningu tondolo munduku piliringi.\* Korini yamboma Pollone ungu nirimumu piliringi yambo aisili aku sikula 'Sike nikimu.' ningu ,konopu alowa teko, no liringi.

<sup>9-10</sup> Walse ipulueli Pollo kumbu mele tepe kanorumu kinie Ailimuni yundu nimbendo: "Nu kere pipi siku pipili naa koloi." nirimu. "Nanga

yambo molongema aisili i taono ailimunge molemelemonga na alieli nu kinie molombo, yambo tene nu tepe kenjipe mindili manda naa simbe. Akumunge nuni alieli nanga ungumu yamboma ningu sieni.” nirimu.

<sup>11</sup> Akumunge Pollo Korini yamboma Pulu Yemonga ungumu mane sipe molopili ponie telu oli talo pakara ombo purumu.

<sup>12</sup> Ye Gallio Yu kolea Akaya poropinji Romo gapomano endisi molorumu kinie Juda yamboma Pollo kinie mumindili kolko maku toko ongo Yu ambolko likulie, Gallio molorumuna mengo puku kote tenjikulie ningindu:

<sup>13</sup> “I yemone olio ungu mane pilipu telemolo mele naa nimbe, Pulu Yemonga ungu mane\* sipe, Pulu Yemo kapi nimbu imbi manda ambolopo ola linjimulú mele nilimomo kapola naa telemo.” niringi.

<sup>14</sup> Pollone pundu topa ungu te nimbé terimu kinie Gallione Juda yemando nimbendo: “I yemone Romo gapomano ungu mane te pulue tolka molo yambo te tepe kenjilkenje ene Juda yemane kote papu tenjilimelka, nane enenga ungumu pilke.

<sup>15</sup> Nakolo enene enenga unguma kinie imbime kinie ungu manema kinie nilimele puluma akumanga ongo Yu kote tenjikimilimu kapola naa tekemo. Ene eneno anju puku piliengi! Nane i kotemo naa pilimbu.” nirimu.

<sup>16</sup> Aku nimbeline, yuni ene kotena makoropa pena mundurumu.

<sup>17</sup> Akumunge yambo lupemane pali Juda yamboma maku toko Pulu Yemonga ungumu piliringi

ulkemo nokorumu ye nomi Sotenisi ambolko liku, Gallio kanopa molopili yu toringi. Nakolo Gallio yu aku teringi mele kanopalie siye kolorumu.

<sup>18</sup> Pollo wale aisili kolea aili Korini we molopalie nirimumuni, pe Kirasinge yambo-mando nimbendo: “Na pukuru. Ene konopu pe nipili molko konjei.” nimbeline yu pupe, Sengiria taono nomu kélona pupe, sipine kolea Siria poropinji purumu. Akuwillia kinie Pirisillatolo Pollo pea tapu toko puringi. Sipine ou naa pupe Sengiria taono we molopalie yuni Pulu Yemo kinie “Ulu te paa sike tembo.” nimbe mi lepalie yunge penge indi ye tendo “Poronji.” nirimu.

<sup>19-21</sup> Ene Epesasi taono puringi kinie Pollo Juda yamboma maku toko Pulu Yemonga ungumu piliringi ulkena pupe Juda yamboma kinie ungu aisili kerepali niringi. Enene yundu “Wale pokore pea molamili.” niringi nakolo ene niringi mele naa pilirimu. Nakolo pumbe tepalie enendo nimbendo: “Pulu Yemone “Pui.” nimu liemo walse kelepo yando ombó.” nimbe “Ene molai.” nimbeline nirimumuni, Akuwillia kinie Pirisillatolo Epesasi taonona molangili mundupe kelepa sipine yu purumu.

<sup>22</sup> Sipimu pupe kolea aili Sisaria lerimu kinie Pollo manie pupelie, Kirasinge yambo talape , kolea aili Jerusalleme, moloringine\* olando pupe “Ene manda molemeleye?” nimbeline, kelepa , kolea aili Sisaria maniendo omba sipi tenga kolea, aili Andiyokondo kamu purumu.

<sup>23</sup> Kolea aili Andiyoko molopili wale aisili omba purumu kinie pe yu kelepa kolea aili

Andiyoko mundupe kelepa, kolea Gallesia poropinji kinie Pirisia poropinjitolonga pupe aku koleatolonga lerimu koleamanga pali andopa "Yesusinge lombili andoli yamboma\*" yunge ungumu komu naa siku, siye naa kolko mimi siku pilku molai." nimbe, nimbe silipe purumu.

<sup>24</sup> Juda ye tengah imbi Apollosi,\* kanu yemonga pulu kolea Allekesandia, yu Epesasi taono orumu. Yu ungu paa nimbe konjipe, Pulu Yemonga bokuna molemo unguma pali pilirimu yemo.

<sup>25</sup> Ailimuni yamboma molko konjingindu tengah aulkemo akisinjirimu mele ou yu mane siringi pilipelie, Yesusinge temanemo yamboma sumbi sipe topa sipe, paa tondolo mundupe nirimu, nakolo yu No Linjili Jonone yamboma no linjimbendo mane sirimu mele mindi pilipelie mane sirimu.\*

<sup>26</sup> Apollosi yu Epesasi taono ombalie, Juda yamboma maku toko Pulu Yemonga ungumu piliringi ulkena pulu monjipe ungumu nimbe simbendo pipili naa kolopa tondolo mundupe nirimu. Akuwillia kinie Pirisillatolo yu ungu nirimu mele pilkululie eltenga ulkena mengo pukulu, Pulu Yemone yamboma lipe taponjipe paa mindili naa nongo molko konjingí aulkemo akisinjirimu mele pali kamu mimi siku ningu siringili.

<sup>27</sup> Pe Apollosi "Na kolea Akaya poropinji pambo." nirimu kinie Kirasinge yambo Epesasi taonona moloringimene yundu ningindu: "Papu nikinu. Nu Kirasinge kongono kolea Akaya poropinji puku tepani." ningu, 'Yesusinge

lombili andoli yambo kolea Akaya moloring-imene yu kanoko imbi sikulie ‘Pea molamili.’ niengi.’ ningu pepá toko siringi. Yu pepámo memba kolea Akaya poropinji pupelie nirimumuni, Pulu Yemone we kondo kolorumu-munge Aili Yesusinge ungumu ‘Sike.’ ningu tondolo munduku pilku Kirasinge yamboma moloringime Apollosini ene paa lipe taponjirimu.

<sup>28</sup> Yamboma kanoko molangi Apollosi tondolo mundupe, Juda yambo “Yesusinge ungumu nikimili akumu kolo tokomele.” niringime kinie yu kinie kerepali niringi, Yesusi yu sike Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu molorumu Pulu Yemonga bokuna nimbe molorumu mele mimi sipe lipe ora sipe mane sirimu.

## 19

<sup>1</sup> Ye Apollosi kolea Akaya poropinji pupe akumunge kolea aili Korini molopili, Pollo ma pangiaulkena pupe Epesasi taono maniendo purumu. Akuna pupelie Yesusinge lombili andoli yambo mare kanorumu.

<sup>2</sup> Kanopalie nirimumuni, ene walsipelie nimbendo: “Enene ungumu piliringi mele ‘Sike.’ ningu pilkulie Mini Kake Telimu liringi molo moloye?” sirimu.

Enene pundu toko ningindu: “Molo, Mini Kake Teli te molemo mele olio naa pilimolo.” niringi.

<sup>3</sup> Aku niringine pilipelie Pollone enendo nimbendo: “Aku liemo ene no nambe teko liringiye?” sirimu.

Enene ningindu: "Jonone\* nirimu unguma pilipulie no lirimulu." niringi.

<sup>4</sup> Pollone nimbendo: "Jonone yambomando nimbendo: "Ulu pulu kerime munduku kelko konopu alowa teko no liei." nirimu nakolo i ungumu mindi naa nirimu. Ungu te pea nimbendo: "Akilipe ombá ye Yesusi 'Yu sike.' ningu tondolo munduku piliengi!"\* nirimu." nimbe Pollone nirimu.

<sup>5</sup> Aku sipe nirimu mele pilkulie, ene "Aili Yesusinge yamboma molomolo." ningu Yesusinge imbi lelko no liringi.

<sup>6</sup> Kanu kinie Pollone enenga pengena ambolorumu kinie ene moloringine Mini Kake Telimu orumu kinie enene umbu ungu lupe lupema lelko, Ailimuni ungu umbu tonjirimuma pilku yamboma ningu siringi.

<sup>7</sup> Aku teringi ye rurepo mele moloringi.

<sup>8</sup> Pollo Epesasi molopalie nirimumuni, Juda yamboma maku toko Pulu Yemonga ungumu piliringi ulkena pupe, Pulu Yemo ye nomi kingimu molopa melema pali nokomba mele\* pipili naa kolopa tondolo mundupe nimbe sir imu. 'Ene paa pilku 'Sike.' niengi.' nimbe oli yepoko aku sipe nimbe sipe molorumu.

<sup>9</sup> Nakolo Juda yambo mare karaye teko ungu liku su siku, "Ungu imu kolo tokomo, naa pilimulú." ningu, yamboma pilku molangi "I Pollone ungu nikimuma nimbe kenjikimu." ningu ungu takatona jiringi. Aku teringine Pollone ene mundupe kelepa purumu. Yesusinge lombili andoli yamboma\* lipe memba pupe, Tiranasini ungu ningu si pu opu teringi ulke nokorumu

kanuna memba purumu, akuna alieli kerepali  
ningu moloringi.

<sup>10</sup> Aku teko molangi ponie talo omba purumu  
kinie Juda yamboma kepe yambo lupe kolea Esia  
poropinji moloringime pali Ailimunge ungumu  
piliringi.

<sup>11</sup> Pulu Yemone Pollo lipe taponjirimu kinie ulu  
tondolo paa te lupe mele terimu.

<sup>12</sup> Pollo kongono tembando mulu wambale  
panjirimuma yamboma sirimu kinie liku mengo  
puku kuru torumu yamboma simbi tonjiringi  
kinie enenga kuru torumuma pora nimbe,  
enenga konopuna kuru moloringime ongo  
wendo puringi.

<sup>13</sup> Juda ye mare andoko yambomanga konop-  
una kuruma toko makoroko "Wendo pai!" ningu  
kou kongono andoko teringi. Ene mare Aili  
Yesusinge imbi lelko walsiku\* kuruma 'Ongo  
wendo pai!' ningindu i siku niringi: "Pollone  
ungu mane silimo ye Yesusinge imbi lepo walsip-  
ulie 'Ene ongo wendo pai!' nikimulu." niringi.

<sup>14</sup> Ye Sipa yunge malopili yepoko pakara aku  
siku teringi. Sipa yu Pulu Yemo popo tonjiringi  
yemanga ye aili\* te. Aku yemonga malopilini  
aku siku Yesusinge imbi lelko walsiku kuru-  
mando "Ongo wendo pai!" niringi kinie

<sup>15</sup> kurumane pundu toko ningindu: "Olio  
Yesusi kanopo imbi silimolo. Pollo kanolemolo.  
Nakolo ene nameleye?" niringi

<sup>16</sup> kinie kuru konopuna molorumu yemone  
ene moloringine pukue topa pupe enenga mulu  
wambalema ambolopa sungu mangu sinjipe ene  
paa torumuna kanuulkemo munduku kelko

mulu wambale te naa pakoko meme pakoko we kowa puringi.

<sup>17</sup> Pe Epesasi taonona moloringi Juda yamboma kinie yambo lupema kinie aku ulu wendo orumumu pilkulie ene mini wale munduku, Aili Yesusinge imbimu ambolko ola linjiku yu kapi niringi.

<sup>18</sup> Akumunge yambo aisili ou Yesusi 'Yu sike.' ningu tondolo munduku piliringime kanu ulumu wendo orumu kinie ongo ou ulu keri teringime ningu para siringi.

<sup>19</sup> Aku siku teringimenga yambo mare ou kuru ala toko teko kenjiringi kanu yambomane yamboma kanoko molangi enenga ala toringi bokuma pali tepena kaloringi. Boku kaloringimenga kou mone purumu mele kou sillipa pipiti tausini mele purumu.

<sup>20</sup> Aku sipe mele Ailimunge ungumunge tondolomone kanu ulu kerime topa manie mundurumuna ungumu enge nimbe koleamanga pali pupe kapola terimu.

<sup>21</sup> Kanu uluma pali ou teringi kinie pe Pollo konopuni pilipelie 'Kolea Masedonia poropinji pupu kolea Akaya poropinji\*' pupulie, kolea aili Jerusalleme pumbu. Jerusalleme pupulie, pe kolea aili Romo pumbu.' konopu lerimu.

<sup>22</sup> Pollo yu liku taponjiringi yemanga Timoti kinie Erasitasitolo "Kolea Masedonia pale." nimbe lipe mundupelie yu wale mare kolea Esia poropinji we molorumu.

<sup>23</sup> Aku walemanga Epesasi taono kanuna Ailimunge temane peangamo toko siringimunge

umbuni aili te wendo orumu. Wendo orumu mele i sipe:

<sup>24</sup> Ye te, yunge imbi Demitiasi, yuni yamboma popo toringi pulu ambo kolo toli Atemisi\* none teli melema kou sillipane tepa mimi tepa nosirimu. Yamboma kanu none telime enenga ulkemanga anjiku popo tongendo kou mone siku liringimunge Demitiasi kou mone aisili lipe yunge kongono tenjiringi yema mele aisili kalorumu.

<sup>25</sup> Kanu yemone yunge kongono tenjiringi yema kinie ye Atemisinge kongono lupema tenjiringi yema kinie “Ene wai.” nimbe, lipe maku topalie nimbendo: “Yema, pulu ambo Atemisinge kongono tenjilimolomonga kou mone paa olandopa limulú.

<sup>26</sup> Aku ye Pollone ungu nilimomone yambo aisili kondi topa anju limo mele ene pilku kanolemele. Yuni nimbendo: “I kini telemele pulu yamboma kolo toko telemele.” nilimo ungumu Epesasi taono yamboma kinie kolea Esia poropinji pali kepe yamboma pilku liku yu lombili pulimele.

<sup>27</sup> Yuni nilimo ungumuni olionga kou mone kongonomo mindi topa manie naa mundumbe. Pulu ambo Atemisi molemo popo tolemolo tamandu ulkemo kepe yambomane “Akumu uluri molo.” ningu kanoko keri kanonge. Atemisi yu kepe yunge imbi paa ola molemomo topa manie mundunjimbe tekemo. Pollone kanu temanemo we topa molomu liemo kolea Esia poropinji kepe we koleamanga pali kepe i pulu ambomo popo toko imbi ambolko ola linjilimele

mele munduku kelenge lemo." nirimu.

<sup>28</sup> Enene kanu ungumu pilkulie paa mumindili kolkolie ru ningulie ningindu: "Olio Epesasi yambomanga pulu ambo Atemisi paa aili olan-dopamo molemo." niringi.

<sup>29</sup> Aku niringi kinie yamboma pali ru ningu naka lelko sukundu sukundu lkisiku ongo maku tokolie, Gayasi kinie Arisitakasitolo ambolko liku mengo puku, enenga maku toringi koleana puringi. Kanu yetolo elte kolea Masedonia poropinji yetolo, Pollo kinie pea tapu toko andorangi.

<sup>30</sup> Pollo ene maku toringine ungu nimbe pumbe terimu nakolo Yesusinge lombili andoli yambomane "Molo." niringi.

<sup>31</sup> Kolea Esia poropinji ye nomi mare Pollo kinie perene niringimene kepe ningu mundukulie ningindu: "Pollo nu maku tokomelena paa naa pui." niringi.

<sup>32</sup> Maku toringi yamboma konopu naa pepa bulu balu nirimu. Enene ru ningu, ungu lupe lupe niringi. Yambo aisilini ene maku toringimunge pulumu naa piliringi.

<sup>33</sup> Juda yambomane enenga ye nomi Allekesanda yambo moloringine suku singine liku munduringi. Kanu kinie yu "Ungu te niembo." nimbe ki ola mundupe, ungu te nimbe terimu.

<sup>34</sup> Nakolo enene yu ,Atemisi popo naa torumu, Juda ye te ningu kanokolie ene ru ningulie ningindu: "Atemisi yu olio Epesasi yamboma nokolemo pulu ambo ailimu." ningu molangi ena mongo talo ombo purumu.

35 Kanu kinie Epesasi taono kusikusi yemo ola angilipe "Ungu naa niei!" nirimu. Yamboma taka lelko moloringi kinie yuni nimbendo: "Epesasi yema nameleye, olio kolea Epesasi yambo-mane pulu ambo aili Atemisi molemo tamandu ulke olionga taonona angilimomo kinie akuna yu none teli kou muluna manie orumu kou akuna angilimotolo olione nokolemolo, yambo naene naa kanolemoye?

36 Akumunge, yambo tene "Kolo tokomele." manda naa ningí kene ene taka lelko molko ulu te popenge teko naa teangi.

37 Andi ye mengo ongitolone ulu te teko naa kenjiku, olionga pulu ambomo ungu taka tonjiku yunge tamandu ulkemonga melte wa naa língili nakolo we mengo ongi.

38 Demitiasi kinie yunge kongono yema kinie ene yambo te kinie ungu te pemu liemo kapola, kote wale te wendo ombá kinie kote tenjengi, gapomano ye aili endisimene kotena manda lipe sumbi sinjimbe.

39 Unzu te lupe ningí liemo yambo maku tonge wale tengu ningu sumbi siengi.

40 Kinié we maku toko opa teko ungu aisili kerepali ningu ru nikimilimunge olio mongo pemba. Endisimene olio kinié ulu teke-molomonga kote tenjilimelkanje olio kotena ungu te pundu topo nimulú aulke te naa lelka. Tekemolomonga pulu te naa pekemo." nirimu.

41 Aku nimbeline, taono kusikusimuni yambo-mando "Bulu balu ningu pai!" nirimu kinie pilku liku puringi.

20

<sup>1</sup> Epesasi taono yamboma ungu aisili ning  
Pollo kinie mumindili koloringi mele pora nir-  
imu kinie Pollone Yesusinge lombili andoli yam-  
boma\* "Wai." nimbe, ene nimbe mundupelie  
nirimumuni, 'Ene enenga konopu enge nipili  
molko konjengi.' nimbe ungu mare nimbe  
sipelie, "Ene molai." nimbe yu Epesasi taono  
mundupe kelepa kolea Masedonia poropinji  
pumbe purumu.

<sup>2</sup> Kanu koleana andopa ‘Konopu enge nipili molko konjengi.’ nimbe yamboma ungu nimbe silipe pupelie, kolea Akaya poropinji suku pupe,

<sup>3</sup> akuna oli yepoko molorumu. Yu kelepa kolea aili Andiyoko taono yando ombando 'Kolea Siria pambo.' nimbe sipine pumbe terimu nakolo Juda yambomane "Yu topo konjemili." ningu langi niringi pilipelie, yu 'Kolea Masedonia poropinji kelepo yando pambo.' nirimu.

<sup>4</sup> Yu pea tapu toko puringi yemanga imbime i sipe: Beria taono molorumu ye Pirasi malo Sopata kinie, Tesallonaika taono molorumu ye Arisitakasi Sekandasitolo kinie, Depi taono molorumu ye Gayasi kinie, akuma pea puku, Timoti kinie kepe, kolea Esia poropinji ye Tikikasi Toropimasitolo kepe, aku yema Pollo kinie pea tapu toko puringi.

<sup>5</sup> Olio Pillipai taono molamili ene kumbi lelko puku Toroasi taono pukulie olio nokoko moloringi.

<sup>6</sup> „Juda yambomane ponie tenga tenga kolea  
aili Jerusalleme puku akuna suku Pulu Yemone  
enenga anda kolepalime Naa Topa We Ombo

Purumu mele\* piliringi walema, akumu imbi lelko, 'Pillawa Akoli Mele Isimu Naa Munduku Pillawa We Kalko Noringi Walema'\* niringila, aku walema ombo purumu kinie olio kolea aili Pillipai mundupu kelepo sipine pupu molamili wale te pakara ombo purumu kinie Toroasi wendo pupu, ye ou kumbi lelko puringime akuna kanopo lipu koro te ene kinie pea tapu topo Toroasi molorumulu.

7 „Sambate walemo ombo pupe,“ koro konde tengah pulu pulu kongono walemo wendo orumu kinie,\* olio Yesusinge lombili andoli yamboma pea langi nombo Yesusingi "Pilku nangi." nirimu mele pilipu nombo tapu topo molomolondo\*\* maku torumulu. Pollone yamboma ungu mane sirimu. Yu 'Opali pumbu.' nimbe yamboma ungu mane sipe molopili kolea ai burumi lerimu.

8-9 Olio ulke olakondo polo yepoko sipemonga suluminiana maku torumuluna tepe llame aisili kandopo nosipu molorumulu. Akuna kango ye te molorumu, yunge imbi Yutikasi. Yu 'Ulke pa tepili.' ningu suru toringine ola molorumu. Pollo we ungu nimbe mindi molorumu kinie Yutikasi yu uruni sumbili tambili nirimuna yu kamu uru perimu kinie topa ulke sumbiliana manie mundurumu. Yu lingí puku kanoringi kinie yu ou kolopa pora sirimu.

10 Pollo manie pupe kango onomo lerimuna pupe tamalu pepa kangulupelie enendo nim-bendo: "Ene mini wale naa mundei. Yu we konde molemo." nirimu.

11 Aku tepalie kelepa suluminiana olando pupe, ene kinie langi liku nongolie, altoko ungu

ningu molangi kolea tangorumu kinie yu purumu.

<sup>12</sup> Ye kango kolorumu kanumu yu altopa konde molorumuna ene paa konopu peanga pepili yu konopu siku mengo puringi.

<sup>13</sup> Pollo Toroasi taonona we molopili olio sipine Asosi taono kumbi lepo purumulu. Pollone "Na kolea Asosi nendo manie aulke ombó." nirimuna olio kumbi lepo pupulie 'Yu kolea Asosi ombá kinie sipine pea pamili.' nimbu nokopo molorumulu.

<sup>14</sup> Pe Pollo kolea Asosi orumu kinie kanopo lipu yu pea sipine pupu Mitillini taono pupu pepo,

<sup>15</sup> ipulueli ou anju pupu, kolea Kiosi purumulu kinie ipu lerimu. Pupu molamili kolea tangorumu. Kelepo kolea Semosi purumulu kinie altopa ipu lerimu. Pupu molamili kolea tangorumu kinie pupu Maillitasi taono purumulu.

<sup>16</sup> Pollo 'Sumbi sipu kolea aili Jerusalleme pupu, Pendikosi walemo\* ou wendo naa opili na akuna sukundu pumbu.' konopu lepalie, 'Kolea Esia poropinji pumbu kinie walema we pora nimbé kinie manda naa pumbu.' konopu lepa 'Epesasi taono mundupu kelepo Jerusalleme sumbi sipu pumbu.' konopu lerimu.

<sup>17</sup> Pollone 'Epesasi naa pumbu.' konopu lepalie nirimumuni, kolea Maillitasi molorumulu kinie Pollone Epesasi taono Kirasinge yambo talape moloringimenga tapu yemando\* nimbe mundupelie "Na moliona wai." nirimu.

<sup>18</sup> Kanu kinie ene yu molorumuna oringi kinie yuni enendo nimbendo:

"Na kolea Esia poropinji ou pulu pulu ombo,

akuna sukundu koleamanga pali andopolie kongoно tempo ulu terindу mele ene kanoko pilku, kinié telio mele pilimele.

<sup>19</sup> Kolea Esia poropinji sukundu lemo kolemanga temane peangamo tolipu andoruntu kinie Juda yambomane nanga kongonomo alieli teko kenjinjiku pipi singí teringi akumunge na umbuni aisili lipu mindili silio nakolo nanga imbimu ambolopo ola naa lipu, Ailimunge kongonomo taka lepo tenjirindu mele tenjipulie niliomone, ‘Ungumu paa piliengi!’ nimbu kolama ombo manie manie pupili molorundu.

<sup>20</sup> ‘Ene temane peangamo topo simbundu mundupu naa keleambo.’ nimbu, ‘Ene lipu taponjembo.’ nimbu temane peangamo pipili naa kolopo topo silipu andopo, maku toring-imenga kepe enenga ulkemanga kepe ene unguma pali mane sirindu kanumu ene kanoko pilimele.

<sup>21</sup> Juda yamboma kinie yambo lupema kinie tondolo mundupu nimbundu: “Ulu pulu kerime munduku kelko, konopu alowa teko Pulu Yemo molemona puku, olianga Aili Yesusi molopa tenjirimu molemo mele ‘Yu sike.’ ningu tondolo munduku pilku molangi.”\* nimbu alieli ene nimbu silipu andoruntu kanumu.

<sup>22</sup> “Akumunge kinié Minimuni ka mele sipe lipe mundukumuna na Jerusallemendo pukuru. Na Jerusalleme pumbu kinie nambolka uluri kamu wendo ombanje naa pilkiru,

<sup>23</sup> nakolo koleamanga pali andolio kinie Mini Kake Telimuni unguma tondolo mundupe na nimbe silimo mele i sipe: “Nu ka ulkena peko

mindili noni." nilimo akumu mindi pilio.

<sup>24</sup> Nakolo 'na molopo konjipu, mindili naa nombo, na naa kolambo.' nimbu kele topo ulu te manda naa telio. 'Aili Yesusini na kongono sirimu kongonomo tepo lipulie mindi na konopu simbu.' nimbu pilipu molio. Kanu kongonomo i sipe: Pulu Yemone olio mana yamboma we kondo kolemo mele temane peangamo topo silio kanumu.

<sup>25</sup> "Kapola, na altopo ungu te nimbú tekero. Nane ou enenga koleamanga andopolie Pulu Yemo ye nomi kingimu molopa melema nokolemo nokomba mele\* ene nimbu sirindu piliringi yambomanga telurini kepe na altoko naa kanonge.

<sup>26</sup> Aku tembamonga nane kinié ene sike i nimbu sikiru: Yambomanga te molopa kenjipe kolea kerine pumu liemo nanga ulu te molo, yu ungu lipe su simbemonga pumbe.\*

<sup>27</sup> Nane ene pilku molangi Pulu Yemone "Tembo." nimbe panjirimu mele uluma pali 'Mundupu naa keleambo.' nimbu pipili naa kolopo sumbi sipu ene nimbu sirindu kanumu.

<sup>28</sup> Mini Kake Telimuni ene tapu yema mako topa 'Kongi sipisipi nokangi.' nirimu sipisipime nokoko konjiku ene eneno nokoko konjengi. Pulu Yemone yunge meme ondo lenjirimumuni ene lirimu Pulu Yemo yunge yambo talape molemelemanga tapu ye peangama molangi.\*

<sup>29</sup> "Na pilkirumu ene mundupu kelepo pumbu kinie ene molongena owa takara paa kerime ongo Yesusinge kongi sipisipime toko bulu balu singí lemo.

<sup>30</sup> Enenga yambo mare kepe pe unguma alowa teko kolo toko, Yesusinge lombili andoli yambo mare kondi toko 'Olio lombili wai.' ningu aku tengen.

<sup>31</sup> Aku sipe uluma wendo ombá kene ene alieli nokoko konjiku molayo. Ene pilku molonge mele i sipe: Nane 'I unguma piliengi!' nimbu ipulueli tangoli enamanga pali kolama omba manie manie pupili tondolo mundupu ene lipu taponjipu lepi lepi topo nimbu sipu, walse kepe siye naa kolopo, we nimbu molambo ponie yepoko pora nikimu. Aku sipu terindu mele pilku komu naa siku, nimbu sirindu unguma paa pilku molangi.

<sup>32</sup> "Kinié ene Pulu Yemonga kíne lipu monjipu, 'Pulu Yemone we kondo kololi ungu ,ene nimbu sirindu, akumane ene enge sipe, Pulu Yemone 'nanga yambo manjiku molko, yambo kake telime molangi' nilimo yamboma yu mele peangama simbe kinie ene aku sipe simbe lingí, aku we kondo kololi ungumu ene kinie pepili.' nimbu nikiru.

<sup>33</sup> "Na yambomanga kou mone gollo sillipama kinie mulu wambale melemanga te kanopo kumu naa panjirindu.

<sup>34</sup> Na kinie, na pea tapu topo andorumulu yamboma kinie, olio melema molo torumu kinie nanga kitolone enge nimbu kongono tepo melema lipulie lipu taponjirindu.

<sup>35</sup> 'Nanga kongonoma pali ene aku siku teangi.' nimbu, lipu ora sirindu. Olione aku sipu tepolie pange teli yamboma lipu taponjipu tondolo mundupu teamili. Aili Yesusini nirimu mele

pilku molangi. Yesusi yuni nimbendo: "Yambo tene yambo te lipe taponjipe melema sipelie konopu silimo mele olandopa; yu yuyu melema lipelie konopu silimo mele maniendopa." nirimu."<sup>\*</sup> nimbe Pollone nirimu.

<sup>36</sup> Aku unguma nimbe pora sipelie nirimu-muni, yu Epesasi tapu yema kinie kororongo langopa enenga nimbe Pulu Yemo kinie ungu ningu mawa tenjirimu.

<sup>37</sup> Kanu kinie ene pali kola teko Pollo kangulku kondo koloringi.

<sup>38</sup> Ene kameleno mindili aili tepa tepili moloringi. Pollone "Na kelko naa kanonge." ou nirimu akumu pilkulie ene aku siku mindili pulumu koloringi. Kanu kinie yu liku mengo sipine puku mundupuringi.

## 21

<sup>1</sup> Epesasi taono tapu yemando "Olio pukumulu kene ene molai." nimbulie kameleno mindili tepa pepili ene mundupu kelepo sipine pupu, kolea Maillitasi mundupu kelepo wale tengah sumbi sipu purumulu. Kolea Kosi pupu, ipulueli ou Kosi mundupu kelepo kolea Rosi pupu, ipulueli ou Rosi mundupu kelepo kolea Patarando purumulu.

<sup>2</sup> Akuna pupulie nirimulumuni, sipi te kolea Pinisia poropinji lemo kolea aili Taya pumbé terimuna kanopolie akuna ola purumulu.

<sup>3</sup> Nomuna purumulu kinie kolea Saipirasi ki tarokondo lerimu kanopo mundupu kelepo ombo pupu, kolea Siria poropinji pupu, kolea aili Taya purumulu kinie 'Sipine meringi melema

manie liengi.' nimbu olio we nokopo molorumulu.

<sup>4</sup> Akuna Yesusinge lombili andoli yambo mare\* moloringi kanopolie ene pea koro telu molorumulu. Mini Kake Telimuni ene tondolo sirimumuni enene Pollondo "Jerusalleme kelko paa naa pui." ningu karaye teringi.

<sup>5</sup> Aku niringi nakolo walema pora nirimu kinie "Olio pukumulu." nimbu pumulú terimulu. Kirasinge yema kinie enenga ambo ambolan-goma kinie tapu topo ombo taonona ulsu pupu nomu kélona mundupuringi kinie no kélona koporongo langopo manie molopo Pulu Yemo kinie ungu nirimulu.

<sup>6</sup> Kanu kinie oliondo "Pai." niringi kinie olione "Ene molai." nimbu sipine ombo suku purumulu kinie ene kelko ulkendo puringi.

<sup>7</sup> Sipine kolea aili Taya mundupu kelepo Tollemesi taono purumulu. Akuna Kirasinge yamboma moloringine pupulie, kangulupu "Ene molongi lemo." nimbu wale te ene kinie molorumulu.

<sup>8</sup> Ipulueli oukundu Tollemesi taono mundupu kelepo kolea aili Sisaria pupu sipine kamu manie pupulie, temane peangamo andopa topa sili ye Pillipunge ulkena pupu molorumulu. Ou Jerusalleme liku taponjili, ye yepoko pakara ,mako toringi, yemanga te yu.\*

<sup>9</sup> Pillipu lemenupili ambo wenepo kise moloringi, kanu amboma Ailimuni ungu umbu tonjirimuma pilku yamboma ningu sili amboma moloringi.

**10** Olio kolea aili Sisaria wale mare molorumulu kinie Ailimuni ungu umbu tonjirimuma pilipe yando nimbe sirimu ye te,\* yemonga imbi Akapasi, yu kolea Judia disiriki molopalie Sisaria maniendo orumu.

**11** Olio molorumuluna ombo Pollonga kako torumumu posipe lipe yunge kimbu kime yuyu ka topalie nimbendo: “Mini Kake Telimuni nimbendo: “Jerusalleme molemele Juda yambomane i kako pulu yemo ambolko liku i siku ka toko mengo puku yambo lupema singí.” nikimu.” nirimu.

**12** Aku sipe nirimuna olio pilipulie olio kinie akuna moloringi yamboma kinie olione Pollondo paa tondolo mundupulie nimulundu: “Nu Jerusalleme olando paa naa pui.” nirimulu.

**13** Nakolo Pollone pundu topa nimbendo: “Ene nambemuna nanga konopu toko embambo singiku kola tekemeleye? Na Jerusalleme pumbu kinie ka singi liemo uluri molo. Molo Aili Yesusinge imbimu ambolopo ola linjiliomonga\* kamu toko konjíngi liemo uluri molola. Kowa naa pumbu.” nirimu.

**14** Karaye tepo “Paa molo. Naa pui.” nimbu molorumulu nakolo olionga ungu nirimuluma naa pilirimuna kanopolie olione nimulundu: “Aku kapola. Ailimuni pilipelie ‘Wendo opili.’ nimbé mele wendo opili.” nimbu siye kolorumulu.

**15** Wale pokore Sisaria molopolie nirimulu-muni, olionga melema lipu undu undu sipu molopolie, pe Jerusalleme olando purumulu.

**16** Jerusalleme pumulú purumulu kinie, Yesusinge lombili andoli Sisaria yambo mare pea tapu topo pupu, Nesononga ulkena olio puku mundupuringi. Nesono yu kolea Saipirasi ye te, yu koronga ou Yesusinge lombili andoli yemo molorumu. Ou ningu panjiku 'Yunge ulkena pemolo.' niringi.

**17** Jerusalleme kamu sukundu purumulu kinie Kirasinge yambomane konopu siku "Papu okomele." niringi.

**18** Ipulueli oukundu Pollo keme olio Jemisi kanomolo purumulu kinie tapu yema pali\* yu kinie moloringi.

**19** Pollone "Ene molongiye?" nimbeline Pollo yu Juda yamboma mundupe kelepa yambo lupema moloringine andopa kongono terimu kinie Pulu Yemone yu lipe taponjipe terimu uluma pali ene temane topa sirimu.

**20** Yuni aku sipe nirimu pilkulie ene Pulu Yemo kapi niringi. Aku tekolie Pollondo ningindu: "Ango, Juda yambo tausini aisili 'Yesusi yu sike ye nomi Kirasimu,' ningu tondolo munduku pilku\* ,yunge yamboma molemele, nu kanoleno. Mosisini ungu mane sirimuma\*\* 'Paa pilipu teamili.' ningu molemele mele nu kanolenola.

**21** Nakolo Juda ye marene ongolie nu teleno mele olionga Juda yambo Kirasi pilili yambomando ningu siringi ene pilku keri pilku molemele. Nuni teleno mele ongo niringi mele i sipe: "Juda yamboma yambo lupema kinie molemele yambomane Mosisini ungu mane sirimuma naa pilku munduku kelko, enenga kangomanga kangi te kopisiku makaye teko naa ele

tenjiku\* olio Juda yambomanga ulu puluma naa teangi." ningu nuni aku siku nilino nilimele.

<sup>22</sup> Ene pilku keri pilku molemele akumunge olio nambe teamiliye? Nu yando onu mele ene sike pilingí. Nu kanoko keri kanonge kene

<sup>23</sup> olione "Nu tei." nimulú mele teani. Olio kinie ye kise molemele akumane 'Pulu Yemo kinie wale marenga ulu mare temolo.' ningu mi lelko ningu panjiringi.

<sup>24</sup> Aku yema nu kinie pea tapu toko pukulie, enenga mi leringi walema pora nimbendo nu kinie pea Pulu Yemone ene kake tepili molonge kanomba uluma teko, enenga penge poronjingí kinie nuni kou mone sinjeni. Aku teni kinie yambomane kanokolie, 'Nu kepe Mosisinge ungu manema pilku teko moleno, nuni ulu mare teko kenjilino niringi temanemo kolo toko bulkundu ninjiringi lemo.' ningu kanonge.

<sup>25</sup> Nakolo Juda yambomanga ulsukundu yamboma 'Yesusi yu sike ,ye nomi Kirasimu,' ningu tondolo munduku pilku ,yunge yamboma molemele, mane tengé mele pepá te ou topo sirimulu kanumu. Aku pepána "Teai." nirimulu mele i sipe: "Unju kou melema liku anjiku "Olionga pulu yema." ningulie popo toko langi kalko silimele langime 'Kalaro mololi langime.' ningu naa nongo, melemanga memema naa nongo, kongi kepe melema 'Meme naa ombo pupili.' ningu nomi kolomongo naa tengema naa nongo, wa ulu kerinele naa teangi. Ulu akuma naa tengé kinie aku papu." nimbuaku sipu pepá torumulu kanumu." niringi.\*

<sup>26</sup> Kanu kinie ipulueli oukundu tapu yemane

“Tei.” niringi mele tembando Pollone ye kise kanuma lipe memba pupelie, ene pea Pulu Yemone kake tepili molonge kanomba uluma teringi. Yu aku tepalie, ‘Pulu Yemo popo toko kaloringi, ulke tembelena sukundu pupelie ‘Olio kake tepili molomolo uluma tepo molomolo walema pora nimbé mele nimbu sipu Pulu Yemo popo topo kalomolo melema nane simbu walemo nimbu siembo.’ nimbe ulke tembelena purumu.

<sup>27</sup> Pollo kinie ye kise kanuma Pulu Yemone ene kake tepili molonge kanomba uluma teko moloringi wale yepoko pakara pora nimbé terimu kinie kolea Esia poropinji Juda yambo marene Pollo ulke tembelena molorumu kanokolie, ulke tembelena maku toko moloringi yamboma teko mumindili konjiku Pollo ambolko liku,

<sup>28</sup> ru ningulie ningindu: “Isirele yema, olio ongo liku taponjeyo. I yemone koleamanga pali andopa yamboma temane topa silimo mele i sipe: “Olionga yamboma kinie, olionga ungu manema kinie, i ulkemo kinie, kanoko keri kanoko, olio Juda yamboma telemolo mele naa teai.” nimbe mane silimo yemo imu. Aku uluma mindi naa telemo. Ulu te kinié ya tekemola. I ulke kake telimunge Juda yambomanga ulsu yambo lupe mare memba omu akumunge i ulkemo tepa kenjimu.” niringi.

<sup>29</sup> (Enene Epesasi taono ye Toropimasi Pollo kinie Jerusalleme sukundu tapu toko andoringili kanokolie, ‘Olio Juda yamboma Pulu Yemo popo topo kalemolo, ulke tembelena sukundu pea püngili.’ konopu lelkolie aku siku niringi.)

30 Kanu kinie Jerusalleme moloringi yamboma pali mumindili kolko lkisiku sukundu sukundu ongo Pollo ambolko liku ulke tembelena ulsu kunduku mengo pukulie tamburembu ulke kunema pipi siringi.

31 Yu tonge teko moloringi kinie Romo ami yema nokorumu ye nomimu Jerusalleme yamboma pali teko kenjiku moloringi mele temanemo pilirimu.

32 Pilipelie yu ami ye mare kinie kanu yemanga nokoli yema kinie popenge tepa lipe memba yambo maku toko moloringine lkisipe memba purumu. Amime kinie enenga ye nomimu kinie oringi kanokolie teko kenjiku moloringi yambomane Pollo altoko kopene naa toko we siye koloringi.

33 Ami ye nomimu Pollo molorumuna omba yu ka sipelie ami yemando nimbendo: "Yu ka sene talone ka tai." nirimu. Aku nimbeline yuni yamboma walsipelie nimbendo: "I yemo naeye? Yu nambe temuye?" nirimu.

34 Maku toringi yambomanga marene "I sipe i sipe temu." ningu yu mele mele ungu aisili niringine ami ye nomimu ulumunge pulumu naa pilipe imbi sipelie, yuni nimbendo: "Yu ami yemanga ulkena mengo pai." nirimu.

35 Mengo puringi kinie Pollo ulkena ola puringi polona nondopa purumu kinie yamboma nondoko nondoko ongo yu tonge teringimunge ami yemane yu taropola teko mengo puringi.

36 Yambo lombili puringimene ru ningu "Kolopili toko konjei." niliku lombili puringi.

**37** Ami yemane Pollo enenga ulkena sukundu mengo pungí teringi kinie Pollone ami ye nomimu mawa tepalie “Nane nu ungu te niembo.” nirimu.

Ye nomimuni pundu topa nimbendo: “Nu Giriki ungu pilino lepamo.

**38** Aku liemo ou kolea Isipi ye tene “Romo gapomano tamili.” nimbe yamboma toko konjili ye po tausini lipe kolea ku leline memba purumu kanu yemo nu molo lepamo.” nirimu.

**39** Pollone pundu topa nimbendo: “Na Juda yemo, kolea Sillisia poropinji lemo kolea aili Tasisi nanga koleamo. Nanga koleamo we te molo. Imbi molemo kolea ailimu. ‘Nane yamboma ungu nimbu siembo.’ nimbylie nu mawa tekero.” nirimu.

**40** Ami ye nomimuni “Manda, ni.” nirimu kinie Pollo polona ola angilipelie “Na ungu te niembo, ene taka lelko molai.” nimbe ki ola mundurumu.

Ene taka lelko moloringi kinie yuni Ipuru ungu lepalie enendo nimbendo:

## 22

**1** “Ango tara keme, kinié enenga ungu pundu tambo piliei.” nirimu.

**2** Yuni Juda yamboma enenga Ipuru ungu lepalie nirimuna pilkulie niringimuni, paa ungu naa nili taka lelko moloringi.

Kanu kinie Pollone nimbendo:

**3** “Na Juda yemo. Amane na kolea Sillisia poropinji lemo kolea aili Tasisi merimu. Nakolo na i kolea aili Jerusalleme molopo ai lerindu. Ai lepolie Gamellieleny yema sukuli tenjirimu

kinie na pea sukuli terimulu. Yu paa pilipe konginjili perimu yemo molopalie olionga anda kolepalimenga ungu manema\* pali olio mimi sipe mane sirimu. Akumunge enene kinié Pulu Yemo tondolo munduku pilkulie ‘Yambomane Pulu Yemo paa teko naa kenjengi!’ nilimele mele na aku sipu tondolo mundupu pilipu ‘Yambo tene Pulu Yemo tepa naa kenjipili.’ nimbu molorundula.

<sup>4</sup> “Aku nimbu molopolie nirindumuni, i ulu konde wendo orumumu\* pilku liku tengenji teringi yamboma nane pilipu, ‘Pulu Yemo teko kenjikimili.’ nimbu, ene mindili lipu sipu “Kolangi.” nimbu, ambo yema ka sipu pan-jirindu.

<sup>5</sup> Pulu Yemo popo tonjili ye aili olandopamo kinie\* kanjolloma kinie aku terindu kanoringi mele, kinié nanga kote tenjikimili yema ene kanu yemane manda ningu silimelka. Kanu yemane pepá toko siringi na lipu enenga angenupili ‘kolea Siria poropinji, kolea aili Damasikasi moloringine membo purundu. ‘Akuna kanu ulu konde te wendo orumumu pilku teringi yamboma ka sipu, enene aku siku teko kenjilimelemonga mindili nangi.’ nimbu Jerusalleme yando membo ombondo pepámo lipu membo purundu.

<sup>6</sup> “Kanu kinie kolea aili Damasikasi nondopo pumbu purundu kinie ai tangoli walsikale mulu koleana pa teli te manie ombo na molorunduna pa aili tepa terimu.

<sup>7</sup> Na topa manie mundurumu lepo pilirindu kinie ungu te ombo nando nimbendo: “Sollo,

Sollo, nambemuna nuni na mindili liku sili-noye?" nirimu.

<sup>8</sup> "Nane walsipulie nimbundu: "Ailimu, nu naeye?" nirindu.

"Yuni pundu topa nimbendo: "Na Nasarete taono ye Yesusi, na nuni mindili liku silino yemo." „nirimu..„

<sup>9</sup> Na kinie pea tapu topo purumulu yema pa terimumu kanoko, ye tene nando ungu nirimumu piliringi nakolo ungumu pilku imbi naa siringi.

<sup>10</sup> "Nane walsipulie nimbundu: "Ailimu, na nambe temboye?" nirindu.

'Ailimuni nimbendo: "Ola molko kolea aili Damasikasi sukundu pani. Akuna puni kinie nu 'Teani.' nimbu ou nimbu panjirindu mele ye tene nu nimbe simbe." nirimu.

<sup>11</sup> Tondolo pa telimuni nanga mongomo sumbulu tonjirimuna melte naa kanorundu. Aku-munge na pea tapu topo purumulu yemane na ki ambolko mengo, Damasikasi sukundu puringi.

<sup>12</sup> "Kanu kinie ye te, yemonga imbibmu Ananayasi, na molorundu ulkena na kanombando orumu. Pulu Yemonga ungu mane Mosisini yando nimbe sirimuma yu paa pilipe lipe terimu yemo; Damasikasi moloringi Juda yambomane 'Yu ye peangamo.' ningu kanoringi.

<sup>13</sup> Yu na molorunduna ombo angilipelie nimbendo: "Ango Sollo, nu mongone kelko kanoi." nirimu. Kanu kinie walsikale na mongo makilipu yu kanorundu.

<sup>14</sup> "Kanu kinie yuni nimbendo: "Olionga anda kolepalimene pilku popo toringi Pulu Yemone

‘Nu pilku teani.’ nimbe nu ou mako torumu mele i sipe: ‘Yuni nu ‘Teani.’ konopu lemo mele pilku, Ye Sumbi Nilimu ningu kanoko, kanu yemo yunge ungumu pilieni!’ nimbe nu mako torumu.

<sup>15</sup> Nuni melema kanoko unguma pilirinu mele yamboma pali ningu sini akumunge nu yunge unguma ningu sinjili yemo moloni.

<sup>16</sup> Kapola, nu kinié we naa moloyo. ‘Nanga ulu pulu kerime yuni kulumiyé tonjipili.’ ningu yunge imbi lelko walsikulie, no li.” nirimu.

<sup>17</sup> “Kanu kinie na pe Jerusalleme yando kelepo ombo ,Pulu Yemo popo topo kalemolo, ulke tembelena Pulu Yemo kinie ungu nimbu molopolie kumbu mele tepo

<sup>18</sup> Ailimu kanorundu kinie yuni nando nimbendo: “Pílie. Nuni nanga ungumu ya Jerusalleme ningu sini kinie molemele yambomane naa pilku lingí kene nu Jerusalleme isili welea munduku kelko pui.” nirimu.

<sup>19</sup> “Nane pundu topo nimbundu: “Ailimu, ou nane Juda yamboma maku toko nunge ungumu piliringi ulkemanga andopo, yambomane nu ‘Sike olionga Ailimu.’ niringi yamboma ka sipu ka pulsene torundu kanumu ya molemele yambomane pilku molemele.

<sup>20</sup> Ulu te lupe terindula. Ou Sitipenene nunge ungu nimbe sirimumunge yu toko konjiringi kinie nane kanopolie ‘Papu tokomele.’ nimbu na konopu peanga panjipu, yu toringi yemanga wale pakolime nokonjipu, angilirindu.\* Aku terindu uluma ene kanoko konopu siringi kanumu. „Pe kinié nambemuna nane ungu

nimbúma ‘naa pilingí.’ konopu lekolie “welea pui.” niginuye?,” nirindu.

<sup>21</sup> “Nakolo yuni nando nimbendo: “Pui.” nirimu. “Nane ‘Juda yambomanga ulsu molemele yamboma nanga ungumu piliengi!’ nimbu ene molemele kolea sulumanga “Nu pani.” nimbu lipu mundumbu tekero.” nirimu.” nimbe Pollone nirimu.

<sup>22</sup> Juda yambo maku toringime Pollone ungu nirimuma ou we pilku angiliringi nakolo yuni “Ailimuni na Juda yambomanga ulsu molemele yamboma molemelena “Lipu mundumbu.” nirimu.” nimbe Pollone nirimu kinie pilkulie niringimuni, pilku keri pilkulie tondolo ru ningulie ningindu: “Ya ma koleana yu we konde molomba kinie kapola naa temba. Yu kolopili toko konjei.” niringi.

<sup>23</sup> Ene tondolo ru ningu, enenga wale pakolime kulku liku ambolko wako wako kulku, ma nurupulu ambolko liku toko ola munduringi.\* ‘Yu kinie mumindili kolkomolo mele Romo ami yemane paa piliengi!’ ningu aku teringi..

<sup>24</sup> Aku teringi kinie ami yemanga ye nomimuni nimbendo: “Yemo enenga ulkena liku mengo pai.” nirimu kinie mengo sukundu purungi. Kanu kinie ye nomimuni ami yemando nimbendo: “Yambomane nambemuna yu kinie mu-mindili kolko aku siku ru nikimilinje piliemili nimbe para sipili kene yu ka pulsene toko walsiku piliei.” nirimu.

<sup>25</sup> Nakolo enene Pollo ka pulsene tongendo yu unjuna ka toko panjiringi kinie ami ye wane anderete nokorumu yemo, nondopa kanopa

angilirimu, kanumundu Pollone nimbendo: "Kote naa pilkulie Romo ye te ka pulsene we tonge kinie Romo gapomanomone "Teai." nimbe mane silimo ungu mane te pulue tongenje konopu lekero. Sikeye?" nirimu.

<sup>26</sup> Yuni aku nirimuna ami ye wane anderete nokorumu yemone pilipelie, yu pupe ami ye nomimundu nimbendo: "I yemo Romo ye te lepamo. Pe kinié nambe teniye?" nirimu.

<sup>27</sup> Kanu kinie ami ye nomimu Pollo molorumuna ombo walsipelie nimbendo: "Nu sike Romo yemoye? Na ningu si." nirimu.

Pollone pundu topalie nimbendo: "Na sike Romo yemo." nirimu.

<sup>28</sup> Ami ye nomimuni nimbendo: "'Na Romo yemo molambo.' nimbulie kou mone paa aisili sipu pepá lirindu." nirimu.

Pollone nimbendo: "Aku sike lepamo nakolo na amane merimu kinie Romo yemo molorundu." nirimu.\*

<sup>29</sup> Ami ye Pollo ka pulsene toko walsingí teringi yema yuni "Romo yemo molio." nirimuna pilkulie mini wale munduku anju purungi. Ami ye nomimuni kepe 'Nane Romo ye te "Ka sene toko panjiku ka pulsene tai." nindumunge na mongo pembanje.' konopu lepa mini wale mundurumu.

<sup>30</sup> Romo ami ye nomimuni 'Pollo nambolka uluri tepa kenjimuna Juda yemane yu tonge tekemelenje piliembo.' nimbeline nirimumuni, ipulueli ou 'Pollo ka ulkena wendo pupili.' nimbe, "Pulu Yemo popo tonjili ye ailime kinie Juda kanjollo wema kinie ene maku tamili wai."

nimbelie, kanjolloma\* maku toringi kinie Pollo  
lipe memba ombo enenga kumbikerena anjir-  
imu.

## 23

<sup>1</sup> Kanu kinie Pollone kanjolloma nemo nemo  
nimbe kanopalie nimbendo: "Angokeme, na  
Pulu Yemo kanopa molopili yuni "Tei." nil-  
imo mele andopo telio kinie 'Na Pulu Yemone  
kanopa keri kanolemo ulu te tepo kenjikiru  
lemo.' nimbu naa pilirindu." nirimu.

<sup>2</sup> Aku nirimu kinie Pulu Yemo popo tonjiringi  
ye aili olandopa\* Ananayasini Pollo kinie nondoko  
angiliringi yemando nimbendo: "Yu ker-  
ena laruwe tai." nirimu.

<sup>3</sup> Ananayasini aku nirimu kinie Pollone yundu  
ungu iku topalie, nimbendo: "Ulke kengelena  
peneme kake teli kanjíngimu,\* nu Pulu Yemone  
laruwe tomba. 'Pulu Yemone "Teai." nimbe  
mane silimo mele pilkulie na kote tenjembo.'  
konopu lekeno nakolo "Na laruwe tai." ninkinu-  
munge nu nunu Pulu Yemonga ungu manema  
pulue tokono lemo." nirimu.

<sup>4</sup> Pollo kinie nondoko angiliringi yemane  
ningindu: "Nu Pulu Yemo popo tonjili ye aili  
olandopa kake telimu pipili naa tekemona ungu  
taka tonjikinuye?" niringi.

<sup>5</sup> Pollone nimbendo: "Angokeme, yu kanu ye  
nomimu kanopo imbi naa sipulie aku sipu nindu.  
Ungu te Pulu Yemonga bokuna molemo mele i  
sipe:

'Enenga ye nomimu ungu taka naa tonjengi.\*'

nimbe molemo, akumu na pilio. ‘Yu aku ye nomimu molemo.’ nimbu kanopo imbi silkenje yu ungu taka naa tonjilke.” nirimu.

<sup>6</sup> Pollone aku nimbeline nirimumuni, yu yuyu konopu kimbu sipelie ‘I kanjollo ye mare Sadusi yema, mare Parisi yema lemo.’\* konopu lepalie, yuni nimbendo: “Angokeme, na Parisi yemo moliola. Tara Parisi yemo molorumula. ‘Yamboma kolkolie lomboroko ola molonge.’ nimbu pilio. Na aku sипу konopu leliomonga na kote tenjikimili.” nirimu.

<sup>7</sup> Yuni aku nirimu pilkulie, Parisi yema kinie Sadusi yema kinie kerepali ningulie, kanjollo yema talape talo mele moloringi.

<sup>8</sup> (Kerepali niringimunge pulumu i sipe: Sadusi yemane ningindu: “Yambo te kolopalie lomboropa ola naa molomba. Angelloma kinie minime kinie kuruma kinie naa molemele.” niringi nakolo Parisi yemane ningindu: “Yamboma lomboroko ola molonge. Angelloma kinie minime kinie kuruma kinie paa sike molemele.” niringi.)

<sup>9</sup> Aku ningu piliringi mele Pollone pilipelie ungu nirimu pilkulie kanjolloma mumindili kolko tondolo kerepali ningu anju yando ungu panjiringi. Pulu Yemonga ungu manemanga puluma pilku mane siringi ye mare,\* ene Parisi yema moloringi, kanumane ola angilku tondolo mundukulie ningindu: “I yemo ‘Ulu te tepa naa kenjimu.’ nimbu pilkimulu. Yu mini tene molo angello tene ungu te nimbe simunje?” niringi.

<sup>10</sup> Ene tondolo irinele tekо paa mumindili koloringine Romo ami ye nomimuni mini wale mundupelie, ‘Pollo anju yando kundukulie yu

toko konjingí.' konopu lepalie, ami yemando nimbendo: "Ene maniendo puku, yu tondolo munduku liku mengo ulkendo wai." nirimu.

<sup>11</sup> Opalikundu ipulueli Ailimu\* Pollo molorumuna nondopa ombalie nimbendo: "Nu pipili naa kolko toembo toko moloi. Kinié ya kolea aili Jerusalleme nanga ungumu ningu sinu, aku siku mele nuni kolea aili Romo\*\* ungumu ningu sini lemo." nirimu.

<sup>12</sup> Ipulueli ou Juda ye ailimene ungu te ningu panjikulie ningindu: "Pollo topo konjemili. Ou naa topo konjipulie, no kinie langi naa nomolo." ningu mi leringi.

<sup>13</sup> Pollo tongendo langi niringi ye tu paono mele moloringi.

<sup>14</sup> Aku siku ningu panjikulie, ene Pulu Yemo popo tonjiringi ye ailime kinie Juda yambo-manga tapu yema kinie\* moloringine pukulie ningindu: "Olio ungu te nimbu panjipu mi lemulu mele i sipe: "Pollo ou naa topolie nimulúmuni, langi wallo kolte kepe paa naa nomolo." nímulu.

<sup>15</sup> Aku temulu kene kanjolloma kinie enene ami ye nomimu molemona ningu mundukulie kolo toko yundu "Pollo ungu mare altopa omba nimbe sipili. Puluma paa mimi sipu piliemili, memba maniendo opili." niei." niringi. "Pe yu mengo onge kinie ene molongena ou naa opili aulkena nokopo molopo yu topo konjimulú." niringi.

<sup>16</sup> Nakolo Pollo kemulunge Malone, enene yunge kepa tongendo langi niringi mele pilipelie,

yu ami yema peringi ulkena Pollo molorumuna  
pupe nimbe sirimu.

<sup>17</sup> Kanu kinie Pollone ami ye wane anderete  
nokorumu ye te "Oi." nimbeline yundu nim-  
bendo: "I kango yemo enenga ye nomimu ungu  
te pelemomo nimbe sipili, yu molemona mengo  
pani." nirimu.

<sup>18</sup> Pollone aku nirimu pilipelie kanu yemo  
yunge ye nomimu molorumuna kango yemo  
memba purumu.

Membra pupelie ami ye nomimunu nim-  
bendo: "Ya ka ulke pelemo ye 'Pollo' nili kanu-  
muni nando "Oi." nimbeline nimbuendo: "I kango  
yemo nunge ye ailimunu ungu te nimbe kene  
yu molemona mengo pui." nimuna membo  
okoro." nirimu.

<sup>19</sup> Ye nomi kanumuni kangomo ki ambolopa  
memba tenga lupe pupe eltelte molkololie yu  
walsipelie nimbuendo: "Nuni nambolka unguri  
ninindu onuye?" nirimu.

<sup>20</sup> Kangomone yundu nimbuendo: "Juda ye ail-  
imene 'Opali nu walsiku, "Ene Pollo ungu mare  
altopa ombo nimbe sipili, puluma paa mimi  
sipu piliemili, nuni olio kanjolloma molomolona  
mengo maniendo wani." kolo topo aku sipu  
niemili.' ningou ningu panjíngi.

<sup>21</sup> Nakolo enenga ungu ningí mele naa pilieni!  
Enenga ye tu paono mele "Olio ou Pollo topo  
naa konjipulie langi kepe no kepe naa nomolo."  
ningou mi lengi. Nuni "E." ningu mengo oni kinie  
toko konjingindu aulkena nokoko molonge." nir-  
imu.

**22** Ami ye nomimuni kango yemondo nimbendo: "Kinié na ningu sakinu mele anju yambo tendo lupe paa naa ningu sikulie we pui." nirimu.

**23** Kangomo purumu kinie ami ye nomimuni ami ye wane anderete wane anderete ningulu nokoringili yetolo "Wale." nimbeline nimbendo: "Elte ami ye tu anderete kinie kongi otene andolemele ami ye tere paono tene kinie toló mengo andolemele ami ye tu anderete kinie liku maku tokolie, kinié ipulueli ena nani killoko Pollo mengo kolea aili Sisaria pangí.

**24** Pollo aulkena tonge kene yu kongi otene molopili kolea Pellisitane disiriki Romo gapomano ye Pillikisi kolea aili Sisaria molemona mengo pangí. Yu aulkena ulu te wendo naa opili nokoko konjiku mengo pangí." nirimu.

**25** Aku nimbeline ye nomimuni 'Pillikisi puku siengi.' nimbe pepá te topalie nimbendo:

**26** 'Na Lodiasi LLisiasini i pepámo  
nu gapomano ye paa aili Pillikisi topo sikiru.  
"Nu molko konjikinuye?" nikiru.

**27** I ye mengo okomelemo Juda yambomane  
ambolko liku toko konjingí tengi nakolo  
na kinie nanga ami yema kinie ombolie  
'Yu Romo yemo.' nimbu pilipulie na kinie  
ami yema olione yu wendo lipu membo púmu.

**28** "Yu tepa kenjimu." ningu  
tonge tengimunge pulumu pilimbundu  
enenga kanjollo yema molongine membo pundu.

**29** Membo pupulie pilindu kinie  
enenga ungu manema pulue tomuna  
aku siku ningi pilindu. Yu kote tenjikulie

Lipe Mundurumu Yema 23:30      cl      Lipe Mundurumu Yema 23:35

“Kolopili.” ningí molo “Ka siemili.”

ningí aulke te naa lemu.

<sup>30</sup> Kanu kinie pe yu tongendo langi níngi mele  
yambo tene na nimbe simu pilipulie, tambu-  
rembu

ami yemando “Nu molenona mengo pai.” nindu.

“Yu kote tenjemili.” níngi yemando “Yu tepa

kenjimu kene kolopili.” níngimunge pulumu

‘Nu pilieni.’ nimbu “Sipai.” nindu.’

nimbe yu pepá te topa aku sipe nirimu.

<sup>31</sup> Kanu kinie ami ye nomimuni “Teai.” nirimu  
mele tengendo ipulueli Pollo liku mengo Andi-  
patirisi taonona puku pekolie niringimuni,

<sup>32</sup> ipulueli ou ‘Kongi otena andoli ami yema  
Pollo lkisiku mengo pang.’ ningu ami ye wema  
kelko yando oringi.

<sup>33</sup> Otena andoli ami yema Pollo mengo kolea  
aili Sisaria suku ongolie, gapomano ye ail-  
imu molorumuna Pollo mengo pukulie pepámo  
siringi.

<sup>34</sup> Gapomano ye ailimuni pepámo lipe  
kanopalie, Pollo walsipelie nimbendo: “Nunge  
poropinji tenaye?” nirimu.

Pollone nimbendo: “Na kolea Sillisia poropinji  
yemo.” nirimu kinie pilipelie nirimumuni,

<sup>35</sup> yuni nimbendo: “Nu ‘kote tenjemili.’ nikim-  
ili yema onge kinie nunge kotemo piliembo.”  
nirimu. Aku nimbeline yuni nimbendo: “Pollo ye  
nomi kingi Ertene ou takopa perimu gapomano  
ulkena pepili mengo puku nokai.” nirimu.

## 24

<sup>1</sup> Pollo kolea aili Sisaria mengo puringi pe wale te pakara omba purumu kinie Pulu Yemo popo tonjiringi ye aili olandopa Ananayasi kinie Juda yambomanga tapu ye mare kinie\* Juda yambomanga ungu manema pilirimu ye Tetallasi kinie kolea aili Sisaria maniendo ongolie niringimuni, gapomano ye aili Pillikisindu Pollo kote tenjingí mele ningu siringi.

<sup>2-3</sup> Kanu kinie yuni Pollondo “Oi.” nirimu orumu kinie Juda ye ailimenga lipe taponjipe kote tenjili ye Tetallasini Pollo kote tenjipelie Pillikisindu nimbendo:\*

“Ye Paa Aili Pillikisi, nuni olio nokoleno kinie opa te wendo naa opili molopo konjilimolo. Ou olio molopo kenjirimulu nakolo nuni olio nokoko “I sipe i sipe wendo opili.” nilinomonga kinié olio molopo konjilimolo. Akumunge kinié olio konopu peanga pekemonu nu kinie “Paa ange.” nikimulu. Paa papu teleno.

<sup>4</sup> Nakolo olione we ungu aisili nimulú kinie nu siye temba kene ponjipu niemili pilku molani.

<sup>5</sup> “I yemo ‘Yamboma mongo liku molko kenjengi.’ nimbe, Juda yamboma molemele koleamanga pali andopa ‘Ene anju yando konopu keri panjiku irinele teko molko kenjengi.’ nilimo yemo. Yu olio Juda yambomanga ungu manema munduku kelko ‘Nasarete yemonga yamboma’\* nilimelemanga ye nomi te.

<sup>6</sup> Yu aku sipe mindi tepa naa kenjilimo. „Olio Juda yamboma Pulu Yemo popo topo kalemolo, ulke tembelemo tepa kenjimbe terimula. Aku

sipe tepe molorumu kinie yu pupu ambolourumulu. Ambolopolie ‘Olionga ungu manema pilipu yu kote tenjemili.’ nirimulu,

<sup>7</sup> nakolo Jerusalleme nokoringi Romo ami yemanga ye nomi LLisiasini ombo tondolo mundupe wendo lipe memba pupelie

<sup>8</sup> nimbendo: “Yu kote tenjingí yema Pillikisi molombana puku kote tenjengi.” nirimu. Kinié nuni yu sumbi siku walsini kinie, olione kote tenjilimolo mele yuni nimbé pilkulie nuni ungu pulumu sumbi siku pilini.” nirimu.

<sup>9</sup> Tettallasi pea angiliringi Juda yemane “Pollo sike aku sipe temu mele nikimu.” niringi.

<sup>10</sup> Kanu kinie gapomano ye ailimuni Pollondo “Sike aku siku terinuye?” nirimu kinie Pollone pundu topa nimbendo:

“Nu ponie aisili olio Juda Yambomanga kote ailime pilino yemo molenomonga nanga kote, kinié pilinimunge na konopu pe nipili kote tembo.

<sup>11</sup> Na Pulu Yemo popo topo kapi nimbundu Jerusalleme olando purundu kinie pe kinié koro talo mele mindi ombo pukumu. Pe kinié yamboma walsinu liemo ‘Sike aku sipe terimu.’ ningí.

<sup>12</sup> Na ulke tembelena suku yambo te kinie irinele tepo, ene maku toko Pulu Yemonga ungumu pilimele ulke tengah pupu yamboma tepo mumindili konjipu, kolea aili Jerusalleme, sukundu ulu te tepo kenjirindu mele na kote tenjikimili yemane te paa naa kanoringi, molo.

<sup>13</sup> I na kote tenjikimili yemane na ulu temu nikimili mele ‘Ye te ombo “I uluma paa sike

temu, na mongone kanondu.” nipili.’ ningu te paa manda naa liku mengo ongela.

<sup>14</sup> “Nakolo nane nundu ungu te paa sike nimbu para simbu. Akumu i sipe: Na olionga anda kolepalimene popo toringi Pulu Yemo popo topo imbi ambolopo ola linjimulundu ‚Yesusi kinie, ulu konde wendo orumu akumu na sike pilipu tepo molio. Kanumu Juda ye ailimene ‘Olionga ungu puluma lawa teko talape talo tepo molamili.’ nilimele kanu ulumu na sike pilipu tepo molio. Mosisini boku torumuma kinie, Pulu Yemone ungu umbu tonjirimuma pilku yamboma ningu siringi yemane boku toringime kinie,\* kanu bokumanga molemo unguma pali nane ‘Sike unguma.’ nimbu tondolo mundupu pilipu molio.

<sup>15</sup> I nanga kote tenjikimili yemane ‘Pulu Yemone “Tembo.” nirimu mele sike temba.’ ningu konopu siku nokoko molemele ulumu kinie, nane ‘Pulu Yemone “Tembo.” nirimu mele sike temba.’ nimbu konopu sipu nokopo molio ulumu kinie, telumu. Akumu i sipe: ‘Olio mana yamboma kolopolie, tepo peanga tepo molemoloma kinie, tepo kenjipu molemoloma kinie, pali lomboropo ola molomolo.’ nimbu tondolo mundupu pilimolo.

<sup>16</sup> ‘Aku sipu temolo.’ nimbu pilipu moliomonga Pulu Yemone kepe mana yambomane kepe nane ulu telioma kanokolie ‚Tepo kenjikiru.’ ningu naa kanangi.’ nimbu konopuni pilipu molio.

<sup>17</sup> “Na ponie pokorenga kolea lupemanga molopolie nirindumuni, pe kelepo nanga yam-

Lipe Mundurumu Yema 24:18      cliv      Lipe Mundurumu Yema 24:22

boma molemelena Jerusalleme yando talko orundu.\* Kolea lupe yambomane Jerusalleme yambo koropama kondo kolko liku maku toringi kou monema ene simbundu membo ombo, Pulu Yemo popo topo melema kalombondo orundu.

<sup>18</sup> Olio Juda yambomane ‘Pulu Yemone olio kake tepili molomolo kanopili.’ nimbu telemolo mele tepo ulke tembelena kake tepili molorundu kinie na ongo kanoringi. Ongo kanoringi kinie na kinie yambo aisili maku naa topo, na yamboma kinie ungu aisili naa nirimulula.

<sup>19</sup> “Nakolo Esia poropinji Juda ye mare ongo\* yamboma teko mumindili konjiku na amboloringi kanu yemane ya kotena ongo na kinie ungu te pelemomo kote tenjilimelkanje papu.

<sup>20</sup> Na Juda yambomanga kanjollo\* maku toringine angilirindu kinie na kinie mongo perimu piliringi mele\*\* i ongo angilkimili yemane ningu para silimelkanje papula.

<sup>21</sup> Molo kanjolloma moloringine molopolie ungu te tondolo mundupu nirindu kanumunge ya kinié kote tenjikimilinje? Nirindu mele i sipe: “Yamboma kolkolie lomboroko ola molonge.” nirindu akumunge kinié enene na kote tenjikimilinje?”\* nimbe Pollone aku sipe nirimu.

<sup>22</sup> Pillikisi yu Juda yamboma kinie ulu te lupe wendo orumu enenga yambo marene pilku tengen panjiku moloringi mele ou pilirimu. Pollone ungu nimbe pora sirimu kinie yuni nimbendo: “Romo ami ye Jerusalleme moloringimenga ye nomi LLisiasi ombá kinie ene ungu nikimili mele kamu pilipu pora simbu kene isili ou we nokoko molopai.” nirimu.

**23** Aku nimbeline nirimumuni, ami ye wane anderete nokorumu yemondo nimbendo: “Pollo mengo puku ka ulkena panjipani. Nakolo yu tondolo ingi siku ka naa toko, yunge pulu lemo yambomane ‘Yu nokamili. Molo tomba melema nimbu pilipu yu lipu taponjemili.’ ningu onge kinie enene “Molo.” naa niei.” nirimu.

**24** Wale mare omba purumu kinie Pillikisi kinie yunge menu Derusillatolo oringili. Derusilla yu Juda ambomo. Oringili kinie Pillikisini “Pollo opili.” nimbe, ungu nimbe mundurumu kinie Pollo omba yambomane ‘Yesusi yu sike Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu.\* ningu manda tondolo munduku piliengi mele nimbe sirimu kinie pilipe molorumu.

**25** Kanu kinie Pollone yamboma sumbi nilime molonge mele kinie, yamboma ene eneno nokoko konjingí mele kinie, ‚Pulu Yemone,‘ yamboma kote tenjimbe walemo wendo ombá mele kinie, kanu unguma nimbe molorumu kinie Pillikisi mini wale mundupelie nimbendo: “Manda ningu, pani. Pe ena te we lemba kinie nu kelko ‘Oi.’ nimbú kene pui.” nirimu.

**26** Kanu kinie Pillikisini ‘Pollo yu ‘Lipe taponjipili.’ nimbe kou sipili.’ nimbe alieli Pollondo “Oi.” nirimu kinie Pollo yu Pillikisi molorumuna alieli orumu, yu kinie ungu ningu moloringili.

**27** Pollo kolea Sisaria taono ka ulkena pepili ponie talo omba purumu kinie Posiasi Pesitasi omba Pillikisi kolo wangopa molorumu kinie Pillikisini ‘Juda yema na kinie konopu peanga

panjengi.' nimbe Pollo ka ulkena we pepili yu purumu.

## 25

<sup>1</sup> Pesitasi kolea Judia disiriki gapomano ailimu omba kolo wangopa kolea aili Sisaria molopalie nirimumuni, wale yepoko ombo purumu kinie Jerusallemando olando purumu. Pollo kolea aili Sisaria ka ulkena pepili yu Jerusallemando olando purumu.

<sup>2</sup> Akuna purumu kinie Pulu Yemo popo tonjiringi ye ailime kinie\* Juda yambomanga ye ailime kinie Pesitasi molorumuna ongo, Pollo kinie ungu te perimu kote tenjingí teringi mele ningu siringi.

<sup>3</sup> Enene yu tondolo munduku mawa tekolie ningindu: "Nuni olio konopu siemili liku taponjiku, 'Pollo ya ka ulkena pepili Jerusalleme yando liku mundengi.' ni." niringi. Enene Pollo aulkena nokoko molko tongendo\* aku siku niringi.

<sup>4</sup> Pesitasini enendo pundu topa nimbendo: "Pollo kolea aili Sisaria ka ulkena pelemo, na nondopo Sisiando maniendo pumbu kene

<sup>5</sup> na pumbu kinie enenga ye aili mare pea pamili. Kanu yemo ulu mare tepa kenjirimu liemo Sisaria pumulú kinie yu kote tenjengi." nirimu.

<sup>6</sup> Kanu kinie Pesitasi koro telu molo koro talo mele Jerusalleme molopalie nirimumuni, Sisaria maniendo ombalie ipulueli ou "Kote teamili Pollo liku mengo wai." nirimu.

**7** Pollo yu kotena orumu kinie Jerusalleme molko Pesitasi kinie pea maniendo oringi Juda yema yu angilirimuna nondoko ongo angilkulie, yuni ulu te tepa kenjirimu mele naa kanoringi nakolo kolo tokolie ningindu: "Yuni ulu aisili paa tepa kenjirimu." niringi.

**8** Pollone 'Yu sike terimu mele piliengi!' nimbeline nimbendo: "Juda yambomanga ungu manema\* kepe, ene Pulu Yemo popo toko kalemele ulke tembelemo kepe, Romo Gapomano Ye Paa Aili Kumbine Sisamonga ungu manema kepe, ungu taka tonjipu tepo naa kenjirindu lemo." nirimu.\*\*

**9** Nakolo Pesitasini 'Juda yamboma na kinie konopu peanga panjengi!' nimbeline Pollondo nimbendo: "Nunge kote Jerusalleme piliembo, olando pamiliye?" nirimu.

**10** Pollone yundu pundu topa nimbendo: "I kote tepo molemolomo Romo Gapomano Ye Paa Aili Kumbine Sisamonga kotemo. Nane Juda yamboma kinie ulu te tepo naa kenjirindu mele nu pilku moleno. Akumunge Juda yambomanga kotena na nambemuna pamboye? Ya Romo gapomanomone kote pilkimumu manda.

**11** 'Na kolambo.' nimbu ulu te tepo kenjirindu liemo aku manda, toko konjengi. Na ungu te naa nimbú. Nakolo kolo toko na kote tenjíngi liemo yambo tene na lipe ene simbe te naa molemo. Kolea aili Romo molopa koleamanga pali nokolemo Romo Gapomano Ye Paa Aili Kumbine Sisamone nanga kote pilipili na akuna pambo liku mundoi." nirimu.

**12** Kanu kinie Pesitasini yu kinie tapu toko molko liku taponjiringi yema kinie anju yando kerepali ningulie, pe yuni pilipelie nimbendo: "Nuni 'Romo Gapomano Ye Paa Aili Kumbine Sisamone nanga kote pilinjipili yu molemona pambo.' nikinumunge akuna sike puni lemo." nirimu.

**13** Wale mare omba purumu kinie ye nomi kingi Akiripa kinie yunge kemulu Benasitolo 'Pesitasi gapomano ye aili molomba omu kene kanambili pambolo.' ningulu kolea aili Sisaria oringili.

**14** Elte "Wale aisili Sisaria molombolo." niringili pilipelie Pesitasini ye nomi kingimundu nimbendo: "Pillikisini ye te ka ulkena pepili purumu kanu yemo ya ka ulkena we pelemo.

**15** Na talko Jerusalleme olando purundu kinie Pulu Yemo popo tonjili ye ailime kinie, Juda yambomanga tapu yema kinie,\* enene na molorunduna ongolie ningindu: "Yu i sipe i sipe tepa kenjimu kene yu mongo lipili ni." niringi.

**16** "Nane enendo pundu topo nimbundu: "Olio Romo gapomano yemane yambo te we umbuni te naa silimolo. Kote pilipu, kote tenjilimele yambomanga unguma pilipulie, kote tenjilimele yambomo yuni yando ungu te pundu topa nilimo kinie pilipulie, yambomo mongo te pelemo kinie pilipulie mongo silimolo. We naa silimolo." nirindu.

**17** Kanu kinie ene na kinie pea Jerusalleme mundupu kelepo maniendo orumulu kinie nane ipulueli oukundu sumbi sipu 'Yu kotena opili.' nirindu.

**18** Yu kote tenjiringi yema ongo angilku yu kote tenjiringi kinie 'Yu mongo simbu ungu te ningi.' konopu lerindu nakolo te naa niringi.

**19** Yu kinie mumindili koloringimunge ungu pulu talo pelemo. Enenga Pulu Yemonga ungu pulumu lupe lupe ningu pilku, ye ou kolorumu, yunge imbi Yesusi niringi, kanu yemo Pollone "Konde molemo." nirimu kinie "Kolo tokomo." ningulie, kerepali niringi.

**20** "Aku siku niringimunge ungu pulumu pilimbu pilipu sundupulie yu walsipulie nimbundu: "I kotemo Jerusalleme teamili olando pamiliye?" nirindu.

**21** Nakolo Pollone nimbendo: "Molo. Nanga kotemo Romo Gapomano Ye Paa Aili Kumbine Sisamone pilipili." nirimu kinie pilipulie nane nimbundu: "Kapola, Romo puni aulke te koronjembo kene ou ka ulkena we pei." nirindu." nirimu.

**22** Kanu kinie Pesitasini nirimu mele ye nomi kingi Akiripane pilipelie yuni yundu nimbendo: "Nane i yemonga ungumu piliembo konopu lekero." nirimu.

Pesitasini nimbendo: "Kapola, opali pilieni." nirimu.

**23** Ipulueli oukundu Kingi Akiripa kinie kemulu Benasitolo au ningu konjikulu, yambo maku toko moloringi ulkena yamboma kanokolie kolape mingi langoko imbi ambolko ola liku, taka lelko molangi elte ulkena sukundu oringili. Ami ye ailime kinie kolea aili Sisaria nokoringi ye ailime kinie oringi kinie pea maku

toringi. Kanu kinie Pesitasini “Pollo mengo wai.” nirimu kinie yu mengo oringi.

**24** Omba angilirimu kinie Pesitasini nimbendo:

“Ye Nomi Kingi Akiripa kinie ene pea ya molemolo yamboma pali, enene i yemo kanayo. Juda yambo Jerusalleme molemelema kinie ya molemelema kinie enene pali na kanopo molambo i yemo kote tenjikulie tondolo munduku ningindu: “Yu konde molomba kinie kapola naa temba. Kolopili.” niringi.

**25** Nakolo yu kolomba ulu pulu te naa pilirindu. Nakolo yuni nimbendo: “Romo Gapomano Ye Paa Aili Kumbine Sisamone nanga kotemo pilipili.” nirimune “Kapola, Kolea aili Romondo pani.” nirindu.

**26** Nakolo Romo Ye Ailimuni yu kote pilimbe mele pepá topo simbu ungu pulu te naa pilkiru. Akumunge, Kingi Akiripa kinie ene ya molemele yamboma pali ‘Pollone nimbé mele enene pilkulie pepá tombo mele ningu siengi.’ nimbu membo okoro.

**27** ‘Ka ye te Romo ye ailimu molemona we lipu mundumbu kinie kapola naa temba.’ konopu lekeru. Yunge kote pelemomonga pulumu pepá topo nimbu para sipulie yu lipu mundumbu kinie papu.” nirimu.

## 26

**1** Pesitasini aku sipe nirimu kinie Akiripane Pollondo nimbendo: “Nu ungu te pemba na ningu si.” nirimu.

Kanu kinie Pollone ‘Kolo tokolie yu kote tenjiringi mele pilipili.’ nimbe pundu topa nimbendo:

<sup>2</sup> “Ye Nomi Kingi Akiripa, Juda yemane na kote tenjiku, “Tepa kenjirimu.” nikimili, kolo toko nikimili mele nu pilieni nimbu simbumunge na konopu sikiru.

<sup>3</sup> Juda yambomanga ulu puluma kinié ene eneno konopuni pilku kerepali nilimele mele nu paa pilku konjilinomonga na konopu paa peanga pepili nu nimbu simbu. Akumunge ‘Nane ungu nimbumu toko pulue toko mumindili naa kolko, we mimi siku pilku molani.’ nimbu mawa tekero.

<sup>4</sup> “Na ou kango kinie nanga pulu koleana molopolie terindu mele kinie, pe ai lepo Jerusalleme pupu molopo terindu mele kinie, Juda yambomane pali pilku kanolemele.\*

<sup>5</sup> Nane terindu mele ponie aisili pilku kanokolie, nane tepo molorundu mele ‘Piliengi nimbu siemili.’ nilimelkanje nane ou Parisi molopolie terindu mele ningu silimelka. Parisi yema\* olio Juda yambomanga ungu manema paa mindili siku pilku telemele. Juda yambomanga ungu manema Parisi yemane pilku telemele mele olandopa; we yambomane olionga ungu manema pilku telemele mele maniendopa.

<sup>6</sup> Na kote tenjikimili yema kinie olio, Pulu Yemone olionga anda kolepalimendo “Tembo.” nirimu mele nane pilipulie ‘Paa aku sipe temba tekemo.’ konopu leliomonga na kinié kote tenjikimili.

<sup>7</sup> Nane ‘Wendo ombá.’ konopu lepo nokopo molio mele olio Juda yambomanga talape tuwellepo molemolo yambomane pali ‘I ulumu wendo opili.’ ningu, ipulueli tangoli Pulu Yemonga ungu pilku yunge imbi ambolko ola linjiku nokoko molemelela. Ye Nomimu, aku ulu telumu mindi olio Juda yamboma nokopo molemolo nakolo na aku sipu pilipu nokopo moliomonga Juda yambomane eneno na kote tenjikimili.

<sup>8</sup> Ene yambo marene nambemuna ‘Pulu Yemone yambo kolemelema manda naa topa makinjimbe.’ konopu lemeleye?

<sup>9</sup> “Ou nane kepe ‘Yamboma Nasarete ye Yesusi paa naa piliengi!’ nimbu ulu umbuni aisili siembo.’ nimbu molorundu.

<sup>10</sup> Jerusalleme nane aku sipu terindu. Pulu Yemo popo tonjili ye ailimene\* “Aku siku tei.” ningu namba siringi kinie ‘Pulu Yemonga’ kake teli yambo\*\* aisili ka sirindu. “Kolangi.” niringi kinie nane “E.” nirindula.

<sup>11</sup> Juda yamboma maku toko Pulu Yemonga ungumu piliringi ulkemanga pupu Yesusi piliringi yamboma kanopo lipu “Mindili nangi.” nimbu, “Yesusi yu Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu molo.” ningu, yu ungu taka tonjei.” nirindu. Yu pilku moloringi yamboma mumindili paa kolopolie, kolea lupemanga moloringime lipu, mindili lipu sipu ka simbundu lombili purundu.\*

<sup>12</sup> “Aku sipu telipu andopolie, Pulu Yemo popo tonjili ye ailimene ‘Aku siku tepui.’ ningu pepá

te toko na siringi kinie lipu membo kolea aili Damasikasi purundu.

<sup>13</sup> Ye Aili Akiripa, na kolea aili Damasikasi pumbu purundu kinie, ai tangoli aulkena purundu kinie muluna pa terimu kanorundu. Akumu ena tolemo mele maniendopa. Yu tondolo pa terimu kinie na kinie tapu topo purumulu yema kinie olio molorumuluna tondolo pa terimu.

<sup>14</sup> Aku terimu kinie olio pali topa manie mundurumu kinie na manie lepo pilirindu kinie ungu te omba Ipuru unguna nimbendo: "Sollo, Sollo, na nambemuna mindili liku silinoye? Nunu tolo wisiku anjikulie lendiyé pulino."\* nirimu.

<sup>15</sup> "Kanu kinie nane walsipulie nimbundu: "Ailimu, nu naeye?" nirindu.

"Ailimuni pundu topalie nimbendo: "Na Yesusi, nuni alieli mindili liku silino yemo.

<sup>16</sup> Kinié ola angili. 'Nu nanga kendemande yemo molko, na kanonu mele kepe, nane pe lipu ora simbu mele kepe, pilku kanokolie yamboma anju ningu sieni.' nimbu nu ongo puni pununa ombo mona angilipu, na molio mele nu lipu ora sikiru.

<sup>17-18</sup> Nunge Juda yamboma kinie yambo lupaema kinie enene 'Nu tamili.' ningí kinie 'Nu naa tangi.' nimbu lipu taponjimbu. 'Na sike molopa ene lipe taponjimbe.' nilimele yamboma Pulu Yemone enenga ulu pulu kerime 'Manie pupili.' nimbe siye kolopa, yuni 'Nanga yamboma manjiku molko, yambo kake telime molangi.' nirimu yamboma 'Sike yunge

yamboma molangi.' nimbu, nu ene molemele 'Pui.' nimbu lipu mundukuru.\* Enenga mongo kumbulku molemele yamboma 'Makiliengi.' ningu, sumbulu tolina molemele yamboma 'Munduku kelko pa teline molangi.' ningu, 'kurumanga nomi, Setenenga\*\* ton-dolomone yamboma ambolemomo 'Naa ambolopili. Munduku kelko Pulu Yemo molemona wangi.' nieni. Ene kinie aku siku teni kinie sike aku siku tengen yamboma ene sike Pulu Yemonga yamboma molongena 'Aku teani.' nimbu ene molemelena nu lipu mundukuru." nimbe yuni nando aku sipe nirimu.

<sup>19</sup> "Ye Nomi Kingi Akiripa, na muluna wendo ombo ungu nirimu mele pilipulie, lipu su sipu mundupu naa kelerindu.

<sup>20</sup> "Tei." nirimu mele tembondo ou pulu pulu kolea aili Damasikasi pupu ungu nimbu sipu, pe kolea aili Jerusalleme ombo nimbu sipu, Judia disiriki sukundu lerimu koleamanga pali andopo nimbu sipulie, pe yambo lupe moloringi koleamanga andopo nimbu sirindula. Nane ene nimbu sipulie nimbundu: "Enenga ulu pulu kerime kanoko keri kanoko konopu alowa teko, Pulu Yemo molemona ongolie, 'Sike konopu alowa tendu lepamo.' ningu Pulu Yemone kanopa peanga kanolemo uluma teangi." nirindu.\*

<sup>21</sup> Nane aku sipu andopo nimbu sirindumunge Juda yamboma Pulu Yemo popo toko kalemele, ulke tembelena molorundu kinie Juda yambome na ambolko liku toko konjingí teringi.

<sup>22</sup> "Nakolo Pulu Yemone na lipe taponjirimu mele kinié kepe aku sipe lipe taponjilimo, aku-

munge na ya angilipu, ene we yamboma kinie yambo ailime kinie pilipu lipu terindu mele teliomu ene nimbu silio. Mosisi kinie, Pulu Yemone ungu umbu tonjirimuma pilku yamboma ningu siringi yema kinie, enene\* "Wendo ombá." niringi mele mindi ene temane topo sikiru. Te lupe naa nikiru. Akumu i sipe:

<sup>23</sup> "Pulu Yemone 'Olio nokopa konjimbe ye te lipu mundumbu.' nimbe mako torumu ye nomi Kirasimu\* mana ombo mindili nombalie, yambomanga pali yu kumbi lepa yambo ono koleana lomboropa ola molomba. Aku tembamonga yunge Isirele yamboma kinie yambo lupema kinie ene lipe taponjipe pa tenjimbe." niringi mele kamu aku sipe wendo orumu. 'Kanu ye nomi Kirasimuni sike yamboma lipe taponjimbe.' nimbu ene temanemo topo silio." nirrimu.

<sup>24</sup> Pollone kokele aku sipe nimbé nirimu kinie Pesitasini yunge ungumu topa pulue topa ru nimbeline nimbendo: "Pollo, nu kekelepa topano. Nu sukuli aisili terinu akumuni nu lipe kekelepa mundukumu." nirimu.

<sup>25</sup> Pollone pundu topalie nimbendo: "Ye Aili Pesitasi, na kekelepa naa tokoro. Nikiru ungumu sike nikiru, umbu konopu pepili nikiru.

<sup>26</sup> I nikiru mele ya ye nomi kingi Akiripa ou pilimomonga na pipili naa kolopo yundu manda sumbi sipu nimbú. I ulu wendo orumuma yamboma naa kanoko molangi lopi tepa wendo naa orumuna yu kepe kanorumula.

<sup>27</sup> Ye Nomi Kingi Akiripa, Pulu Yemone ungu umbu tonjirimuma pilku yamboma ningu siringi

yemane wendo ombá niringi mele “Sike aku sipe wendo ombá.” ningu pilkinuye? ‘Nuni sike aku siku ningu pilkinu.’ nimbu pilkiru.” nirimu.

<sup>28</sup> Kanu kinie Akiripane Pollondo nimbendo: “Na kinié walsikale nuni ungu ninimu pilipulie ‘Kirasinge yemo molambo.’ nimbú konopu lekenoye?” nirimu.

<sup>29</sup> Pollone pundu topa nimbendo: “Kinié wal-sikale kepe mandala, molo pe walse mandala. Nane Pulu Yemo kinie ungu nimbu mawa tepolie nimbundu: “Nu kepe, ungu nikiru pilkimili yamboma kepe, ene pali na molio mele molangi.” nimbu nikiru. Nakolo na ka senene ka tongi angilkiru akumundu naa nikiru. ‘Kirasinge yamboma molko Pulu Yemo kinie kapola kapola molonge kinie papu.’ nimbu nikiru.” nirimu.

<sup>30</sup> Kanu kinie kingimu ola angilirimu kinie gapomano ye ailimu kinie kingimunge kemulu Benasi kinie ene pea moloringi yamboma pali ola angilkulie niringimuni,

<sup>31</sup> pena pukulie, anju yando eneno ningindu: “I yemo ‘Ka ulkena pepili.’ nimulú aulke te kepe ‘Kolopili.’ nimulú aulke te kepe paa naa lemo. Yuni ulu te tepa naa kenjimu lemo.” niringi.

<sup>32</sup> Akiripane Pesitasindu nimbendo: “Yuni ‘Romo Gapomano Ye Paa Aili Kumbine Sisamone nanga kotemo pilipili.’ naa nilkenje yu ‘We pui.’ manda nilina.” nirimu.

## 27

<sup>1</sup> ‘Olio sipine kolea Italli poropinji pamili.’ ningulie niringimuni, Pollo kinie ka yambo lupe mare kinie ami ye wane anderete nokorumu ye

Julliasi "Nokoi." ningu siringi. Julliasi yu Romo Gapomano Ye Paa Aili Kumbine Sisamonga ami ye te.

<sup>2</sup> Kolea Aramitiamo sipi te, kolea Esia poropinji nomu kélona taono lemomanga pumbe terimu, aku sipine olio ola pupu, nomuna pumulú purumulu. Kolea Tesallonaika ye Arisitakasi pea purumulu.\* „Kolea Tesallonaika Masedonia poropinjine lerimu taono te.,»

<sup>3</sup> Ipulueli oukundu kolea aili Saidono purumulu. Akuna Julliasini Pollo kondo kolopa, 'Yunge pulu lemo yambo ya molemelemane yu nokoko, yu molo tolemo melema liku taponjiku siengi kene,' nimbe "Ene kanopui." nirimu.

<sup>4</sup> Kolea aili Saidono mundupu kelepo sipine altopo pupulie, poporomene sipi kumbikundu topa memba yando orumuna kelepo makaye tepo kolea Saipirasi anjukundu purumulu.

<sup>5</sup> Nomu kusana we pupulie, kolea Sillisia poropinji kinie Pambillia poropinjitolo mundupu kelepo pupu, kolea LLisia poropinji lerimu Maira taono purumulu.

<sup>6</sup> Akuna kanu sipimu mundupu kelerimulu, ami ye ailimuni Allekesandia sipi te kolea Italli poropinji pumbe terimu kanopalie sipi akuna oliondo "Pamili wai." nimbe lipe memba purumu.

<sup>7</sup> Wale aisili perelipu pupulie, Naidasi taono nondopo pupu, poporomene sipimu pipi sirimuna perepolie, kolea Kiriti anjukundu makapu tepo pupu, akuna lerimu taono Sallomoni mundupu kelepo,

**8** nomu kélona perelipu ombo pupu, LLasia taono nondopa lerimu kolea te, aku koleamo imbi lelko ‘Sipi Manda Lemo Kolea’ niringi, akuna purumulu.

**9** Wale aisili we omba pupe, Juda yamboma langi naa nongo mi toringi walema kepe omba purumuna kanu ponieno sipime andoramu walema pora nirimu. „Poniemanga pali poporome aili tepa torumu walema wendo ombá orumu kinie sipime pali naa andoringi kanumu.“ No paa aili tepa topa nondopa naa kelemba terimuna Pollone ene lepi lepi topalie nimbendo:

**10** “Yema, ‘Kinié púmulu liemo sipimu topa melema pali ondo lepa, olio kepe no wangopo kolomolonje.’ konopu lekero.” nirimu.

**11** Nakolo ami ye ailimuni Pollo ungu nirimumu pilipe, lipe su sipe, sipi pulu yemo kinie sipi kongono terimu yemo kinie eltene niringili mele pilipelie “Pamolo.” nirimu.

**12** “I koleana poporome tolemo kinie sipimu manda naa lemo lemba.” niringili kinie sipine moloringi yambo aisilini ningindu: “Kapola, poporome aili ou naa tokomo kinie Pinikisindu pamolo. Akuna pumulú kinie poporome aili tepa tomba walemanga sipimu manda akuna nosimulú.” niringi. Kolea Pinikisi ‘nomu suku singine lerimu ma kolea, Kiritine lerimu taono te.

**13** Pe poporome laye tepa topa, sipimu manda taka lepa memba pumbe mele ningu kanokolie “Manda pumulú.” ningu sipimu mengo puringi, kolea Kiriti nomu kélona purumulu.

**14** Nakolo wale talo mele omba purumu kinie poporome paa aili te topa, sipimu nomuna kelepa topa memba sukundu purumu. Kanu poporomemonga imbi ‘Giriki unguna, “Yurakillo.”’ niringi. Walse walse nimbe yunge walemo wendo orumu kinie torumu.

**15** Poporome yando sipe topa enge nirimuna pumulú purumulu mele manda naa terimuna ‘Kapola, olio we tengə memba pupili.’ nimbu sipine ola we molorumulu.

**16** Nomuna sukundu kolea kanga te lerimu, aku koleamonga imbimu Koda, akuna anju sipine pupulie, sipi purumulumuni sipi kanga kundupe merimumu nondopo lipu ka tepo panjimulundu pererimulu.

**17** Yemane sipi kanga kanumu sipi ailine kamu ola liku nosikulie, sipi aili purumulumu “Bulsumbe.” ningu ka marene sipimu makaye teko ka toko ingi siringi. ‘Poporomene sipimu kolea Apirika memba pumbe kinie olio tombanje.’ ningu mulu sele wendo liku nosiku, ‘We pamili.’ niringi.

**18** Sipimu poporomene paa torumuna opalikundu ‘Kamu keri lembanje.’ ningulie mele wale merimuluma liku nona manie manie teringi.

**19** Opalikundu sipi kongono teringi melema sipi pulu yema eneno liku manie manie teringi.

**20** Wale aisili ena kepe kombukandipi kepe melte naa kanopo, poporome mindi paa aili tepa torumu kinie ‘Yambo te omba olio lipe taponjipe wendo naa limbe. Olio sike kolomolo lemo.’ nimbu ulu te altopo naa tepo we molorumulu.

**21** Wale aisili yema langi te naa nongo moloringi kinie ene moloringine Pollo ola angilipelie nimbendo: "Yema, "Olio kolea Kiriti anju molamolo." nirindu mele pilipu lipu anju we molemelkanje kinié mindili nokomolo mele naa nombo, melema naa topo ele telemelka.

**22** Nakolo kinié olio yambo te naa kolomolo kene konopu wayongo siku molangi. Sipimu mindi keri lemba.

**23** Nane nikirumunge pulumu niembo pilieyo. Na Pulu Yemonga kendemande yemo molopo alieli yunge kongonomo tenjilio, kanu Pulu Yemonga angello te kinié ipulueli na molonduna ombo angilipelie

**24** nimbendo: "Pollo, mini wale naa munduyo. Romo Gapomano Ye Paa Aili Kumbine Sisamone nunge kotemo sike pilimbemonga nu nona naa puni. Nu kinie pea sipaye pukumili yamboma kepe Pulu Yemone kondo kolopa 'nu pea konde molonge.' nimu." nimbe angellomone nimu.

**25** Yema, Pulu Yemone nilimo mele na pilipulie 'Paa sike nilimo.' nimbu tondolo mundupu pilio mele pilipulie,\* yuni kinié nando nimu mele paa sike aku sipe temba kene ene mini wale naa munduku konopu wayongo siku molai.

**26** Nakolo sipimu nomuna suku lemo kolea tenga kélona sike pupe tomba lemo." nimbe Pollone nirimu.

**27** Olio sipaye purumulu kinie poporome topa molopili koro talo ombo purumu kanu wale-manga pali poporomene mindi olio topa memba purumu kinie sipimu ye tene kongono naa tepili 'Nomu Kusa Eria' niringine poporomene man-

jipe topa memba purumu. Aku sipu purumulu kinie walse ai burumi sipimu mengo puringi yemane pilkulie, 'Kinié nondopo kolea tengā pumulú ombamolo.' ningū piliringi.

<sup>28</sup> Aku siku ningū pilkulie niringimuni, manda manjili kamo nona manie munduku kanoringi kinie teti sikisi mita\* perimu kanoringi. Laye kolte purumulu kinie altoko manda manjili kamo munduku kanoringi kinie tuwendi sepene mita\*\* perimu kanoringi.

<sup>29</sup> Akumu kanokolie, 'Olio kou leli tengā sipimuni memba pumbe kinie olio tombanje.' ningū mini wale mundukulie, 'Sipimu we naa pupili.' ningū mele umbuni teli kise kane moko toko sipi bulkundu nona manie mundukulie, 'Ipulueli olio sipine naa topili, kolea welea tangopili.' niringi.

<sup>30</sup> Sipi kongono teli yemane 'Olio naa topili, sipimu mundupu kelepo pamili.' ningū sipi kanga membo purumulumu liku nomuna manie munduringi. Enene yambomando ningindu: "Sipimu naa pupe we lepili mele umbuni teli mare sipimunge kumbikundu moko topo nona manie mundemili." ningū aku teringi nakolo kolo toko ene eneno kiyongo ningū kowa pungindu aku siku teringi.

<sup>31</sup> Kanu kinie Pollone ami yema nokorumu yemo kinie ami yema kinie enendo nimbendo: "Sipi kongono teli yema pea sipine we naa molomulu liemo ene kinie sipine molemele yamboma pali kolonge lemo." nirimu.

<sup>32</sup> Aku nirimuna pilkulie ami yemane sipi kangamo moko toringi kama louni karu lelko

nona manie munduringi.

<sup>33</sup> Kolea nondopa tangomba terimu, muni kinie ou Pollone ‘Ene langi nangi.’ nimbe yambomando pali tondolo mundupelie nimbendo: “Koro talo ene langi te mimi siku naa nongo mini wale mindi munduku we moloringi.

<sup>34</sup> Aku kapola naa tekemo kene akumunge nane ene tondolo mundupulie nikiru: ‘Ene langi nongo enge ningu molangi.’ nimbu nikiru. Ene telu kepe paa naa kolonge. Sipimu tomba kinie enenga kimbu ki penge indi melema kepe ulu te naa temba.” nirimu.

<sup>35</sup> Aku nimbeline nirimumuni, ‘Ene mini wale naa munduku, konopu wayongo siku langi nangi.’ nimbeline, kanoko molangi yu berete te lipe pike lepa Pulu Yemondo “Ange.” nimbeline norumu.

<sup>36</sup> Aku terimu kinie yambomane kanokolie ene konopu wayongo siku langi liku noringi.

<sup>37</sup> (Olio sipine molorumulu mele yambo tu anderete sependi sikisi.)\*

<sup>38</sup> Ene langi noringi olo terimu kinie rasi witi wale we lerimuma ‘Sipimu umbuni naa tepili.’ ningu nona toko ele teringi.

<sup>39</sup> Kolea tangorumu kinie ene kolea te kanoringi nakolo kanoko imbi naa siringi. Ene no kélona kanoringi kinie sipimu manda pupe lemba kolea te kanoringi. Kanokolie ‘Sipimu akuna manda pupe lembanje.’ ningu pilkulie niringimuni,

<sup>40</sup> ye marene ‘Sipimu naa pupe we lepili.’ ningu mele umbuni telime moko toko nona manie munduringi kanu melema ka karu lelko

melema nona lepili siye kolko, marene sipimunge mulkupiyemo liku toko monjiku 'Sipimu kongono tepo nomu kélona membo pamili.' niringi. Marene 'Poporomene sipimu nomu kélona memba pupili.' ningu sipi kumbine múlu sele te ola anjiringi kinie no kélona pumulú purumulu.

<sup>41</sup> Nakolo mengo puringi kinie ma te nomuna suku lerimuna sipimu pupe topa ingi sirimu. Sipi kumbimu mana topa ingi sipelie wendo pumbe pererimuna no topa omba sipi bulkundu topa bulsurumu.

<sup>42</sup> Sipimu ou elke naa topili ami yemane ningindu: "Ka yamboma no lelko kowa pungí kene topo konjemili." niringi

<sup>43</sup> nakolo enenga ye ailimu 'Pollo naa tangi.' konopu lepalie nimbendo: "Molo, ka yamboma naa tai. No lemele yambomane ou sipimu munduku kelko no lelko no kélona pame.

<sup>44</sup> We molonge yamboma unju pellange sipine elke malke tombama liku ambolko no lelko no kélona pai." nirrimu. Aku tekolie yamboma pali no kélona ulsu puringi. Te no paa naa wangoringi.

## 28

<sup>1</sup> No lepo no kélona pupu pilirimulu kinie "I kolea kanga nomu suku singine lemo koleamonga imbibimu Molta." niringi.

<sup>2</sup> Aku kolea pulu yambomane olio paa kondo kolko liku taponjiku, lo omba ali paa terimuna

unju sulku tepe kalonjikulie, tepe keku puluna nondoko mengo puku monjikulie "Pea molamili." niringi.

<sup>3</sup> Pollone unju kola mare lipe maku topalie memba ombo tepena kalorumu kinie kongi ka wambiye te tepene norumu pilipelie wendo ombo Pollonga kíne kongilipe molorumu.

<sup>4</sup> Kolea pulu yambomane wambiyemo Pollonga kimu norumu kanokolie ene eneno ko likulie ningindu: "I yemo yambo te topa konjirimu lemo. Yu no naa wangomu nakolo Sumbi Nili Pelemo Yemone "Yuni aku terimumunge we konde naa molopili. Sike kolopili." nikimu lemo." niringi.

<sup>5</sup> Nakolo Pollone 'Wambiyemo pupili.' nimbe kimu tanda sirimu kinie wambiyemo tepena suku purumu, Pollo kolou naa kolopa we konde molorumu.\*

<sup>6</sup> Kolea pulu yambo kanumane , 'Wambiye tene yambo te kongilimo kinie tomo memena sukundu pulimo kinie yambo kanumu kolemo.' ningu pilku, , 'Pollonga kimu akombanje, molo yu topa mundumbe kinie kolombanje?' ningu ena aisili ombo purumu kanoko moloringi nakolo yu aku sipe ulu te naa tepa we kapola molorumu kanokolie, ene kelko konopu alowa tekolie ningindu: "I yemo pulu ye te lepamo." niringi.

<sup>7</sup> Aku koleamo nokorumu ye nomimu yunge ulke paa ailimu nondopa angilirimu. Yemo yunge imbi Papillasi. 'Ene nanga ulkena molamili wai.' nirimu kinie purumulu, wale yepoko yuni olio langi sipe nokopa konjirimu.

**8** Yunge lapa kangi nomba olo ombo pupe kuru torumuna we aniembo lerimu. Yu aniembo lerimuna Pollo pupe, Pulu Yemo mawa tepe yu ambolopa tepe konde lirimu.

**9** Aku sipe terimu kinie yu konde purumuna kanokolie, aku koleana kuru torumu yamboma pali Pollo molorumuna oringi, yuni ene tepe konde lirimula.

**10** Pollone aku terimuna kanokolie olio nokoko konjiku mele aisili siringi. Pe olio sipine pumulú terimulu kinie olio mele mare molo torumuma enene sipine mengo puku nosinjiringila.

**11** Aku koleana oli yepoko molorumulu kinie sipi te, poporome torumu walema wendo orumu kinie aku koleana ombo nokopa lerimu, kanu sipimunge purumulu. Kanu sipimu Allekesandia taono sipimu. Sipimunge kumbine pulu ye kolo toli Susini kango talo olo pakilieme merimu ningu popo toringi pulu yetolonga none teli meletolo teko sipi kumbine monjiringi.

**12** Olio sipine pupu kolea Molta mundupu kelepo kolea Sairakusi taonona pupu wale yepoko molorumulu.

**13** Sairakusi taono mundupu kelepo pupu Risiame taonona purumulu. Opalikundu poporome peanga te topalie sipimu paka topa melipe purumuna olio wale te we pupu wale talo sipemonga Putolli taonona pupu sipimu kamu mundupu kelerimulu.

**14** Aku taonona Kirasinge yambo mare moloringi, kanopo lirimulu kinie enene oliondo ningindu: “Ene ya molamili.” niringine koro telu ene kinie molopolie, kolea aili Romo kamu

manie aulke pumulú purumulu.

<sup>15</sup> Kirasinge yambo kolea aili Romo moloringime 'Yema okomele.' niringi pilkulie niringimuni, ene kolea aili Romo munduku kelko, mare 'Apiasi Makete' niringi koleana ongo olio kanoko liku, mare 'Yambo Ongo Pe Pu Opu Teringi Ulke Yepoko Angilirimu Koleamo' niringi koleana ongo olio kanoko liringi. Pollone kanu Kirasinge Romo yamboma oringi kanopalie Pulu Yemondo "Ange." nimbe konopu wayongo sirimu.\*

<sup>16</sup> Olio kolea aili Romo kamu suku purumulu kinie Romo gapomanomone "Pollo yuyu ulke tenga pepili, akuna ami ye tene nokopili." nirimu.

<sup>17</sup> Pollo wale yepoko Romo molopalie Romo moloringi Juda ye ailime "Wai." nirimu. Ongo maku toringi kinie enendo nimbendo: "Nanga angokeme, nane olionga Juda yamboma kinie olionga anda kolepalimenga ungu manema kinie lipu su sipu ulu te naa terindu\* nakolo na Jerusalleme molorundu kinie Juda yambomane na ka siku Romo ami yema siringi.\*\*

<sup>18</sup> Enene nanga kote tenjiringi mele Romo gapomano yemone pilipelie, "Yu toko konjengi.' nimbú ungu te naa pilkiru. Yu we pupili." nirimu.

<sup>19</sup> Juda yemane "Molo." ningu karaye teringi kinie nane nimbundu: "Kapola, Romo Gapomano Ye Paa Aili Kumbine Sisamone nanga kotemo pilipili. Romo pambo." nirindu. Nakolo nane nanga Juda yambomanga kote tenjimbundu ungu te aku sipu naa nirindu. Ene karaye

teko na tongue teringine aku sipu nirindu.\*

**20** 'Na Romo yando ondumunge pulumu ene nimbu siembo piliengil!' nimbu "Ene wai." nimbu walsindu. Olio Isirele yamboma Pulu Yemone "Tembo." nirimu mele 'Tepili.' nimbu nokopo molemolomonga ka senene nanga kíne ka tongine moltoro." nirimu.

**21** Romo moloringi Juda ye ailimene pundu toko Pollondo ningindu: "Judia molemele Juda yemane nu terinu mele olio piliemili pepá te toko yando naa siringi. Yando oringi yemane nuni ulu te teko kenjirinu mele ungu te naa ningu siringila.

**22** Nakolo olio Juda yambomane ungu manema pilipu telemolo mele Juda yambo marene munduku kelko ulu te wendo orumu mele pilku telemele akumu koleamanga pali yambo aisilini "Teko kenjikimili." nilimele kene nu konopuni pilino mele olio piliemili ningu sieni." niringi.\*

**23** Enene aku ningulie Pollo kinie maku tongue wale te mako toringi. Kanu walemo wendo orumu kinie *Juda*, yambo paa aisili Pollo perimu ulkena sukundu sukundu ongo maku toringi kinie yuni ipulueli ou pulu monjipe ungu nimbe molopili ipupini lerimu. Yuni Pulu Yemo yamboma nokopa kingimu molomba mele\* nimbe sipe, Mosisini torumu bokuma kinie, Pulu Yemone ungu umbu tonjirimuma pilku yamboma ningu siringi yemane toringi bokuma kinie, aku bokumanga\*\* ye te ombo temba mele niringi, kanumu Juda yamboma pilku 'Wendo ombá.' ningu nokoko moloringi mele we nokoko molemele, 'Kanu yemo Yesusindu

niringi.' nimbe 'Enene "Sike lepamo." ningu piliengi!' nimbe tondolo mundupe ene nimbe sirimu.

<sup>24</sup> Kanu kinie maku toko moloringi yambo marene "Sike nikimu." ningu piliringi, nakolo marene "Kolo tokomo." ningu piliringi.

<sup>25-29</sup> Pollone ene ungu te 'Paa piliengi!' nimbe enendo ungu te kamu nimbendo: " 'Enenga anda kolepalime piliengi!' nimbe Mini Kake Telimuni ye Aisayando ungu umbu tonjipe nimbe sirimu ungumu pilipe ene yando nimbe sirimumu\* sike nirimu. „Mini Kake Telimuni Aisayando nirimu mele i sipe: „

"Nu i yambo molemelena puku i siku nipani:

"Pulu Yemone nimbendo:

"Ene komu tenjiku unguma pilingí nakolo ungu pulumu naa pilingí;  
melte nemo nemo ningu kanonge nakolo melemo kanoko imbi naa singí.

Enenga konopuma kamu pipi silimele;  
komuni pilingindu siye kolemele;  
'Melte mongone naa kanomolo.' ningu mongo kumbulimelemonga aku siku tengé.

Aku naa telemelkanje

mongone sike kanoko,

komuni sike pilku,

konopuni sike ungu pulumu pilkulie,  
konopu alowa teko na moliona olemelka  
nane ene tepo konde lilke."

nikimu." ni."\*\*

nirimuna „pilipelie Aisayane aku sipe nirimu..  
Mini Kake Telimuni Aisayanga kerena nirimu  
mele ene Juda yambomanga anda kolepalimene

ou aku siku teringi mele ene sike kinié aku siku telemellemonga ene i ungumu piliengi: Pulu Yemone yamboma lipe taponjipe, ene mindili nolemelka aulkena wendo lipe, yu kinie pea molko konjingí aulkena lipe monjimbe mele 'Juda yambo ulsu molemele yambo lupema piliengi!' nimbe Pulu Yemone olio 'Juda, ye mare 'yambo lupema, moloringine lipe mundurumu. Kanu yambomane kanu ungumu sike pilku lingí." nirimu.

Pollone aku sipe nirimu kinie Juda yamboma eneno kerepali niliku konopu aisili liku munduliku puringi.

<sup>30</sup> Pollo ponie talo pali Romo ulke tenga yuyu perimu. Yamboma alielu yu molorumuna oringi kinie "Molamili wai." nirimu.

<sup>31</sup> Yambo tene Pollone ungu nimbé aulkemo pipi naa siengi yuni Pulu Yemo melema pali nokopa ye nomi kingimu molemo molomba mele kinie, Aili Yesusinge temanemo kinie, Yesusi Pulu Yemone 'Lipu mundumbu.' nimbe mako torumu ye nomi Kirasimu molorumu mele kinie,\* yamboma pipili naa kolopa tondolo mundupe nimbe sirimu.\*\*

„Aku pea..»

**PULU YEMONGA UNGU KONDEMO  
The New Testament in the No Penge Dialect of the  
Umbu-Ungu Language of Papua New Guinea  
Nupela Testamen long tokples Umbu-Ungu No Penge  
long Niugini**

copyright © 1995 Wycliffe Bible Translators, Inc.

Language: Umbu-Ungu No Penge (Umbu-Ungu)

Dialect: No Penge

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023  
d72fc3f0-db59-5dba-99c3-8bd2a84ed896